

Jesu'walaŋ Mede Momooŋ

Lukdi youkuk

Yodakale Mede

Lukdi Jesu'walaŋ Mede Momooŋ youlene metam Jesu keleyaugin baigoŋ hinek yeninadiune mede kahat momooŋ hinek timimbune nadiŋa youkuk. Medeniŋ daniniŋ indiŋ kameeŋ youkuk. "Jesu adi Isilaehi'walaŋiŋ Tubuloda niŋ mintadok Bepaŋdi yofolok tubune halibuguk wondiniŋ folooŋ." Ala Jesu adi Isilae metam hogok yehitubulodadok mu buguk. Adi yadi metam kwetkwet hatiyam indi maanŋ nihitubulodadok nadiŋa buguk. Ale Mede Momooŋ yohautaluguk adi Isilaehi metam fofonitdok hogok moŋ. Mede Momooŋ uyadi noli indi'walaŋ baniŋnikdok maanŋ nadiŋa yoluguk. Tiŋa yonadifo mede fe youkuk. Tububihila Jesu minta tugukneningoŋ nadifo mede youla uge uge kumuŋ gineniŋ kaikaanŋ pilali hatigene kunum gineŋ logukneŋ ungoŋ youdapmaguk. Tiŋa undugoŋ Ungoŋiŋ Munabulidi fooŋ Jesu'walaŋ kayoŋbop nadisukilitihik tubukilitiguk. Ala me mede inoŋ youkukdigoŋ Aposel heki'walaŋ pepa maanŋ undiningoŋ youkuk kayam.

Fiye 1, 2 eŋ 10 wooŋ 19 gineŋ mede hakiŋ uye Lukdi pepa youkukneŋ hogok youkuk. Matiyu dut Makdi mede u mu youkumuk. Kahat uye indih. Aŋelo hekidi Jesu mihi mintagukneŋ kap tonadifo tigiŋ. Domba yabudoko hekidi Jesu mihi

mintaanj hakuk u kane uginj. Jesu mekuya-kabe ginenj Silonyotnenj hatiguk. Samalianinj me mooninj dininj yoyout mede. Me wapum nin'walañ mihininj mone kadakaanj fiile tuguk dininj yoyout mede. Aganj ninadidok mede adi gigne hinek tinja youla uguk.

Lukdi mede danininj lufomkulitninj nimaanj indinj youkuk. Uñgoninj Munabuli dininj mede, tamwoidi Jesu'walañ kwanai ginenj tubulodaginj dininj mede, aganj Bepañdi yomnik tumolokut-nimulak dininj mede.

Luk'walañ Mede dininj yohebet

1.1–4 Yodakale

1.5–2.52 Jon dut Jesu'walañ mintaminta enj kuyahi ginenj hatigumuk

3.1–20 Jon Imeyout Tububihit'walañ mede kahat

3.21–4.13 Jesu Imeyout tuguk enj tikamanda mintaminguk

4.14–9.50 Jesudi Galili kwetnenj mintadakaleen kwanai tuguk

9.51–19.27 Galilininj Jelusalemde uguk

19.28–23.56 Jelusalem enj yokwet magimagi ginenj kwanai tuguk

24.1–53 Jesu kaikaanj pilakuk, aganj mintahebi tuguk, aganj kunum ginenj loguk

Lukdi Jesu'walañ kahat nolininj Teopilodok youliminguk

¹ O notne Teopilo, mehinek feedi nemek indi'walañ inonj mintaguk wondininj mede kahat youkinj.

² Tiña adi nemek koom tububihit ginenj mintauane me noli adi dauhikdi kañ gigitñij yohautaune nadiña youkinj.

³ Kañ nu maanj nemenemek tububihila mintagukneningonj nadinadi kwanai baigonj hinek tiña didimeningonj youkamulat.

⁴ Unduñ tibe nemenemek ganindidimeginj u biyagonj hinek unduñ nadiweñ.

Añelodi Sakaliya Silonyot maanenj mintaminguk

⁵ Helot adi Judiyahi'walañ mapme hatiguk nai unañij me niñ Silonyot dinij talitimenj hatiluguk wou Sakaliya. (Adi Abaisa dinij bop ginenij). Tamñij wou Elisabet, adi maanj Alon'walañ yalakinij.

⁶ Memalam adi Bepañ'walañ Yodoko Mede didimengonj hinek keleenj hatiyagumuk.

⁷ Tiña adi wapmihi nemu yehitubu-mintaanj hogok hatinja metam gawada hinek tugumuk.

⁸ Ala helenij Sakaliya adi me Silonyot dinij talitimenj hekidi Silonyotneñ foñ tagij unduñ titindok nainij dulaguk.

⁹ Ala nai unañij Silonyot dinij talitimenj adi titinhik keleenj Sakaliya adi Silonyot maanenj foñ wahu munduñ hemundumunduñe kwanai tibek nindapmagij. Kañ adi unduñ tibe Wapum'walañ Silonyotneñ folune

¹⁰ metam bop wapum adi ninadi kwanai fakanj ila tiginj.

¹¹ Kañ Sakaliya adi hemundumunduñe hatulu Wapum'walañ añelo niñdi mintamiña

alta gagayen Sakaliya'walañ kohon didimeniñnekade yakuk.

¹² Yalune Sakaliya adi añelo kañ nadibedi tiña munta tuguk.

¹³ Unduñ tubune niñguk, “Sakaliya, du munta mu tiben, Bepañ adi yonadige agañ nadiguk, ala tamge Elisabet adi mihi niñ tubumintagambaak. Kañ wou Jon youlaañ.

¹⁴⁻¹⁵ Adi Wapum'walañkade me lolonñit tibaak doktiña mintaune du nadifo wapum hinek tibaañ kañ metam nolidi maañ nadifo undugon tineen. Mihi mintaune nai uñaniñgon Uñgoniñ Munabulidi welen maaney fotokowaak tiña wain be ime fafañeniñ nemu nawaak, moñ hinek.

¹⁶ Adi Judahi metam fee kotigon yanagilune Bepañ'walañkade uneen.

¹⁷ Tiña adi timen woon sañiniñnit hinek polofet Ilaija dabugon Wapum baakdok talik dobui timimbaak. Adi bañ heki eñ wapmihihie tubukulamaune welekubugon tineen, eñ metam mede wobu tiñ yanagila talik didimeniñ keledok yenindidimewaak, tiña Wapum metamñiye u Wapum ne buña yabudok yehitiulidokowaak.”

¹⁸ Unduñ yoguk kañ Sakaliyadibo niñguk, “Nu tiña tamne indi agañ metam gawadahi hinek tamut doktiña nemek i biyagon nobu mintawaak u deti nadiwene foloon tibek?”

¹⁹ Unduñ yobu añelodibo niñguk, “Nu wotnene Gabiliye. Nu Bepañ'walañ namanda folon yatat ale adigon naninñkulune gigitmede fofoon i tiña bu ganilat.

²⁰ Ingon du nemek nainiñ folon biyagon

mintawaak u ganimbe medene mu nadisukiliti-
lan doktiņa du mage tehep tubune mede mu yoņa
hatibune wooņ gigitmede ganiņat wondi folooņ
mintaune mede kedem yobaan.”

²¹ Sakaliya adi unduņ ha-tulu metam adi dedin
tiņa Siloņyotneņ fooņ yagigi hinek hatak yoņa
nadibedi tiņa hakiņ.

²² Ala fooņ buņa metam mede mu yeniņa
kohonđi welewele hogok tiyembune metam adi
kaņ yogiņ, adi Siloņyotneņ uņgoņ kudi niņ binek
kaņak doktiņa tilak.

²³ Unduņ tiņa kwanai uņoņ titiņdok naiņiņ
dapmaune yopmaņde uguk.

²⁴ Wooņ muniniņ hatilune tamniņ Elisabet adi
mihiwele ikuk. Unduņ tiņa muyakip 5 yop-
maņkadegoņ kabup hebihatiluguk.

²⁵ Yopmaņ hali indin yoguk, “Kobuk agaņ Wa-
pumdi tali indin gineņ nehitubu-lodalak. Tiņa
Bepaņ adi metam namandahik gineņ mekaņgoņ
hatilat u agaņ nolom moņgokutnamulak.”

Aņelodi Maliya mintamiņguk

²⁶ Elisabet adi mihiwele ila muyakip 6 hatilu
Bepaņđi Gabiliye niņkulune Galili kwetneņ uņoņ
yokwet wapum niņ hatak, wou Nasalet, uņoņ
foguk.

²⁷ Uņoņ waabihem niņ hatuguk, wou Maliya,
adi Josepdok gigit nimbune hatiguk. Josep adi
mapme Dewit’walaņ yalaki.

²⁸ Ala aņelodi Maliya hakukneņ fooņ indin
niņguk, “Du kulemaņgoņ hatiben. Wapumdi
dukut hatilak doktiņa kahaņ tigamulak.”

²⁹ Undun yobu Maliya adi nadibedi wapum hinek tiŋa mede u mebi dedindok undun nilak yo nadiguk.

³⁰ Kan aŋelodi ninguk, “Maliya, du Bepan di mo-moon hinek tigamulak doktiŋa munta mu tibeŋ.

³¹ Du mihiwele ila mihi tubumintaan wou Jesu youlaan.

³² Adi lolon nit hinek tibaak kan Bepan Lolon nit mihin in nineen. Kan Bepan Wapum di papan Dewit dabugon mapme wapum kameu ilaak.

³³ Tiŋa adigon Jekop yalakin iye’walaŋ mapme wapum fafaŋenin hinek hatibaak, adi’walaŋ mapme kwanain in adi mu dapmawaak.”

³⁴ Undun yoguk kan Maliyadibo ninguk, “Nu yohone mu tugut in gon mihi deti nagilaat yo nanilan?”

³⁵ Undun yoguk kan aŋelodibo ninguk, “Un gon in Munabulidi welege maanen fotokoune Bepan’walaŋ saŋinin di gehikufulawaak. Undun doktiŋa Mihi Un gon in u mintaune Bepan Mihin in nineen.

³⁶ Elisabet namage u nadiwen, adi wapmihi tuwot mu nagitdok in gon mihiwele ilu muyakip 6 agaŋ tilak, tam gawadaŋ hinek in gon undun tilak.

³⁷ Bepan adi nemenemek tuwot mu tibek nemu hatak.”

³⁸ Undun yobu Maliyadibo yoguk, “Nu adi Wapum’walaŋ tipilapilaye tam doktiŋa yolaŋ undugon hinek mintanambaak.” Undun yobu aŋelodi bikabuŋa uguk.

Maliyadi Elisabet nadifo mede ninguk

³⁹ Anjelo uune Maliya adi tiulidoko tiŋa Nasalet bikabu woon Judiyahi'walaŋ guyaŋneŋ uguk.

⁴⁰ Woon yokwet Sakaliya malam itowagumukneŋ wosuwaan yohineŋ foon Elisabet niutumba tuguk.

⁴¹ Kaŋ Elisabet adi Maliya'walaŋ youtumba mede ya-nadilune nai uŋaŋiŋoŋ eyaŋ welaŋ maaneŋ hakuk u kayoŋ pilaŋ tuguk. Unduŋ tubune Elisabet adi Uŋgoŋiŋ Munabulidi fotokomimbune

⁴² mede wapum indin yoguk, “Du Bepaŋdi tamwoi noli yalakapmeen kahaŋ wapum tigamulak, tiŋa mihi tubumintawaan u maan kahaŋ wapum timilak.”

⁴³ Unduŋ yoŋa yoguk, “Nu nedigoŋ hinek doktiŋa Wapumne'walaŋ miŋdi nabene bulak?”

⁴⁴ Nu du'walaŋ youtumba mede nadiwene eyaŋ welene maaneŋ hatakdi nadifo tiŋa kayoŋ pilaŋ tiŋak doktiŋa ganilat.

⁴⁵ Bepaŋ adi nemek titiŋdok yoŋak wondok biyagoŋ nadisukilitilaŋ doktiŋa kahaŋ momoon hinek tigamulak.”

Maliyadi Bepaŋ wou nintiloŋ niutumbaguk

⁴⁶ Unduŋ yobu Maliyadi indin yoguk,
“Welenedi Wapum niutumbalak,

⁴⁷ Bepaŋ adi nu'walaŋ Tubuloda me doktiŋa munabulinedi nadifo tilak.

⁴⁸ Tipilapilaye waabiŋiŋ fofonit nu kaule mu tinamulak doktiŋa kamiŋ tububihila kougoŋ kougoŋ bunit metam hogohogok adi Bepaŋdi kahaŋ tinamguk u nadineeŋ.

49 Bepañ sañiniñ molom adi nemek wapum i tinamunak doktiña wou adi ungoniñ hinek.

50 Metam bebet hatitalabiin tomboyoula hatitaloneen indigon Bepañ kañ gikiñgon timiin adi kulema yemuluwaak.

51 Adi kohon wapuhidi kihiwali metam sigitiñalo tiin adi nadihebethik bunit yehitubu-fiitak.

52 Adi me mapme wapuhi iithik folon yanagi foon yapmeen metam fofonhinit yanagi lolon tilak.

53 Adi metam nemenemek lohi tiin yemiña metam bombonhinit yeniñkulu hogok wiin.

54 Adi mamani-papaniye mede yofafane tiyemguk u agañ yehitubu-lodalak.

55 Adi Abalaham tiña yalakiñiye kulema fafaneniñ tubumintayemdok yeniñguk u kaule mu tuguk.”

56 Unduñ yoña Maliya adi muyakip lufomkulitniñ Elisabet dut ungon hatiña kotigon yolide uguk.

Mihi Jon mintaguk

57 Kañ Elisabetdi eyaññiñ mintamindok nai tubune mihi nagikuk.

58 Metam noliñiye adi Wapumdi nemek moon timiñguk u kañ nadifo nongon tigiñ.

59 Tiña melenai 8 dapmaune sigiñ gitnem diki folon Judahi’walañ fek timiña wou Sakaliya youtnim yogiñ.

60 Kañ miñdi moñ yoguk, “Mihi wou adi Jon.”

61 Unduñ yoguk kañ niñgiñ, “Du magemageye nebek wou unduñ nemon ingon deti unduñ youle yolañ.”

62 Unduñ yoña metam adi Sakaliyadi mihi wou dedin yobek yoña welewele timiñgiñ.

⁶³ Kañ Sakaliyadi tafedok yenimbu mimbune wou “Jon” youkuk. Unduñ youlu metam adi u kañ boho tiginj.

⁶⁴ Unduñ tiña nai unõaningõñ hinek Sakaliya manij dilitombune mede yoña Bepañ niutum-baguk.

⁶⁵ Unduñ tuguk kañ menjimenjiye unõñ yakinj adi u kañ muntaañ gigitñij yohautaune Judiya dinij kwet hanjihangi indigonj udapmaguk.

⁶⁶ Kañ metam u nadiginj heki adi mihi u bedinaditomunõ kougõñ dediningõñ hinek hati-baak yoña nadiginj. Tiña undugõñ mihi u Wapum’walañ sanjinij adut hatak u miñgõñ dakalelak yo kaginj.

Sakaliyadi kigili mede yoña Bepañ niutum-baguk

⁶⁷ Jon beu Sakaliya adi Unõgonij Munabulidi welenj maanenj fotokoune Bepañ’walañ mede indij yoguk,

⁶⁸ “Indi Isilaehi’walañ Bepañ Wapum u niutum-bayam. Adi metamñiye buña yehitubulodaguk.

⁶⁹ Adi Dewit’walañ yalaki nij inditok Tubuloda me kamenimijak.

⁷⁰ Koomkwaha polofet unõgonijye yenimbu undugõñ yoginj.

⁷¹ Adi metam momoõñ mu tinimiin be memiknik fiyenj yoña nibudoko tibe yofafañe tuguk.

⁷² Mamani-papaniye dut yofolok tuguk u kaule mu titindok yoña kulema tubumintayemguk.

⁷³ Adi papanik Abalahamdok mede yofafañe tiña indij ninjuk,

74 ‘Hidi memik fiyen doktiņa nu habudokowene muntanit mokit nu naniutumbayaneen.’

75 Unduņ tiņa helemahelman adi namanda foloņ uņgoņiņ eņ didimeņgoņ yayatdok nadiņa yoguk.

76 “Mihine, du adi Wapum baakdok talik dobui timimbaaņ doktiņa du adi Bepaņ Loloņnit Hinek’walaņ polofet ganiņdok.

77 Tiņa talik dobui tiņa metamņiye kadakaniņhik biyemiņa yehitubu-lodadok gigit yohautawaaņ.

78 Bepaņnik’walaņ kulemadi nibudokoune kunum diniņ hautaņiņdi indi nihitubu-hautawaak,

79 tiņa metam kumuņ diniņ mambip gineņ hatiņ hogohogok yehitubu-hautaune kulema diniņ talik didimeņgoņ keleneeņ.”

80 Unduņ yobune Jon adi bedinaditombu munabulidi welen maaneņ fotokoune kwet fileņ wooņ hatilune Isilaehi metam namandahik foloņ mintayemdok nai tuguk.

2

Mihi Jesu mintaguk (Matiyu 1:18-25)

1 Nai uņaniņ Lomahi’walaņ mapme wapum Sisa Ogastas adi kwetkwet memetam hogohogok wohiye youkudip tiyemdok yoguk.

2 Kwiliniya adi Siliya kwetneņ kiyap wapum hatilugukneņ kwanai u tububihikiņ.

3 Ala metam hogohogok adi yokwet mebihik hayemtauguk indigoņ tuwot youkudip uņoņ tine ugiņ.

⁴ Kaŋ Josep adi Dewit'walaŋ yalakiŋiŋ doktiŋa Dewit'walaŋ yokwet mebineŋ Betelehem uŋoŋ youkudip titiŋdok yoŋa yokwet wapum Nasalet biŋa Judiya kwetneŋ Betelehemde uguk.

⁵ Tiŋa tamŋiŋ gigit niŋiŋ wou Maliya adigut wohik youkudip tide ugumuk. Woonŋ tamŋiŋ mihiwelenit

⁶ ala Betelehem uŋoŋ mintadok nai tuguk.

⁷ Kaŋ nalum hekidi woonŋ iitdok yotmaanŋ u tuwot tokiguk doktiŋa mihiŋiŋ Tuwo mintaune hauledi yauneŋ makau heki muwagehik nananeŋ nayagiŋ gineŋ kameu hakuk.

Aŋelo heki dompa yabudoko me heki gigit momoon yenimbihikiŋ

⁸ Kaŋ Betelehem yokwet gagayeŋ me noli dompa yabudokoŋ timiŋ damo mu deila hogok hakiŋ

⁹ kaŋ Wapum'walaŋ aŋelodi mintayembune Wapum'walaŋ hautadi yehitubu-hautaune munta kisaŋ tigiŋ.

¹⁰ Unduŋ tigiŋ kaŋ aŋelodi yeniŋguk, "Hidi munta mu tineŋ. Nu gigitmede momoonŋ tihambulat. Metam hogohogok adi u nadiŋa nadifo wapum tineŋ.

¹¹ Kaminŋ Dewit'walaŋ yokwet mebineŋ hidi'walaŋ Tubuloda mehik, Wapum Kilisto mintalak.

¹² Ala woonŋ eyaŋ hauledi tumula makau heki'walaŋ muwage gineŋ kamenjit kaŋ agaŋ uŋakoŋ yo nadiŋeŋ."

¹³ Unduŋ yenimbu pilap hinek kunum gineneŋ aŋelo mohok buŋa aŋelo nohik dut Bepaŋ indin niutumbaŋiŋ.

¹⁴ “Bepaŋ kunum gineŋ nintiloloŋ titiŋdok, Adi me welesiloŋ tiyemulak, Adi’walaŋkade kulema mintalak.”

¹⁵ Unduŋ toŋa aŋelo heki kotigoŋ kunum gineneŋ loune me dompa yabudoko tigiŋ heki adi yogiŋ, “Indi Betelehemde wooŋ Wapumdi nemek nini-lak u kane.”

¹⁶ Unduŋ yoŋa pilap hinek wooŋ Maliya dut Josep makau yotneŋ ikagumuk yabuŋa eyaŋ muwage gineŋ deihakuk u kagiŋ.

¹⁷ U kaŋ wooŋ aŋelodi eyaŋ wondok yeneŋguk u metam yenimbu

¹⁸ nadiŋa boho tigiŋ.

¹⁹ Unduŋ yeneŋgiŋ kaŋ Maliya adi mede u nadiŋa kaule mu tuguk, adi welenŋi mede u nadituwatuwale hinek tuguk.

²⁰ Kaŋ dompa yabudoko tagiŋ adi nemek aŋelodi yeneŋguk wendok tuwot buŋa kaŋ nadiŋa Bepaŋ niutumbaŋ nintiloŋ udaneŋ kotigoŋ dompa yabudokone ugiŋ.

Simion dut Ana adi mihi Jesu kagumuk

²¹ Mihi mintaŋ halu melenai 8 dapmaune Judahi’walaŋ fek timiŋa wou koom miŋ welenŋ maaneŋ mu hatu aŋelodi yoguk uŋakoŋ, wou Jesu youkiŋ.

²² Moses’walaŋ Yodoko Mede hakuk uŋgoŋ takaliŋa yehitubu-walandadok nai tuguk, kaŋ Josep malam adi mihihik nagila Jelusalemde ugu-muk.

²³ Tiŋa undugon Wapum'walaŋ Yodoko Mede gineŋ adi "Tuwo hogohogok mintaune Wapum silon timindok," youkiŋ wondoktiŋa nagila ugumuk.

²⁴ Tiŋa Wapum'walaŋ Yodoko Mededi yolak unduŋ, butigili lufom be melebi lufom tuwaan Bepaŋdok hemundumunduŋ tide ugumuk.

²⁵ Nai uŋaniŋ Jelusalem uŋon me niŋ hatiluguk wou Simion, adi me momoon tiŋa Bepaŋ nadisuk-ilimiluguk, eŋ Uŋgoniŋ Munabuli adut hatiluguk, tiŋa adi Judahidi kedebadok nai wendok woomuluguk.

²⁶ Doktiŋa indinŋ ninguk, "Du hogok hatiŋa Wapumdi Kilisto kamewe yofafaŋe tuguk u buune kaŋ kumumbaŋ."

²⁷ Nai uŋaniŋ Uŋgoniŋ Munabulidi Simion nimbune Silonyotneŋ foguk. Kaŋ Jesu miŋbeu adi Wapum'walaŋ Yodoko Mededi yolak unduŋ tide fogumuk kaŋ

²⁸ Simion adi mihi u toboŋa Bepaŋ indinŋ niutumbaguk.

²⁹ "Wapum, du yofafaŋe medege kameeŋ hali bulaŋ ale tipilapilayege nu kulemaŋgon napmeu wit.

³⁰ Nu daunedu hinek tubuloda-me du'walaaniŋ agaŋ kalat,

³¹ u metam hogohogokdi kaneŋ yoŋa kamelaŋ.

³² Uyadi metam Judahi'walaŋ feknit mokit adi'walaŋ welehiŋ gineŋ hauta wapum mintawaak. Eŋ Isilae metam'walaŋkade wohogegigit wapum hinek mintawaak."

33 Mede unduŋ yobu Jesu miŋbeu adi nadiune unŋoniŋ hinek tuguk.

34 Simion adi mede unduŋ yoŋa kahaŋ tiyemiŋa Maliya indiŋ niŋguk, “Eyaŋ i Isilaehi metam nolidi adut galiŋa hatihati fofoon kahileneeŋ e metam noli adut mu galineeŋ adi kadaka tineeŋ yoŋa Bepaŋdi tubumintaguk. Tiŋa adi yadi Bepaŋ’walaaniŋ kudi niŋ unakoŋ

35 doktiŋa metamdi nehi unŋonŋ aditok siweneŋ nadinadihik kabup hatak u miŋgoŋ tubumintaune bulaningonŋdi subalige duŋgoŋ hinek tamat titobune nadiwaaŋ.”

36 Koom polofet tam niŋ hatiguk wou Ana, adi Fanuwe waabiŋiŋ, eŋ Asa’walaŋ yalakiŋiŋ. Adi koom tamkuya yali me tiŋa gulet 7 hatiŋa yohoi kumuŋguk.

37 Kaŋ tam kahat hatibu gulet 84 tuguk. Ala adi helemahelamaŋ Silonyotneŋ foon Bepaŋ niutumbaaŋ nanaje kamehep tiŋa hati Bepaŋ ninadi kwanai tuluguk.

38 Ala nai unaniŋgoŋ Simion mede yolune Anadi maan Silonyotneŋ foon Josep malam yehitubu-mintaŋ Bepaŋ niutumbaguk. Unduŋ tiŋa Jelusalemhi Tubulodahik kameu bubuŋdok woom hatiyagiŋ adi Jesu mihi mintagukdok gigitiŋiŋ yeniŋguk.

39 Jelusalem unŋon nemenemek Wapum’walaŋ Yodoko Mededi yolak u keleen tubudapmaan yohikwehineŋ Nasaletde ugiŋ.

40 Unŋon hatiŋa mihi u agaŋ Bepaŋdi kahaŋ timimbune saŋiniŋnit beŋiŋa nadinadinit tuguk.

*Gulet foloŋ mihi Jesu nagila Jelusalemde ugu-
muk*

⁴¹ Gulet indigoŋ Jesu miŋbeu adi Aŋelodi Yabukiyondaan Yalakapmegukdok hinamunide Jelusalemde yawagumuk.

⁴² Ala Jesu guletŋiŋ 12 tubune Aŋelodi Yabukiyondaan Yalakapmeguk wendiniŋ gulet itne feŋ tagiŋ unduŋ Jelusalemde ugiŋ.

⁴³ Gulet dapmaune Jesu adi uŋgoŋ hakuk kaŋ miŋbeu adi mu naditumbaŋ yopmande ugu-
muk.

⁴⁴ Adi metam noli dut wiŋ yoŋa ugumuk ala hele kubugoŋ dapmaune mehimehiye gineŋ lo-
higumuk

⁴⁵ iŋgoŋ mu kaŋ kotigoŋ Jelusalemde lohitaugu-
muk.

⁴⁶ Woon lohi hatibune kadehati lufomkulitniŋ dapmaune Silonyotneŋ looŋ kalune Jesu adi Ju-
dahi Yodoko Mede hinale heki'walaŋ lekiŋgoŋhik
gineŋ ila medehik nadiŋa yeninadi tuguk.

⁴⁷ Kaŋ me noli adi Jesudi mede tubu-
udaneyemguk u kaŋ nadiune beweniŋgoŋ hinek
tuguk.

⁴⁸ Unduŋ ha-tulu miŋbeu adi maan woon kaŋ
boho tiŋa miŋdi niŋguk, “Mihine, du maŋgoŋde
nilamulune baha indi nadibedi kisaŋ hinek tiŋa
golohiyamut?”

⁴⁹ Unduŋ nimbu adibo yeniŋguk, “Hidi
maŋgoŋde nolohiyamuk? Nu batnedi kwanai
indiŋ titiŋdegoŋ nanindapmaguk u hidi mube
nadiyamuk?”

⁵⁰ Mede u yeniŋguk uyadi mu nadidakalegu-
muk.

⁵¹ Tina kotigon nongon Nasaletde ugin, woon hatina Jesudi minbeu'walaŋ mede tilolon kwanai tiyemiluguk. Min adi nemenemek unon mintaguk u kaŋ woon kaule mu tuguk, u welen ginen nadinale nadinale hatiluguk.

⁵² Kaŋ Jesu adi welen be foloon wanaŋ saŋiniŋnit bediguk. Kaŋ me be Bepaŋ adi kaune utumba hogok tuluguk.

3

Jondi meeniŋ mute mede yeniŋila Imeyout tiyemguk

(Matiyu 3:1-12; Mak 1:1-8; Jon 1:19-28)

¹ Taibiliya adi Lomahi'walaŋ Mapme Wapum hatilune gulet 15 tubune Jon Imeyout Tububihit adi kwanaiŋ tububihikuk. Nai unonin Pontiyas Pailatdi Judiya kwetneŋ kiyap wapum hatiguk, kaŋ Helot adi Galili kwet kadokome hatiluguk, kaŋ kwayaŋ Filip adi Ituliya dut Telekonaitis'walaŋ me wapum hatiguk, eŋ Lisaniya adi Abilinihi'walaŋ me wapum hatiguk,

² kaŋ Anas dut Kaifa adi Silonyot diniŋ Talitimen Wapum hatigumuk. Kaŋ nai unonin Sakaliya mihiniŋ Jon adi kwet fiilen hatilune Bepaŋ'walaŋ mededi adi'walaŋkade buguk.

³ Buune Jon adi Jodaŋ Ime fukuniŋ be fukuniŋ yaudapmaan metam indin yenihautaluguk, "Hidi kadakaninŋhik sigilulum tiyemiŋa buune Imeyout tihambe Bepaŋdi kadakaninŋhik tumolokuhambek."

⁴ Polofet Aisaiyadi Youkudip Mede ginen indin youkuk wondok tuwot mintaguk,

“Me nin kwet fiilen indin kutilak,

‘Wapumdok tiulidoko tinen, tina talik didimenjon imindok.

⁵ Kwet lonafonjatnit u tubudidime hinek titindok. Kweboboe wapuhi be kuyahi u fipupuheneune didimenjon hinek mintawek. Talik gembugolohi u tubudidime tina indok, tina kwet tuntunehi hefulana igumuta hinek titindok.

⁶ Undun tina metam hogohogok adi Bepandi metamjiye yehitubu-lodaan kadakanin ginenin yanagilaak u kaneen.’ ”

⁷ Metam fee adi Jondi Imeyout tiyembek yo bugin kan adi indin yenintoguk, “Hidige! Mingembet miknit dinin yalakinjiye hidi! Hidi Bepan’walaan kwihita mintaune momonim be yo tiin?”

⁸ Kadakanin hik agan sigilulum tiyemiin habudok wendok kwanai tinen. Tina hidegon Abalaham’walaan yalakinjiye mu yonen. Nu biyagon hinek hanilat, Bepan adi kedem yobune kawade yendi Abalaham’walaan yalakinjiye gitipmun mintanen.

⁹ Finanjon nin bem kiliki momoongan mu foin u mebi ginengan fiyapmaan kudup ginen yakudok woom hatak.”

¹⁰ Undun yeninguk kan metamdibo ninadigin, “Undun yolan ale indi dedin tinim?”

¹¹ Undun yobune yeninguk, “Nebek nin dahi-dahi lufom nobu mongo hatiluwek kan noli me dahidahinit mokitdok mimbek, be nebek nin nananenit kan nanae u dane tibek.”

12 Me takis muneen mongomongot tagin me noli Imeyout tine buña ningin, “Hinale, indi dedin tinim?”

13 Undun ningin kañ yeninguk, “Hidi muneen dedin mongotdok yonit hatak u kalakapme mu tiña mongokaneen.”

14 Kañ mikme hekidibo buña ningin, “Kañ indiyon, indi dedin tinim.”

Undun ninadigin kañ yeninguk, “Metam muneen hamdok yeningigine mu taneen, be metam yalan yeniña yanagila yot fafajeninen mu yapmeyaneen. Kwanaihik dinin tuwanin dedin mongokaneen unakon nadiune tuwot tiluwaak.”

15 Jon adi undun yon tubune metam adi kañ nadinadihik kaikaune nadibedi tiña indin yogin, “Me yadi Kilisto bidak.”

16 Undun yogin kañ Jondibo indin yeninguk, “Nu adi imedi hogok Imeyout tihamulat ingon me nin mindan bulak adi yadi Ungonin Munabuli dut kudupdi youhambaak. Adi loloñnit, nu nalakapmen tilak. Tiña nu aindinindi tipilapilaye timindok tuwot mon.

17 Adi yadi yohumuñnit buña nanane yotnin tutumbawaak. Tiña nanane nanandok u daneen yopman boiwaak en figifigi u yohumuneen wali woon kudup ginen heune dawaak.”

18 Jon adi metam Mede Momoon yeniyenin tiña metam weleyouyout mede tali fee ginen yeninguk.

¹⁹ Tiņa Helot adi dali'walaņ tam Helodiya lom nagikuk, eņ nemek kadakanin noli maan tuguk doktiņa Jondi kamehep mede ninguk.

²⁰ Kaņ Helotdi kudi kadakanin hinek nin indin tuguk. Jon nagila yot fafanenin ginen kameguk.

Jesu Imeyout tulune Uņgonin Munabuli fotokominguk

(Matiyu 3:13-17; Mak 1:9-11)

²¹ Metam hogohogok adi Imeyout tigin kaņ Jesu maan Imeyout tuguk. Tiņa ninadi kwanai yatubune kunum dilitombune

²² Uņgonin Munabulidi butigili wele tiņa adi'walaņ foloon folon foguk. Kaņ kunum ginenin mede nin indin foguk, "Du adi na'walaņ mihine hinek, welenedi hinek gabukahilelat. Nu nadigambe utumba hinek tilak."

Jesu dadanije'walaņ wohiye hebet

(Matiyu 1:1-17)

²³ Jesu adi guletņin 30 tubune kwanainin tubu-bihikuk. Kaņ metamdi Jesudok nadimimbu Josep'walaņ mihi tuguk, kaņ Josep adi Heli mihinin,

²⁴ Heli adi Matat mihinin, Matat adi Lewi mihinin, Lewi adi Meliki mihinin, Meliki adi Yanai mihinin, Yanai adi Josep mihinin,

²⁵ Josep adi Matataiyas mihinin, Matataiyas adi Amos mihinin, Amos adi Nahum mihinin, Nahum adi Esili mihinin, Esili adi Nagai mihinin,

²⁶ Nagai adi Maat mihinin, Maat adi Matataiyas mihinin, Matataiyas adi Semein mihinin, Semein adi Yosek mihinin, Yosek adi Yoda mihinin,

27 Yoda adi Yoanan mihiniņ, Yoanan adi Lesa mihiniņ, Lesa adi Selababel mihiniņ, Selababel adi Siyatiyel mihiniņ, Siyatiyel adi Neli mihiniņ.

28 Neli adi Meliki mihiniņ, Meliki adi Edi mihiniņ, Edi adi Kosam mihiniņ, Kosam adi Elimadam mihiniņ, Elimadam adi Eya mihiniņ,

29 Eya adi Josuwa mihiniņ, Josuwa adi Eliyesa mihiniņ, Eliyesa adi Yolim mihiniņ, Yolim adi Matat mihiniņ, Matat adi Lewi mihiniņ,

30 Lewi adi Simion mihiniņ, Simion adi Juda mihiniņ, Juda adi Josep mihiniņ, Josep adi Yonam mihiniņ, Yonam adi Eliyakim mihiniņ,

31 Eliyakim adi Meliya mihiniņ, Meliya adi Mena mihiniņ, Mena adi Matata mihiniņ, Matata adi Neiten mihiniņ, Neiten adi Dewit mihiniņ,

32 Dewit adi Jesi mihiniņ, Jesi adi Obet mihiniņ, Obet adi Boas mihiniņ, Boas adi Salmon mihiniņ, Salmon adi Nason mihiniņ,

33 Nason adi Aminadap mihiniņ, Aminadap adi Atmin mihiniņ, Atmin adi Lam mihiniņ, Lam adi Hesolon mihiniņ, Hesolon adi Peles mihiniņ, Peles adi Juda mihiniņ,

34 Juda adi Jekop mihiniņ, Jekop adi Aisak mihiniņ, Aisak adi Abalaham mihiniņ, Abalaham adi Tela mihiniņ, Tela adi Neho mihiniņ,

35 Neho adi Selak mihiniņ, Selak adi Leu mihiniņ, Leu adi Pelek mihiniņ, Pelek adi Iba mihiniņ, Iba adi Sila mihiniņ,

36 Sila adi Keinan mihiniņ, Keinan adi Afaksat mihiniņ, Afaksat adi Siem mihiniņ, Siem adi Nowa mihiniņ, Nowa adi Lemek mihiniņ,

37 Lemek adi Metusala mihiniņ, Metusala adi Inok

mihiniŋ, Inok adi Yelet mihiniŋ, Yelet adi Mahalalel mihiniŋ, Mahalalel adi Keinan mihiniŋ,
 38 Keinan adi Inos mihiniŋ, Inos adi Set mihiniŋ, Set adi Adam mihiniŋ, Adam adi Bepaŋ'walaaniŋ.

4

Jesudi Sadaŋ'walaŋ tikamanda kakiyondaan kelekufakuk

(Matiyu 4:1-11; Mak 1:12-13)

¹ Jesu Jodan Imeneniŋ udaneune Uŋgoniŋ Munabuli welen maanen fotokoon nagilune kwet fileŋ uguk.

² Uŋon woon helebufa 40 wondok tuwot nanane nemu naan map hatilu Sadaŋdi tikamanda timiŋguk.

³ Sadaŋdi indiŋ niŋguk, “Du Bepaŋ mihiniŋ biyagon nobu hatiliwen kaŋ kawade i yenimbu nanane yageleneŋ.”

⁴ Unduŋ nimbu Jesudi yoguk, “Yodoko Mededi indiŋ yolak, ‘Mehinek adi nanaŋedok hogok mu hatidok.’”

⁵ Unduŋ yobune Sadaŋdi kotigon nagiloon kweboboe wapum foloŋ yali pap hinek nimbune kwetkwet u kaguk,

⁶ kaune niŋguk, “Nemenemek yabulaŋ hogohogok wondiniŋ saŋiniŋ be wougigit hogohogok haliulak u dutok gamdapmait. U nu'walaŋ kohone foloŋ kamenit doktiŋa nebek niŋdok mimbe nadiŋa kedem mimbit.

⁷ Unduŋ doktiŋa du mulelem tinamuŋa naniutumba tibeŋ kaŋ kedem gambit.”

8 Undun nimbune Jesudibo yoguk, “Bepañ’walañ Mededi indin yolak, ‘Wapumge Bepañ hogok niutumbaañ mulelem timina adi’walañ falipmen hogok hatibaañ.’ ”

9 Undun yobune kotigon nagila loon Jelusalem Silonyot ki folon logumuk. Loon Sadañdi ninguk, “Du Bepañ mihinin biyagon nobu hatiliwen kan inaniñ tatakula kwetfolon fowen.

10 Bepañ’walañ Mededi indin yolak doktina tatakula fowen, ‘Bepañ adi aneloniye yapmeune bunja gehitubulodañ gabudokoneñ.’

11 Tina indin mañ yolak, ‘Adi kohonon gitagon ganagi foon gapmeune kawadedi kayoge-kabe nemu youlek.’ ”

12 Undun yobune Jesudibo ninguk, “Bepañ’walañ Mededi indin mañ yolak, ‘Du Wapumge Bepañ tikamanda mu timimben.’ ”

13 Sadañ adi tikamanda mebimebi undun timina bikabuna uguk. Woon nai nin dok woomhatiguk.

*Jesu ne’walahi menot momoon mu timingin
(Matiyu 4:12-17; 13:53-58; Mak 1:14-15; 6:1-6)*

14 Undun tina Ungonin Munabulidi min-ikiliti timimbune Jesu Galilide uguk. Uune gigitnin Galili maanen nadidapmagin.

15 Kan bopyotnen foon Bepañ’walañ mede yoyo tubune metamdi nadin nintilolon tigin.

16 Undun tina Jesu adi yolikwelide Nasaletde uguk. Unon woon fen tuluguk undun Sabat folon Judahi’walañ bopyotnen foon Bepañ’walañ Youkudip Mede kunale pilali yakuk.

17 Kaṅ polofet Aisaiyadi pepa youkuk u tiṅa miṅgiṅ. Kaṅ pepa bilibetnit u tiṅa fiyali kudi indinṅ youkuk u kaṅ kunahautaguk,

18 “Metam fiyewakahi mede momoonṅ yeniyeninṅ titinṅdok naninṅguk doktiṅa Wapum’walaṅ Munabuli nukut hatak. Nu adi meeninṅ kayohik kohohik tawadi ibikilitinṅit u fiyakuyemdok yoṅa napmeune bugut, tiṅa me dauhik sipmakahi u yehitubutomyemdok napmeune bugut, eṅ me yalaṅ yeninṅa kubo tiyemiinṅ u yehitubu-lodadok napmeune bugut.

19 Tiṅa unduṅoṅ gulet deninṅ hinek Wapumdi mehineknṅiye yehitubu-lodawaak yoguk u yohautadok yo napmeune bugut.”

20 Jesu adi mede unduṅ kunali pepa gwihinṅa tipilapilaye-me yakuk u miṅa fo ikuk. Kaṅ metam hogohogok uṅoṅ ikinṅ adi Jesu dautelet timinṅgiṅ.

21 Unduṅ tubune yeninṅguk, “Mede i kunale nadinṅit kamiṅ agaṅ foloonṅ mintalak.”

22 Unduṅ yobune metam uṅoṅ ikinṅ adi medeṅinṅ nadinṅa boho tiṅa mede momoonṅ yolak ninṅgiṅ. Tiṅa indinṅ yoginṅ, “Me yadi Josep mihinṅinṅ. Detiṅa mede unduṅ yolak?”

23 Unduṅ yobu adibo tomboyoula indinṅ yeninṅguk, “Hidi mede indinṅ agaṅ naninenṅ hinek nadilat, ‘Haguwo me, du mebige be kudi Kafanaum gwaṅ tilaṅ unduṅoṅ da’walaṅ yokekwwakenenṅ inṅoṅ tubune gabunim.’ ”

24 Unduṅ yoṅa tomboyoula indinṅ yeninṅguk, “Polofet adi yolikwelinṅ meṅimenṅiyedi kahaṅinda tiinṅ.

²⁵ I nadinenj. Koom Ilaija'walañ nai folon Judiya kwetneñ unon tam kahat fee hatiginj, kan nai unaniñ gwi mu ula hatibu gulet lufomkultinij tija muyakip 6 dapmaune Judiya kwet unon map wapum hinek mintaguk.

²⁶ Undun tuguk ingon Ilaija ninikulune nebek ne'walahi yabe mu uguk, adi tobo ninikulune tam kahat nin Saidon kwetneñ Salefat unon itouluguk kawe uguk.

²⁷ Tija undugon polofet Ilaisa'walañ nai folon Judiya unon me wede hakiminit fee hatiginj ingon me noli mu yehitubu-kedebaguk adi me Siliya nin me Naiman hogok buune tubukedebaguk."

²⁸ Undun yenimbu metam bopyot maanenj ikin hogohogok adi welehek kadakaune

²⁹ pilali Jesu hamanti yokwet wapum maginenj fogin. Foon nagila kweboboe folon loonj bebelinej silone tukutne loginj.

³⁰ Ingon Jesu adi metam banamhik ginenj ungon woonj wodimaanj uguk.

Jesu adi Kafanaum yokwetneñ ungon kwanai tuguk

(Mak 1:21-28)

³¹ Undun tija Jesudi woonj Galili kwetneñ yokwet wapum nin Kafanaum unon woonj Sabat folon metam Bepañ'walañ mede yenindidime tuguk,

³² kan metam unon ikin hogohogok adi mede molomdi fulungon hinek yoguk doktija nadiña boho tiginj.

³³ Tija me nin bopyotneñ unon ikuk adi yabapnit ala kutifyeenj indinj yoguk,

34 “Jesu Nasaletniņ, du maņņonj tinimbe buņņ? Du nihitubu-kadaka be tibe buņņ? Du Bepaņ’walaaniņ me uņņoniņ u agaņ nadigamulat.”

35 Unduņ tobune Jesudi yabap indiņ nintoguk, “Kabup! Mede wabiņa me adi’walaņ welen maaneņniņ labubuņa weņ.” Unduņ nimbune yabapdi me u folofigita nemu miņa hogok tukulune maņ halune labubuņa uguk.

36 Kaņ metam uņņonj ikinj adi boho tiņa nehi uņņonj indiņ yonadiginj, “Mede i dediniņņonj hinek yoņak? Me ya yabap heki mede saņiniņnit hinek yenimbu mede nadiiņ.”

37 Jesu adi unduņ tubune gigitņiņdi yokwet wapum magimagi u tuwot udapmaguk.

*Jesudi Saimon yapmaņ tam eņ meeniņ yagithinit noli yehitubu-kedebaguk
(Matiyu 8:14-17; Mak 1:29-34)*

38 Unduņ tiņa Jesu adi bopyot biņa fowoņ Saimon yolineņ uguk. Saimon yapmaņ tam adi yagit tiņa foloņ kudup daune hakuk. Kaņ Jesu nimbune

39 foņ Saimon yapmaņ deihakukneņ yali yagit u niņkulune Saimon yapmaņ kedebaņ pilali nanaņe noņņonj nanaņdok yoņa tiulidokoguk.

40 Mele fohebiune metam nohiye yagithinit yanagila Jesu’walaņ buune kohonj foloohik folonj kameeņ yehitubu-kedebaguk.

41 Tiņa yabap heki maņ yehikeleune mehinek welehiķ maaneņniņ fobuņa woņ yakawe toņa “Du Bepaņ Mihinj” niņņiņ. Tiņa yabap heki

Jesu adi Kilsto agan nadigin, doktiņa undun mu yodok yoņa Jesudi yenihep tubune ugin.

Jesu adi yokwetkwet wanaņ yaunņa Mede Momoon yohautaguk

(Mak 1:35-39)

⁴² Helehelede Jesudi yot biņa foon woon kwet mehinek mokit gineņ uguk. Kaņ helehautaune metam adi foon lohigin, lohina tubumintaan yokwet u mu bibindok ningin.

⁴³ Nimbune yeninguk, “Nu Bepaņ’walaņ Hatihati Unģonindok Mede Momoon yoyo yokwet noli gineņ maan tibit, tiņa Bepaņ adi wondegoņ napmeu bugut.”

⁴⁴ Undun yoņa Judiya kwetneņ yaunņa Judahi’walaņ bopyotneņ foyaunila Mede Momoon yohauta yauguk.

5

Jesu medeņiņ nadiņa pisi fee moņgokiņ

(Matiyu 4:18-22; Mak 1:16-20)

¹ Heleniņ Jesu adi Genesalet imenģwan magineņ yatune metam feedi Bepaņ’walaņ mede nadinim yoņa Jesu yakukneņ bugin.

² Metam fee woon bopneune kwet kili tuguk kaņ muwage lufom labu imenģwan magineņ yakumuk kaņ me pisi kaliņ tigiņ adi umbenhik youtet tulu

³ Jesu adi muwage niņ foloņ loguk. Muwage u Saimon’walaņ ala looņ ilaņa nimbune kabemuniniņ siloneune imenģwan gineņ uguk. Kaņ Jesu adi unģoņ ila Mede Momoon yeniyeniņ tuguk.

4 Mede Momoon yenindapmaan Saimon ninguk, “Hidi muwagehik-kabe siloneune uyeu umbenhik kotigon kiyapmaan kanen.”

5 Undun ninguk kan Saimondibo yoguk, “Bombongi, indi timin kwanaimin wondegon tinja foloon nemu kamun ingon du yolan doktinja umben kedem kiyapmaan kawit.”

6 Undun yonja umben kapmaune ime ginen foguk kan pisi mohok gibitan fotokoune umben dokodegon tuguk.

7 Kan me nohiye muwage noli folon hakin u kohowai kuyembune bunja yehitubu-lodaan pisi mongo boiune muwage lufomnikon tokoon ime maanen fofondegon hinek tugumuk.

8 Kan Saimon Pitadi u kan Jesu heben folon mulelem timinjan ninguk, “Wapum, nu me kadakaninjit ale binabunja wen.”

9 Saimon tinja me nolinje adi pisi gibita mongokin u kan boho tigin.

10 Kan Saimon nolinjat Jems dut Jon, adi maan kan boho tugumuk. Meyat u Sebedi mihinjat. Undun tigin kan Saimon ninguk, “Munta mu tiben, kamin tububihila hatitalowaan adi metam mongomongot kwanai tuluwaan.”

11 Undun yenimbu muwagehik yehihamane labu kin folon boinja bombonhik ungon biyabunja Jesu keleen ugin.

*Jesudi me wede hakinit tubukedebaguk
(Matiyu 8:1-4; Mak 1:40-45)*

12 Jesu adi yokwet wapum nin ginen hakuk. Unon me nin wede hakinit itouluguk. Ala Jesu kan kwetfolon maan hali ninguk, “Me wapum, da

nadilaŋ, nehitubu-lodawe kaŋ kedem nehitubu-kedebaweŋ.”

¹³ Unduŋ nimbune Jesudi kaŋ kohon kihiwali honeeŋ niŋguk, “Kedem nadigamulat ale walandaweŋ.” Unduŋ nimbune nai uŋaniŋgoŋ me u kedebaguk.

¹⁴ Kedebaune Jesudi indin niheguk, “Metam mu yenimbihilaŋ. Silonyot dinin talitimen’walaŋ didimeŋgoŋ weŋ kaŋ gabunadiwek. Kaŋ metamdi gabaŋa agaŋ kedebaŋaŋ unduŋ gabunadineŋdok wooŋ koom Mosesdi yoguk unduŋ Bepaŋdok kale dumuŋ hemundumunduŋe timimbeŋ.”

¹⁵ Unduŋ niheguk iŋgoŋ Jesu’walaŋ gigitŋinŋdi kwetkwet u hautadapmaune metam feedi buŋa medeŋin nadiune yagit mebimebihinit yehitubu-kedebaŋ

¹⁶ metam biyabuŋa kwet fileŋ wooŋ ninadi kwanai maanŋ tuluguk.

Jesudi me nin kayon kohon kumuhi tubukedebaguk

(Matiyu 9:1-8; Mak 2:1-12)

¹⁷ Helenin Jesu adi Mede Momoon yoyo tulune Falisi tinŋa Yodoko Mede hinale Galili, Judiya, tinŋa Jelusalemhi adi buŋa ila nadigin. Kaŋ yagithinit yehitubu-kedebadok Wapum’walaŋ saŋinin u Jesu dut hakuk.

¹⁸ Kaŋ me noli adi me nin kayon kohon kumuhi falik folon kameeŋ nagila bugin. Buŋa yot maaneŋ foon Jesu hebeŋ folon kamenim yo tigin

¹⁹ iŋgoŋ metam fee doktinŋa baŋam nemu hakuk kaŋ beemiŋa yot folonin login. Loonŋ ginanŋ

kitomuŋa gulup ginen unduŋon halu kapmaune foguk. Fooŋ metam baŋamhik ginen Jesu heben folon hinek fooŋ hakuk.

²⁰ Kaŋ Jesudi nadisukilitihik kanadiŋa niŋguk, “Notne, kadakaninŋe agaŋ tumolokutat.”

²¹ Unduŋ nimbune Falisi me eŋ Yodoko Mede hinale heki adi nadinadihik ginen indin nadigin, “Me i dediningon doktiŋa sigin tinjaloon Bepaŋ’walaŋ kwelikon tilak. Kadakanin bibin adi Bepaŋdi hogok tilak.”

²² Unduŋ yonadigin kaŋ Jesu adi nadisuhik agaŋ kaŋ yeninguk, “Hidi nadisu undihi maŋgonde tiin?”

²³ Mede lonŋon dedin yodok, kadakaninŋe tumolokutat, be pilali wen?

²⁴ Unduŋ yoin doktiŋa Me Kobumuŋ nu kwet-folon inon kadakanin bibindok sanininne hatnamulak u tibe kanen.”

Unduŋ yeniŋa me kayon kohon kumuhi u niŋguk, “Nu ganilat, pilali gulupge moŋgola yokede wen.”

²⁵ Unduŋ nimbune nai unaningon me u pilali gulupnin moŋgola Bepaŋ niutumbaan yolide mauguk.

²⁶ Uune metam adi u kaŋ boho tinj muntaan Bepaŋ niutumbaan yogin, “Kamin nemek ungonin hinek kayam.”

*Jesudi Lewi kahileen adi keledok nihamaneguk
(Matiyu 9:9-13; Mak 2:13-17)*

²⁷ Unduŋ tinj Jesu adi wooŋ takis moŋgomongot me nin wou Lewi adi kwanai yotneŋ itune kaŋ niŋguk, “Nehikelewen.”

28 Unduņ ninguk kaņ Lewi adi pilali nemene-mek biyabuņa Jesu keleguk.

29 Tiņa Lewi adi Jesudok yoņa yolineņ hinaņ wapum tuguk kaņ takis moņgomōņgot me fee tiņa metam noli wanaņ wooņ nagiņ.

30 Nanaņe ila nalune Falisi tiņa Yodoko Mede hinale noli adi Jesu mihiniņe indiņ yeninadigiņ, “Hidi detiņa me takis muneēņ moņgomōņgot me heki tiņa me kadakaniņ titiņ dut nanaņe noņgoņ nain?”

31 Unduņ yonadigiņ kaņ Jesudibo yeniņguk, “Haguwo me adi metam kedehi mu yehitubu-lodalak. Adi metam yagithinit yehitubu-lodalak.

32 Unduņgoņ nu maan me fofohi lolonhinit yehitubu-lodadok mu bugut. Nu adi me kadakaniņ titiņ yehitubu-lodawe bugut.”

Jesudi nanaņe kameheņa ninadi titiņ diniņ mede yoguk

(Matiyu 9:14-17; Mak 2:18-22)

33 Metam nolidi Jesu indiņ ninadigiņ, “Jon Imeyout Tububihit mihiniņe tiņa Falisi heki mihihiye adi nanaņe kamehep tiņa map hali ninadi kwanai tiiņ, kaņ du mihigeje adi nanaņe ime maņgoņde nain?”

34 Unduņ ninadigiņ kaņ Jesudibo yeniņguk, “Hidi dediņ nadiiņ, me kohokukut titiņdok adi hinamuni gineņ uņgoņ halune me nanaņe nanadifodok buneņ adi nanaņe kamehep kedembe tineņ? U tuwot moņ.

35 Ingoņ nai niņ me wapumhik yolom nagilune nai uņaniņ adigili kedem nanaņe kameheņa map hatineņ.”

³⁶ Unduŋ yeniŋa tomboyoula yoyout mede indin yeninguk, “Nebek niŋdi haule kobut dobuŋa dahidahi bumuŋ foloŋ mu kamegaliŋa tibinelak. Unduŋ tubune dahidahi kobuli u tubukadakafit tibek. Tiŋa komi be kobuli adi undihiyakiŋgoŋ moŋ. Unduŋ doktiŋa tuwot mu tibek.

³⁷ Be nebek niŋdi wain ime gitipmuŋ tutumbaŋ kale gitnemdi ime tout tibineyagiŋ uŋolok komi gineŋ tuwot mu ugolowek. Unduŋ tibek adi wain ime kobulidi tout komi tubutawaŋ kwatne tibek.

³⁸ Ale unduŋ mu titiŋdok, tobo wain ime kobuli adi tout kobuli gineŋ hogok ugolodok.

³⁹ Kaŋ nebek niŋ wain ime komi nahatilak adi wain ime kobuli nakaŋ indin yobek, “Wain ime kobuli adi kobaŋ moŋ.’ ”

6

Jesudi Falisi heki Sabat dinin mede tubu-udaneen yeninguk

(Matiyu 12:1-8; Mak 2:23-28)

¹ Sabat foloŋ Jesu adi mihinjiye dut wit fiye gineŋ talik ugiŋ. Uŋila mihinjiyedi wit foloŋ wootitiila fagihina kaipmuŋ nagiŋ.

² Kaŋ Falisi heki adi yabune tuwot mu tubune yenintonŋa indin yeningin, “Yodoko Medenikdi Sabat foloŋ kwanai mu titiŋdok yolak kaŋ hidi maŋgoŋde unduŋ tiin?”

³ Unduŋ yobune Jesudibo yeninguk, “Hidi Dewit tiŋa menjiyedi map nadinŋa tigiŋ u mube kunali nadinŋ?”

⁴ Dewit adi woon Bepañ'walañ Silonyotnen foon Bepañdok belet ungoniñ yonã kamegiñ u tiña naañ meniye yembune nagiñ. Kañ Yodoko Medenikdi unduñ mu titiñdok yonit, adi Silonyot diniñ talitimenñdi hogok nanañdok yonit.”

⁵ Tiña tomboyoula indin yeninguk, “Unduñ doktiña Me Kobumuñ adi Sabat maañ kadokolak.”

Jesudi Sabat foloñ me niñ kohon kumuñ tubukedebaguk

(Matiyu 12:9-14; Mak 3:1-6)

⁶ Sabat noli foloñ Jesu adi Judahi'walañ bopyotnen foon Mede Momoon yoyo tuguk kañ me niñ kohon didimeniñ kumuñ tuguk adi ungon ikuk.

⁷ Kañ Falisi tiña Yodoko Mede hinale heki adi Jesudi Sabat foloñ nebek nenobu tubukedebaune kañ mede gineñ kameñdok yonã yamañgon ila kakuwakiñ.

⁸ Kañ Jesu adi nadinadihik u kanadiña me kohon kadakanin u ninguk, “Pilali ingon laben.” Unduñ ninguk kañ me u pilali yakuk

⁹ kañ metam yeninguk, “Nu yonadi niñ tibit. Yodoko Medenikdi Sabat foloñ dedin titiñdok yolak? Meeniñ yehitubu-lodadok be yehitubukadakadok yolak? Be meeniñ hatihatihik tomboyouyemdok be yehitubu-kadakayemdok yolak?”

¹⁰ Unduñ yonã metam unon ikin yabudapmaan me kohon kumuñ ninguk, “Kohoge kihiwalen.” Nimbune kohon kihiwalune utumbahinakaguk.

¹¹ Kañ Falisi heki adi kwihitañgon hinek nadiña Jesu dedin timindok u nehi ungon yonadigiñ.

*Jesudi mihinjiye 12 yehikahileen yehidaneguk
(Matiyu 10:1-4; Mak 3:13-19)*

¹² Nai unanin Jesu adi kweboboe nin folon loon timin Bepan ninadi kwanai hogok ha-timilune heleguk.

¹³ Kan hanin metam Jesu keleyagin yenimbu buja bopneune me 12 yehidaneen wohik Aposel yeninguk.

¹⁴ Me yehidane tuguk wohik indin: Saimon (wou noli Pita), agan kwayan Endulu, Jems, Jon, Filip, agan Batolomi

¹⁵ Matiyu, Tomas, agan Jems Alifiya mihinin, agan Saimon Selot,

¹⁶ en Judas Jems mihinin, tinja Judas Kaliotnin, adi kougon hatigene Jesu memik kohohik folon kameguk.

*Jesu'wala sanininjindi metam fee yehitubu-
kedebaguk
(Matiyu 4:23-25)*

¹⁷ Jesu adi undun tinja mihinjiye dut kwet gutunej foon metamjiye fee gut hatilune metam Judiyahi, Jelusalemhi, tinja ime gagayen Taiya dut Saidonhi

¹⁸ adi Jesu medenin nadiune yagit mebimebi-hinit yehitubu-kedebadok yona bugin.

Jesudi metam yabaphinit yehitubu-kedebaguk

¹⁹ tinja sanininjindi metam hogohogok yehitubu-kedebaguk doktinja metam feegon nehi wehemila kedebadok gigne tigin.

*Jesudi metam fofonhinit mede yeningkiliti tinja
mute mede yeninguk
(Matiyu 5:1-12)*

20 Jesudi metam yabuŋa indinŋ yoguk,

“Metam nai indinde fiyewakahi hatiinŋ, hidi Bepanŋi kahanŋ tihamulak. Hatihati Unŋoninŋ adi’walaŋ hebenŋ ginenŋ hatak u hiditok gigit, wendoktiŋa hiditok adi nadiwene utumba tilak.

21 “Metam nai indinde map tiinŋ, hidi Bepanŋi kahanŋ tihambune kougoŋ natoki tineenŋ. Wendoktiŋa hiditok adi nadiwene utumba tilak.

“Metam nai indinde kobulabulaye tiinŋ, hidi Bepanŋi kahanŋ tihambune kougoŋ nadi-foonŋ gege tineenŋ. Wendoktiŋa hiditok adi nadiwene utumba tilak.

22 “Hidi Me Kobumuŋ’walaŋ mede tilolonŋ tubune me nolidi habukwihitaanŋ hehikelekuŋ tiŋa hanimpekit tineenŋ wendok nadibedi mu tineenŋ. Bepanŋi kahanŋ tihambaak doktiŋa habunadiwene utumba tilak.

23 “Metam nemek undihi tihamneenŋ wondok nadibedi mu tineenŋ. Hidi kougoŋ kibikonŋ kunum ginenŋ monŋotneenŋ wondok nadifoŋ tineenŋ. Me undunŋ tiinŋ heki adi koom papahiyedi polofet hekidok undugoŋ tiyemaginŋ.”

24 Undunŋ yonŋa mute mede indinŋ yoguk, “Me muneenŋ bombonŋhinit hidi hatihati kulemanŋ aganŋ hatiinŋ doktiŋa habunadiwe tuwot mu tilak.

25 Me kobuk nai indidegoŋ natoki tiinŋ hidi kougoŋ map tineenŋ doktiŋa habunadiwe tuwot mu tilak. Me gegeham tiinŋ hidi malabumuŋ wapum hinek tubumintaanŋ kobulabulaye tineenŋ doktiŋa habunadiwe tuwot mu tilak.

26 “Me metamdi haniutumba tiin hidi habunadiwe tuwot mu tilak. Koom papahiyedi polofet yalayalan hekidok undugon hinek tiyemagin. Undun dokti nadinadinale hatineen.”

*Jesudi memikniye welenikdi yabukahileen
menot tiyemdok yoguk
(Matiyu 5:38-48; 7:12)*

27 “Metam medene nadiin hidi indin hani-lat. Memikhiye yabukahileen menit tiyemaneen, tinja me habukwihita tiin maan undugon momoon tiyemaneen.

28 Me mede kadakanin haniin u not tiyemaneen tinja me momoon mu tihamiin aditok Bepan nadiyaneen.

29 Nebek nin fauge folon ulune kan fam-bekener kotigon fauge fukunin maan mimbune utuwaak. Be nebek nin dahidahi wahinin golom tubune kan dahidahi hinek* maan kwihimiluwaan.

30 Metam neendi nemek nin dok ganimbune u kedem miluwaan, tinja nebek nin di nemek du'wala golom beune kan koti gamdok mu niluwaan.

31 Metam nolidi titin dedinin tihamdok nadiin, undugon hinek hidi maan aditok tiyemaneen.

32 “Hidi metam kibi momoon tihamiin aditok hogok kibibo momoon nobu tiyemina kahan deti mongotnen? Me kadakaninhinit adi undugon metam nolidi nadiyemiin u kibimaan undugon tiyemiin.

* **6:29:** Dahidahi wahinin u saketdok yolak. En dahidahi hinek adi sinjilis wendok yolak.

³³ Tiŋa hidi metam momooŋ tihamiinŋ hekidok hogok kibimaanŋ momooŋ tiyemiŋa kahaŋ deti moŋgotneŋ? Metam kadakaninŋ titinŋ adi undugoŋ tiinŋ.

³⁴ Tiŋa hidi nemek ninŋ metam yembune kotigoŋ hamdok nadiŋa yemiinŋ aditok hogok yemiŋa kahaŋ detiŋa moŋgokaneenŋ? Me kadakaninŋhinit adi maanŋ nemek me nolidok yemiŋa undihigoŋ moŋgotdok nadiinŋ.

³⁵ “Unduŋ adi mu taneenŋ, hidi adi memikhiyedok nadiyemiŋa momooŋ tiyemiŋa nemek yemaneenŋ u toboninŋ moŋgotdok mu nadiyaneenŋ, kibikoŋ adi kougoŋ moŋgotneenŋ, tiŋa Bepaŋ Loloŋnit’walaŋ wapmihi tineenŋ. Tiŋa metam noli mu nadimiinŋ be metam kadakahi u maanŋ momooŋ tiyemulak.

³⁶ Unduŋ doktiŋa hidi Behikdi welekulema hatilak undugoŋ hidi maanŋ metam welehikdi hinek yabukahileenŋ welekulema tiyemaneenŋ.”

*Welekulemanit hatiŋa yom bibinŋ taneenŋ
(Matiyu 7:1-5)*

³⁷ “Hidi metam yomhikdok kibikoŋ tiyemdok mede mu yodapmayaneenŋ kaŋ Bepaŋdibo kibi hide’walaŋ yomhikdok kibikoŋ tihamdok mede mu yodapmawaak. Tiŋa undugoŋ hidi meeniŋ yomhinit yenisilone mu tiyaneenŋ kaŋ Bepaŋdi maanŋ undugoŋ hide mu hanisilonewaak. Unduŋ doktiŋa hidi me noli’walaŋ kadakaninŋhik biyembune kedem Bepaŋdi hidi’walaŋ kadakaninŋhik maanŋ bihamuluwaak.

³⁸ “Tiŋa hidi metam noli nemenemek yemaneenŋ kaŋ Bepaŋdi kibibo hamuluwaak. Ingoŋ

hidi metam nolidok dediningon yemaneen kan Bepañ adi u kan kabe-kalakapmeen wapumgon hamuluwaak.”

³⁹ Undun yeniña yoyout mede indin yeninguk, “Me nin dawi sipmakan adi nolinin tuwot mu nagila talik nindidimeen udemek. Undun tiña woon adi ham gineñ nongon mademek.

⁴⁰ Be pepayot wapmihi ninđi hinalenin kalakapme mu tilak, ingon pepayot wapmihi adi pepayothik fodapmaan mindañ hinale dut nongonongon tiin.

⁴¹ “Du mangonde noke dawi gineñ figifigi kan da’walañ dauge gineñ kwet muñ wapum foon ihelak u mu kadakalelañ?

⁴² Kwet muñ wapum dauge gineñ ihelune noke indin detiña nimben: ‘Notne nadiune figifigi dauge gineñ ihelak u tukulit.’ Yalañ-me du! Da’walañ dauge gineñ kwet muñ wapum itak u timen tukułaña diwedakaleen kedem noke’walañ dawi gineñ figifigi u kan tukulimimben.”

Bem dediningon yetiin adi foloon undiningon mintalak

(Matiyu 7:17-20; 12:34-35)

⁴³ “Bem fofoon folon mindipmun hogoli mu mintain, be bem hogoli folon mindipmun fofoon mu mintain.

⁴⁴ Bem hogohogok kiliki mintain u agañ nadiyam. Hidi bim u naso folon mu youyapmain, be kopi u haut folon mu tomiin.†

⁴⁵ Undun doktiña me momoon adi welen gineñ nemek momoon hatak u miñgon yobihatak, en

† **6:44:** Jesudi bem kilik fofoon yendok wain en fik yoguk.

me hogoli adi welen maanen nemek hogoli hatak u minjon yobihiletik. Nemenemek welehek maanen ikinj u folon mahikdi en namandahik folon yobihikiin.”

Yot mamanj dininj mede
(Matiyu 7:24-27)

⁴⁶ “Wapumne, Wapumne naniin, hidi manjonde nu nemek titindok hanilat u mu tiinj?

⁴⁷ Metam hogohogok nu’walañkade buña medene nadiña kelenj tiinj adi yadi indih.

⁴⁸ Me ninj adi yot ninj maguk, yot mawe kwet wenetafoon yot taka kawade folon wenedaguk. U yot fafañen maguk doktiña ime gabunj wapum buña yot folon youkingineen uguk injonj yot wali-wali mu tuguk.

⁴⁹ “Kañ me medene nadikabeleen mu kelenj tiinj adi indih. Me ninj adi yot kinj folon maguk, kañ ime gabunj wapum buña yot folon youkingineune yot u maan golomunumunuke tuguk. Me medene nadiña mu kelenj tiinj adi undih kuyonj.”

7

Jesudi mikme heki’walañ talitimenj dininj
tipilapilaye-meniñ tubukedebaguk
(Matiyu 8:5-13)

¹ Jesu adi metam mede undun yenindapmaan Kafanaumde uguk.

² Unonj mikme’walañ talitimenj wapum ninj hatiluguk ala adi tipilapilaye-meniñ momoonj hinek timiluguk adi yagit kisanj tiña kumundegonj tuguk.

³ Kañ adi Jesu buguk u nadiña Judahi me wapuhidi woon Jesu nimbune buña tipilapilaye mihiniñ tubukedebadok yeninguk.

⁴ Kañ Judahi me wapuhi adi woon Jesu baigon hinek indin ninadigin, “Me u fofoon doktiña tubuloda hinek tibeñ nadiyam.

⁵ Adi adi Judahi indi welenđi nibukahileen bopyot niñ maninguk.”

⁶ Unduñ niña nagila nongon ugin woon yot tubudulaune mikme’walañ talitimenđi mede indin kameu uguk, “Wapum, nu me lolonit bale nu yotneneñ beñ?

⁷ Tiña nu aindiniñ doktiña mu woon gabuñat, ale hogok ungon hali mede hogok yoben kañ tipilapilaye-mene kedem kedebawek.

⁸ Nu na maan me wapum diniñ falipmen hatilatdi mikme unen yenimbe wiin, be bunen yenimbe biin, be tipilapilaye-meneye nemek u tinen yenimbe tiin doktiña ganilat.”

⁹ Unduñ nimbu Jesudi mede u nadiña boho tiña metam keletaugin indin yeninguk, “Nu nadisukiliti indiniñ nemu kagut, Isilae kwetneñ maan nemu kagut.”

¹⁰ Unduñ yobune me mede nai tiña bugin u udaneñ yopman woon kaune tipilapilaye-me agañ kedebañ hakuk.

Jesudi tam kahat niñ’walañ mihiniñ kumuñ gineniñ tubukaikaguk

¹¹ Muniniñ hatigene Jesu yokwet wapum niñ wou Nain unon uguk. Kañ mihiniye tiña metam bop wapum nongon keletiña ugin.

¹² Woon yokwet wapum'walaŋ yeme ginen wosuwalune me dabaŋ niŋ wenene bem bugiŋ. Me kumuŋ tuguk u tam kaŋ niŋ'walaŋ mihi, tam kaŋ u mihiŋiŋ kubugoŋ-kabe uŋakoŋ dok-tiŋa metam fee nonŋoŋ bugiŋ.

¹³ Kaŋ Jesudi tam kaŋ u kaŋ bulaningŋoŋ hinek nadimiŋa niŋguk, "Makat mu koleŋ."

¹⁴ Unduŋ niŋa woon bogit honeune me bogit bem ugiŋ adi uŋgoŋ yaŋiŋ kaŋ yoguk, "Mekuya, nu ganilat ale pilat."

¹⁵ Unduŋ nimbune me dabaŋ u pilali ila mede yoguk, kaŋ Jesudi miŋ dut kotigoŋ hatidok niŋguk.

¹⁶ Unduŋ tubune metam hogohogok adi munta tiŋa Bepaŋ niŋa tiloloŋ tiŋa yogiŋ, "Polofet wapum adi kamiŋ indi'walaŋ iŋoŋ mintalak, Bepaŋ adi mehinekŋiye yehitubu-lodawe buguk."

¹⁷ Unduŋ tubu gigitŋiŋdi kwetkwet hautaguk.

*Jesu dut Jon'walaŋ mede
(Matiyu 11:2-19)*

¹⁸ Kaŋ Jon mihiŋiye adi woon nemenemek mintaguk u nimbu nadiŋa

¹⁹ meyat lufom yenimbu buune indiŋ yeniŋguk, "Woon Wapum indiŋ ninadidemek, 'Du Jondi me bubuŋdok yoguk ukube, be nolidok woomuyaneem?' "

²⁰ Unduŋ yenimbu ugumuk woon Jesu hakukneŋ wosuwaan niŋgumuk, "Indi Jon Imeyout Tububihitdi mede indiŋ ganinadidim yoŋa ninimbu bumut, 'Du me adi niniŋguk ukube, be nolidok woomuyaneem?' "

21 Unduŋ buŋa nimbune nai uŋaŋiŋgoŋ Jesudi metam yagit mebimebihinit be yabaphinit be dauhik sipmakahi yehitubu-kedebaŋ meyat indiŋ yeniŋguk,

22 “Hidi udaneŋ udemek. Wooŋ nemenemek mintaune kanadi tamuk u Jon nimbune nadiwek. Me dauhik sipmakahidi dauhik diwetom tiŋ, kayohik kadakahidi talik yawiŋ, wede hakihinitdi walandaiŋ, be magihik kaulehidi mede nadiŋ, kumuŋ tigiŋ koti kaikaiŋ, agaŋ fiye-wakahi Mede Momooŋ nadiŋ.

23 Me nediyeŋ nu’walaŋ titiŋne kaŋ nadikadaka mu tilak adi Bepaŋdi kaune utumba tilak.”

24 Jon mihiniyat udaneŋ ulune Jesudi metam Jondok indiŋ yeniŋguk, “Hidi Jon kane kwet fiileŋ ugiŋ u maŋgoŋ kane ugiŋ? Hidi baniŋgip sububadi fedilu uŋambuŋat tilak ube kane ugiŋ?

25 Be me tinahukut kinonom tilak undiniŋbe kane ugiŋ? Me tinahukut undihi tinahukukiŋ tiŋa momooŋ hatiŋ adi mapme yohineŋ hogok hatiŋ.

26 “Be polofet niŋ kane ugiŋ? Indiŋ hanimbe nadineŋ. Hidi me wooŋ kagiŋ adi yadi polofet noli yalakapme tilak, tiŋa adi yadi me uŋgoŋ hinek.

27 Jondegoŋ Bepaŋ’walaŋ Mededi indiŋ yolak, ‘Nu kwanai-mene kamewe timeŋ wooŋ talik dobui tigambaak.’ ”

28 Unduŋ yoŋa tomboyoula indiŋ yeniŋguk, “Indiŋ hanilat, metam hogohogok kwetfoloŋ mintagiŋ nebek niŋdi Jon mu kalakapmeŋ lolak, iŋgoŋ nebek Bepaŋ’walaŋ heben foloŋ Hatihati

Kobuli ginenj fofonit-kabe hatilakdi Jon kalakap-meenj lolonit tilak.”

²⁹ (Me takis mongomongot taginj tija metam hogohogok, koom Jondi Imeyout tiyemguk adi Jesu'walañ mede nadiña yoginj, “Bepañ'walañ mede talii u didimeninj hinek.”)

³⁰ Ingonj Yodoko Mede hinale tija Falisi heki adi Jondi Imeyout mu tinimbek yoginj doktiña Bepañ'walañ hebet aditok gigit tuguk u keleket tiginj.)

³¹ Kañ Jesudi indinj yoguk, “Metam kobuhi i mangonj dininj tuwolit kamekaan yenimbit?

³² Adi yadi wapmihidok tuwolit. Wapmihi adi yowawaliwenj bopnej halija nohiyedok indinj yeniinj, ‘Indi kap momoonj togumun injonj nadifo mu tiginj, be kap bulaninjonj togumun injonj makat mu kokinj.’

³³ Jon Imeyout Tububihit ne adi buña nanaje kamehep tija ime fafañeniñ mañ mu naguk kañ ‘Me yabapnit’ ninjinj.

³⁴ Kañ Me Kobumunj adi buña nanaje ime naune kañ indinj yoinj ‘Me i nanaje molo tija ime fafañeniñ nananj tilak doktiña me takis muneenj mongomongot enj me kadakahi'walañ nohik.’

³⁵ “Hidi undunj hati yoinj, injonj metam Bepañ'walañinj nadinadi mongokiinj adi Bepañ'walañ nadinadi wendok nadiune foloonj hinek tilak undunj tubudakaleniñinj.”

Tam ninj Jesu kayonj folonj haguwo mundunjitdi yougominguk

³⁶ Tebele Jesu Falisi me ninji nanaje adut nanandok ninjuk doktiña adi yolininj ugumuk.

37 Kañ yokwet uñon tam niñ hatihatiniñ kadakanin hinek ala Jesu Falisi yolinen hatak nadiña ime mundun momoon toutniñ kawadedi tigin u tiña uguk.

38 Woon Jesu sigin ginen yali makat kolu dawi meeniñdi Jesu kayon folon maan youtelu ki hapmunñdi kayon tumolon sinjonjome tiña ime mundun momoonñdi yougomguk.

39 Kañ me Falisi Jesu nagi uguk adi indin nadiña yakaguk. “Me i polofet biyagon nobu kañ tam wehemit tilak i hatihatiniñ kadakanin u kedem kañ nadiluwek.”

40 Undun ila nadiguk kañ Jesudi ninguk, “Saimon, nu mede-kabe niñ ganimbit.”

Undun nimbu Saimondibo yoguk, “Hinale, nemek u kedem nanimben.”

41 Undun nimbune Jesudibo indin ninguk, “Meyat lufom adi me niñ muneen kibi kougon tubu-udanemiñdok yoña nimbu yemguk. Me noli 500 kina miñguk agañ noli 50 kina miñguk.

42 Kañ meyatdi muneen kibikon mu tubu-udanemiñgumuk doktiña fiit wabi tuguk. Kañ meyat adi’walaanin neenñdi bombonjgidok nadimimbune lolon hinek tuguk?”

43 Undun nimbu Saimondi yoguk, “Me kadakaninñin wapum bimiñgukdi.”

Undun yobune Jesudi yoguk, “U biyagon.”

44 Undun yoña udaneen tam u kañ Saimon ninadiguk, “Tam i maan be kañan? Du yokeneñ bunat kañ kayone youtetdok ime nemu namuñan, kañ tam i dawi meeniñdi kayone youtela ki hapmunñdi tumolonak.

⁴⁵ Du yokeneŋ bene nehisingogome mu tiŋaŋ, inŋoŋ tam i adi busuwa tiŋat uŋaniŋ kayone sinŋoŋgome tiŋak u mu wabiŋak.

⁴⁶ Du kine foloŋ wel nemu yougomnamuŋaŋ inŋoŋ adi yadi haguwo munduŋ momooŋdi kayone yougomnamuŋak.

⁴⁷ Unduŋ doktiŋa indinŋ ganilat, adi welenŋi nabukahile hinek tilak wondoktiŋa kadakaninŋinŋ hogohogok agaŋ dapmalak. Inŋoŋ nebek ninŋ kadakaninŋinŋ kuyaniŋoŋ bimilat adi yadi welenŋi kuyaniŋoŋ nabukahilelak.”

⁴⁸ Unduŋ yoŋa kotigoŋ tam u niŋguk, “Kadakaninŋe agaŋ tumolokutat.”

⁴⁹ Unduŋ tubu me noli uŋoŋ ila kaginŋ adi nehi uŋoŋ indinŋ yonadiginŋ, “Me i dedininŋ doktiŋa kadakaninŋ tumolo-tumolo tilak.”

⁵⁰ Kaŋ Jesudi tam u niŋguk, “Nadisukilitigedi kadakaninŋ gineninŋ ganagila gehitubu-lodalak ale kulemaŋgoŋ wooŋ hatibaaŋ.”

8

Jesudi kwanai tiyaulune kayoŋbopŋiye adi maŋ nonŋoŋ takaliŋa yauginŋ

¹ Munininŋ hatigene Jesu yokwet indigoŋ yauna Bepaŋ'walaŋ Hatihati Kobuli dininŋ Mede Momooŋ yohautayauguk. Kaŋ mihinŋiye 12 nonŋoŋ yauginŋ,

² tiŋa tam noli yabaphinit eŋ yagithinit koom yehitubu-kedebaguk adi maŋ nonŋoŋ yehikeletauginŋ.

³ Tam indinŋdi yehikeleginŋ: Susana, eŋ Maliya Madalaninŋ (tam u Jesudi yabap 7

yehikeleminguk) tiŋa Yoana (yohoi wou Susa adi Helot'walaŋ yot kadokoluguk.) Adi tiŋa tam noli muneen bombonhinit adi Jesu tiŋa mihinjiye yemtoi tiyauginj.

Jesudi yoyout mede sayoli kilik folonj kamekaanj yoguk

(Matiyu 13:1-9; Mak 4:1-9)

⁴ Tiŋa metam unjaninj unjaninj buŋa bop wapum tubune Jesudi yoyout mede nin indinj yeninguk.

⁵ “I nadinej. Me dinina molo ninj adi nemek yeuli yetibe monjola uguk. Monjo woonj sayoli kilik kukam undunj kukuk. Kulune noli talipmenj maginj kanj metamdi yaliune bagi hekidi buŋa kunatnaginj.

⁶ Noli kwet kawade ginenj maanjan kadoginj injonj ime monj doktiŋa kumunj tiginj.

⁷ Kanj noli hanginep maanenjan maanjan labuginj injonj hanginepdi hefulaginj.

⁸ Noli kwet galikit folonj maginj adi kedem labuŋa foloonj fee duhuginj. Tiŋa yeti tiginj dininj kunakunat u kalakapmeenjan 100, 100 undunjan mintaginj.”

Undunjan yenija indinj yodapmaguk, “Nebek ninj adi nadidakalewe kanj magi baigonjan kametnadinjan nadiwek.”

Jesu mihinjiyedi yoyout mede mebidok ninadiginj
(Matiyu 13:10-17; Mak 4:10-12)

⁹ Undunjan yenimbu Jesu mihinjiye adi yoyout mede mebidok ninadiginjan kanj yeninguk,

10 “Bepañ’walañ heben foloñ Hatihati Kobuli dinin mede hebinin hatak u Bepañdi agañ hanim-bihitak, kañ mehinek noli adi yoyout mede foloñ kamekaan yenilat ala

‘Adi kanim yo kain inoñ tuwot mu kadakalein, en nadinim yoña nadin inoñ tuwot mu nadidakalein.’ ”

*Jesudi yoyout mede dinin mebi yeninguk
(Matiyu 13:18-23; Mak 4:13-20)*

11 Unduñ yoña tomboyoula indin yeninguk, “Yoyout mede yoñat wendinin mebi indin. Sayoli kilik u adi Bepañ’walañ mede.

12 Ala kiliki talipmen kulune maune bagi hekidi nagin u adi metam noli Mede Momoon nadin inoñ me kadakanin di buña welehi ginen yolom mongotak. Metam Mede Momoon nadin nadisukiliti tubune Bepañdi yanagilaakneñ yoña unduñ tilak.

13 “Kañ kawade ginen kulune magin adi metam noli mede nadin nadigalika tiñ inoñ welehi maaneñ mu folak, ala tikamanda be malabumun mintayembune pilap gweheyein.

14 “Kañ noli hañginep ginen kulune magin adi metam noli Mede Momoon nadin hatinila hatihikdok nadibedi tiñ be muneñ bombondok nadigigine tiñ, be kwetfoloñ nemenemekdok siloda wapum tiñ doktin Mede Momoon nadin u foloonit mokit tilak.

15 “Kañ noli kwet fofoon ginen kulune magin adi metam momohi Mede Momoon nadin welehi kahileñ hatin foloon tubumintain.”

Kaman galiņa kufulahebi mu tiin
(Mak 4:21-25)

¹⁶ Unduņ yeniņa noli indin joguk, “Nebek ninđi kaman galiņa kufula mu tilak. Tobo galiņa foloniņoņ kameune metamdi hauta kaņ yot maaneņ foiņ.

¹⁷ Biyagoņ kuyoņ, nemek kabup hatak u hakene nainiņde miņoņ mintawaak, eņ nemek yawe tigiņ u fiyatanakiyeune miņoņ mintawaak.

¹⁸ “Unduņ doktiņa nadinadiņale hatiyaneen. Nebek niņ adi nemek miņgiņ u boiņa hatibune kaņ tomboyouli-mimbaak, eņ nebek niņ nemek miņgiņ u mu kame hatiņa netok nadiune nemek hatnamulak nabugoņ nadiwaak adi yadi nemek-kabe halimilak u lomtubune hogok hatiluwaak.”

Jesu'walaņ miņ kwayaņiye
(Matiyu 12:46-50; Mak 3:31-35)

¹⁹ Jesu miņ kwayaņiye adi Jesu kane bugiņ iņgoņ mehinek fee doktiņa fakaņ yakiņ.

²⁰ Kaņ me niņdi Jesu niņguk, “Maanđe kwayageye mede ganine fakaņ woomgamiin.”

²¹ Unduņ nimbune Jesudibo yeniņguk, “Nu maane kwayaneyeye adi metam Bepaņ'walaņ mede nadiņa tagimnein heki uņak.”

Sububa dut imenđwanđi Jesu'walaņ medeņiņ tagimnegumuk
(Matiyu 8:23-27; Mak 4:35-41)

²² Heleniņ Jesu muwage foloņ looņ mihiniye imenđwan fokolok lonim yeniņguk kaņ ila ugiņ.

²³ Ila woon Jesu damo deikuk kan fifingobut tiña ime giyondaan buña muwage maanen foon yehitubu-fambekenewe tuguk.

²⁴ Kan mihinje adi Jesu talamsukuleen indin ninjin, “Wapum, Wapum, indi aganj ime ginen wopmabutne tam!”

Undun nimbune Jesu adi sukuleen pilali sububa dut ime yenihep tubune kulemagumuk.

²⁵ Kan mihinje yeninguk, “Hidi nadisukilitihik de?”

Undun yeninguk kan adi boho tiña muntaan nehi unjon indin yonadigin, “Me i dedinin doktiña sububa dut imedi medenin nadiyahuk.”

*Jesudi me yabapnit tubukedebaguk
(Matiyu 8:28-34; Mak 5:1-20)*

²⁶ Woon Galili ime menenja Gelasa wosuwaan

²⁷ Jesu adi tatakula kin folon foune me nin yabapnitdi buña kaguk. Me u tinahukutnit mokit hambiyek hatiluguk. Tiña yopman mu itouña meyotnen hogok itouluguk.

²⁸ Ala Jesudi yabap ninjulune me u kan yakawe kadakanin tonja heben folon maan hali kutifiyeen indin nimbulabulayeguk, “Jesu, Bepan Lolonit Mihinjin, du manjon tinambe bulan? Du folofigita kisanjon mu namben ganilat.”

²⁹ Me u yabap welen maanen hakin di ningigineune hatigiyongiyonda tiña hatiluguk doktiña nai fee tawa fafajenin di (sendi) kayon kohon tehiña yot fafajenin nen kameyagin injon tawa fafajenin tubudokoon labu yabap hekidi ningigineen nagilune kwet fiilen yauluguk.

³⁰ Ala Jesudi ninguk, “Du wohoge neen?”

Unduñ nimbune, yabap feedi fomiñgiñ doktiña indin yoguk, “Nu wotnene ‘Me Mohok.’”

³¹ Unduñ niñguk kañ yabap heki adi yeniñkulune hamdok gigit mu titiñdok yonña mede kwanai tigiñ.

³² Tiña kweboboe hapmenen ungoñ makaye mohok heyemagiñ ala yabap heki adi yeniñkulune woon makaye welehiñ maanen fofonok yonña Jesu nimbulabulayeen ninadigiñ.

³³ Unduñ ninadigiñ kañ yabap heki yeniñkulune woon makaye heki welehiñ maanen foune makaye heki kigoñkula woon maham ginen tatakula ime ginen foon ime naañ nadilali kumuñgiñ.

³⁴ Unduñ tubune me makaye yabudoko tagiñ adi nemek mintaguk u kañ momo woon kahat yokwet wapumnen en diniyeti tiña ikagiñnen yohautagiñ.

³⁵ Kañ metamdi nemek mintaguk u kane ugiñ. Woon Jesu yakuknen kaune me yabapnit hatiluguk u yabap heki bikabugiñ kañ tinahukut tiña nadinadiñgiñ dakaleune ilu kañ munta tigiñ.

³⁶ Tiña mehinek noli kakan tigiñ adi dedin tiña kedebaguk u me noli yenimbune nadigiñ.

³⁷ Unduñ tiña Gelasahi adi munta kisañ hinek tigiñ doktiña Jesudi kwet u biña uuñdok niñgiñ, kañ muwage foloñ looñ une tigiñ.

³⁸ Kañ me yabapnit hatiluguk adi Jesu indin niñguk, “Nu kedem be dukut wit?”

Niñguk kañ Jesudi moñ niña indin niñguk,

39 “Yopmanḁe udaneen woon Bepanḁi kudi unḁonin hinek tigamunak wendok kahat tiyemben.”

Undun nimbune me u udaneen woon Jesudi nemek timinḁuk u metam hogohogok yenimbune nadigin.

*Nadisukilitihik doktiḁa Jesudi yehitubulodaguk
(Matiyu 9:18-26; Mak 5:21-43)*

40 Jesu imenḁwan fokolok loune metam woom tigin doktiḁa ninadifo tigin.

41-42 Kan Judahi'walaḁ bopyot dinin me wapum nin wou Jailas adi wosuwaan Jesu kan kayon folon maan hali waabinin kubuḁon hinek guletin 12 aḁan kumumbe tubune yolineḁ unḁok baigon hinek ninadiguk.

Kan Jesu talipmen ulune metam feedi kutumula keletaugin.

43 Tiḁa tam nin muyakip yagit tomboyoutnit ti hatibune gulet 12 tuguk adi wanaḁ unḁon uguk. Adi haguwo-me heki'walaḁ woon muneenjin aḁan kudapmaguk inḁon mu kedebaguk.

44 Ala adi metam banamhik gineḁ unḁon woon Jesu sigineḁ dahidahinin diki wehemila kedebaguk.

45 Kan Jesudi yoguk, “Nu neenḁi nohonelak?”

Undun yobune metam hogohogok adi moḁ yugin kan Pitadi ninḁuk, “Wapum, du metam bop wapum indinin gehikelein mube yabulaḁ.”

46 Undun ninḁuk inḁon Jesu adi gigne tiḁa yoguk, “Nebek nohoneune sanininne fofoye-tobune nadilat.”

47 Unduᅇ yobune tam adi agañ nehitudu-
mintalak yoᅇa heheleen buᅇa Jesu kayoᅇ foloᅇ
maañ hali metam namandahik foloᅇ maᅇoᅇde
honeeᅇ pilap hinek kedebaguk u nimbune
nadiguk.

48 Unduᅇ yobune Jesudi niᅇguk, “Waabine,
nadisukilitigedi gehitudu-kedebalak ale kule-
maᅇoᅇ weᅇ.”

49 Jesu adi unduᅇ yayolune me niᅇ Jailas
yolineᅇkade mede tiᅇa buguk buᅇa Jailas in-
diᅇ niᅇguk, “Waabige agañ kumulak ale hinale
nimbu uᅇoᅇ mu wek.”

50 Unduᅇ nimbune Jesudi nadiᅇa Jailas indiᅇ
niᅇguk, “Du munta mu tibeᅇ. Nadisukiliti hogok
tibeᅇ kaᅇ kedem kedebawek.”

51 Unduᅇ niᅇa agañ Jailas yolineᅇ wosuwaan
yot maaneᅇ me fee mu fofoᅇdok yoᅇa Pita, Jon,
Jems agañ Jailas malam hogok yanagila fogiᅇ.

52 Kaᅇ metam yot maaneᅇ hakiᅇ adi waabi ku-
muᅇ tuguk wondoktiᅇa matkunum ha-tigiᅇ. Ha-
tulune Jesudi foonᅇ yeniᅇguk, “Waabi i kumuᅇ mu
tiᅇak ale makat wabineᅇ, adi damo deihatak.”

53 Unduᅇ yenimbune metam uᅇoᅇ hakiᅇ adi
waabi u agañ kumuᅇguk doktiᅇa Jesudi mede
yoguk u nadihanindaañ gege tigiᅇ.

54 Kaᅇ Jesudi waabi u kohoᅇ foloᅇ honeeᅇ
niᅇguk, “Waabi, pilat!”

55 Unduᅇ nimbune waabi u nai uᅇaᅇniᅇoᅇ
munabuliᅇiᅇ udaneune pilali ikuk, kaᅇ Jesudi
nanaᅇ neeᅇ mimbu nawek yeniᅇguk.

⁵⁶ Unduŋ tubune Jailas malam adi kaŋ boho tugumuk kaŋ Jesudi nemek u mintaguk u nebek nemu nimbihitemek yeniŋguk.

9

Jesudi mihinjiye 12 kwanai-mede yeniŋguk (Matiyu 10:5-15; Mak 6:7-13)

¹ Jesudi mihinjiye 12 yenimbu wooŋ bopneŋiŋ kaŋ yabap yehikelekutdok eŋ yagit mebimebi yehitubu-kedebadok saŋiniŋ yemguk.

² Yemuŋa Bepaŋ'walaŋ heben gineŋ hati-hati uŋgoniŋdok Mede Momooŋ eŋ yagithinit yehitubu-kedebadok yauneŋ yoŋa

³ indiŋ yeniŋa yeniŋkukuk, “Talik unene nemek nemu moŋgo uneŋ. Tothik be lihik be nanaŋe be muneŋ be dahidahi noli mu moŋgola uneŋ.

⁴ Yokwet wapum gineŋ uune haniutumbaaŋ hanagila yot hapmeyaneeneŋ uŋgoŋ itawooŋ kwanai tubudapmaaŋ pilali yawaneŋ.

⁵ Be yokwet niŋ gineŋ uune metam mu haniutumbaaŋ medehik mu nadiŋa tubune kaŋ yokwet u biŋa kayohik foloŋ figifigi uŋgoŋ metam namandahik foloŋ ulumamaŋeune foune yawaneŋ. U metam'walaŋ mebihik nadidakaledok nadiŋa mute uŋakoŋ tiyembune kayaneŋ.”

⁶ Unduŋ yenimbu mihinjiye adi yokwet indigoŋ yaŋa Mede Momooŋ yoyo tiŋa metam yehitubu-kedebayaugiŋ.

⁷ Kaŋ Galilihi'walaŋ me mapme Helot adi nemenemek u mintaune metamdi mede fee yobune nadigiyonŋiyone tuguk. Metam nolidi

indin yoyagin, “Me ya Jon Imeyout Tububihit kotigon kumuḡ ginenin kaikaan pilakuk.”

⁸ Unduḡ yogin kaḡ noliyen Ilaija kotigon mintaguk yolu noliyen polofet komi kumuḡ ginenin kaikaan pilakuk yogin.

⁹ Kaḡ Helotdi yoguk, “Jon kodi agan udokogut kaḡ i me nedigon’walaḡ gigitnḡ nadilat.” Unduḡ yonḡ Jesu kakanḡdok kwanaiminḡ hinek tuguk.

*Jesudi meenin 5 tausen nanane yemtoiguk
(Matiyu 14:13-21; Mak 6:30-44; Jon 6:1-14)*

¹⁰ Aposel heki kwanaide yeninḡkulu uḡinḡdi kwanaḡ tubudapmaanḡ udaneenḡ buḡa nemene-mek tiginḡ hogohogok u Jesu nimbu nadiguk. Nimbu nadinḡa mihinḡiye yanagila nehi hogok Besaidade uḡinḡ.

¹¹ Kaḡ metamdi u nadinḡa yehikeletauginḡ kaḡ Jesudi yeninadifo tinḡa Bepan’walaḡ Hatihati Kobulidok yeninḡa metam yagithinit noli yehitubukedebaguk.

¹² Unduḡ ha-tulu mele folune mihinḡiyedi woonḡ ninḡinḡ, “I kwet fiilenḡ ale metam aganḡ yeninḡkulune yokwet ginenḡ be diniyeti tinḡa ikinḡnenḡ woonḡ yot, nanane, ime yehitubu-mintanenḡ.”

¹³ Unduḡ yoginḡ kaḡ Jesudi yeninḡguk, “Hidi hide nemek nananḡdok neenḡ yembu nanenḡ.”

Unduḡ yoguk kaḡ mewoidibo yoginḡ, “Indi adi belet yawe kohofukunḡ enḡ pisi lufom hogok boihakam. Tinḡa indi metam fee yendok nanane deti tuwanim.”

¹⁴ (Mewoi hogok kunakunathik 5 tausen).

15 Unduŋ yogiŋ kaŋ Jesudi yeniŋguk, “Metam yehidaneu 50-di bop niŋ, 50-di bop niŋ tiŋa itneŋ.”

16 Unduŋ yenimbune mihiniye u tubudapmaune belet yawe kohofukuŋ eŋ pisi lufomuk u moŋgola dadiyeen kunum foloŋ diween Bepaŋ niutumbaŋ metam daneyemdok yoŋa wobuŋa mihiniye yembune daneen yemtaugiŋ.

17 Kaŋ metam hogohogok naaŋ tuwot tubune mihiniyedi nadikidiki u bondibondi 12 kadahitokogiŋ.

*Pitadi Jesu'walaŋ mebi yobihikuk
(Matiyu 16:13-28; Mak 8:27-9:1)*

18 Heleniŋ Jesu adi mihiniye dut hatiŋa ne hogok ninadi kwanai tuguk. Tiŋa mihiniye indin yeninadiguk, “Metamdi nutok dedin naniin?”

19 Kaŋ adibo niŋgiŋ, “Nolidi Jon Imeyout Tububihit yoiŋ eŋ nolidi Ilaija yoiŋ, eŋ nolidi Jelemaiya yoiŋ, kaŋ nolidi polofet komi niŋ kaikaŋ pilakuk yoiŋ.”

20 Unduŋ yobune nehibo yeninadiguk, “Kaŋ hidi hide nutok dedin naniin?”

Unduŋ yeninadiune Pitadi yoguk, “Du Bepaŋ'walaŋ Kilisto, kwetfoloŋ metamdok Tubuloda-me kameune bubundok yofafaŋeguk uŋakoŋ.”

21 Unduŋ yobune Jesudi mede i nebek nemu yenimbihitdok hinek yoŋa yenihep tiŋa indin yeniŋguk,

22 “Silonyot diniŋ talitimen wapum heki eŋ Yodoko Mede hinale heki tiŋa Judahi'walaŋ me wapuhi noli adi Me Kobumuŋ medeniŋ mu

nadiña folofigita wapum miña ulukumuneen, ingon helebufa lufomkultitniñ dapmaune kotigon kumun gineniñ kaikaan pilalaak.”

²³ Unduñ yoña metam wanañ yenimbu buña bopneune tomboyoula indin yeninguk, “Nebek niñdi nu nehikelewe nadiña ne’walañ welen diniñ nadinadi be sigiñ diniñ nadinadi wabidapmaan helemahelman kolondabekñiñ bemña nu nehikeleluwaak.

²⁴ “Biyagon hinek hanimbe nadinen. Nebek niñdi hatihatiñiñ netok kahilewaak adi fiit timimbaak. Be nebek niñdi nutok tiña hatihatiñiñ bikabaak adi hatihati foloon kahilewaak.

²⁵ Me niñ kwetfolon diniñ bombondok nadigalika tiña welen kuyaniñdok mu nadiña, be Bepañ sigilulum timiña hatiña woon hatihati foloon hinek deti kahilewaak. U tuwot moñ hinek.

²⁶ En nebek niñ kobuk nai indidegon na be medene indi sigilulum tinimbaak adi nu maan udaneen aņelo uņgoniñ hekidut kunum naman-dap saņiniñ uņgoniñnit buneemneñ, me be tam u sigilulum timimbat.

²⁷ Biyagon hinek hanilat. Metam i ikiñ noli kumun mu tiña hogok hatiña Bepañ’walañ Hatihati Kobuli mintadakaleune kaneen.”

Jesu adi folonamandap ne’walañ miņgon tubu-mintaguk

(Matiyu 17:1-8; Mak 9:2-8)

²⁸ Mede unduñ yeniña hatibune Sonda kubugon dapmaune Jesudi Pita, Jon, agañ Jems yanagiła ninadi kwanai tine kweboboe folon logiñ.

29 Loon Bepañ ha-ninadilune Jesu namanda ungoniñ tiña tinahukutñiñ adi fafau niyaniyañ holiholiñenit hinek tuguk.

30 Unduñ tubune nai unaniñgoñ meyat lufom dut mede yonadi ya tigiñ.

31 Meyat u Moses dut Ilaija, adi kunum sañiniñ hautanit wanañ mintaan yakumuk. Mintaan yali Bepañdi yohebet timiñguk wondok tuwot Jesudi keletawoon Jelusalem unon tubudapmaan kwet i bikabaak wondok yonadi yatigiñ.

32 Kañ Pita tiña me noliñiyat adi damo deihakiñ ala pilali Jesu kunum diniñ holiholiñeniñ kañ meyat lufom adi maan Jesu dut nongoñ yalune yabugiñ.

33 Tiña meyat adi Jesu bikabuña uundok tubune Pitadi Jesu indin niñguk, “Wapum, kedem hinek indi maan iñgoñ hakam, ale yoholan lufomkulitniñ manim, noli dutok, noli Mosesdok agañ noli Ilaijadok.” (Mede u mu nadidakaleen hogok yofit tuguk.)

34 Mede yayolune mulukwanñdi buña yehitumune Jesu mihiniye adi munta tigiñ.

35 Munta tiña yanadilune mulukwan ginen mede niñ indin mintane nadigiñ, “Yadi na’walañ Mihine hinek, ale hidi adi’walañ medeniñ nadimiyaneeñ. Adi kwanai wendogon tubudakalegut.”

36 Mede unduñ nadiña kaune unon Jesu ne hogok yakuk. Kañ u kañ Pita heki adi nai unaniñ nemek u mintaguk u nebek nemu yeniñgiñ.

Jesu nadisukilitimiŋa yabap yeniŋkelektudok yeniŋguk

(Matiyu 17:14-23; Mak 9:14-32)

³⁷ Kweboboe foloŋ hakiŋ ala heleune fogiŋ kaŋ metam bop wapumdi Jesu buŋa kagiŋ.

³⁸ Kaŋ me niŋdi lekiŋgoŋhik gineŋ yali indin katiguk, “Hinale, i kaweŋ. Nu mihine i fiit tubulodaweŋ yo ganilat, nu mihine kubugoŋ-kabe uŋakoŋ.

³⁹ Ala yabap feŋ fomilak wendi fomimbune sukuleeŋ yakawe tolak, tiŋa kwetfoloŋ tukulune maŋ hali maŋiŋ faik tilak. Tiŋa yabapdi folofigita wapum hinek miŋa pilap mu bikabulak.

⁴⁰ Unduŋ doktiŋa mihigeyedi kelektunen yeniŋat kaŋ niŋkelekulinjit iŋgoŋ mu labu bu uŋak.”

⁴¹ Unduŋ yobune Jesudi indin yenintoguk, “Gweheye bilakenehi hidi, detiŋa nadisukilitihik kuyaniŋ kabe! Nai dedigoŋ hidut hatiŋa hanimbe nadisukilitineeŋ? Mihige u nagila iŋgoŋ bu!”

⁴² Mihi u nagi bulune yabapdi pilap hinek tukulune maŋ kwetfoloŋ hakuk. Kaŋ Jesudi yabap hogoli niŋkulune uune mihi u tubukedebaŋ koti beudok miŋguk.

⁴³ Unduŋ tubune metam hogohogok adi Bepaŋ’walaŋ saŋiniŋ u kaŋ boho tigiŋ. Metam adi Jesudi nemenemek tuguk u kaŋ boho tiŋa tulune adi mihiniye indin yeniŋguk,

⁴⁴ “Nemek niŋ hanimbit u kaule mu tineeŋ. Me Kobumuŋ adi kwetfoloŋ me’walaŋ kohohik foloŋ kameneeŋ.”

⁴⁵ Adi undun yenimbune mede wendiniᅇ mebi hebihat tuguk doktiᅇa mu nadidakaleᅇiᅇ. Undun tiᅇa mede wendok ninadineᅇ yo nadigiᅇiᅇ iᅇgoᅇ munta tiᅇa wabi tigiᅇ.

Jesu mihiniᅇe nehi'walaaniᅇ nediyeᅇ loloᅇnit hinek tilak yoᅇa kiloᅇkiloᅇ tigiᅇ
(*Matiyu 18:1-5; Mak 9:33-40*)

⁴⁶ Jesu mihiniᅇe adi'walaaniᅇ me nediyeᅇ loloᅇnit hinek tilak yoᅇa nehi uᅇgoᅇ siwenegiᅇ.

⁴⁷ Kaᅇ Jesudi maᅇgoᅇde siwenegiᅇ u agaᅇ nadiᅇa wapmihi-kabe niᅇ nagila buᅇa lekiᅇgoᅇhik foloᅇ kameune yalune indinᅇ yeniᅇguk,

⁴⁸ “Nebek niᅇ nu wotnene foloᅇ wapmihi indiniᅇ momooᅇ timiluwaak u nu tinamuluwaak, eᅇ nebek niᅇ nu momooᅇ tinamuluwaak u me napmeune bugut timiluwaak. Nebek niᅇ hidi'walaaniᅇ adi wougigitnit mokit eᅇ fofoᅇnit hinek adi yadi loloᅇnit hinek tilak.”

⁴⁹ Kaᅇ Jondi indinᅇ niᅇguk, “Hinale, indi me niᅇ du wohoge yoᅇa yabap yehikeleune kamun, iᅇgoᅇ adi indut tomboyoula du wanaᅇ mu gehekeleyaulak doktiᅇa moᅇ nihemun.”

⁵⁰ Undun yobune Jesudibo niᅇguk, “Moᅇ, mu nihedok. Nebek niᅇ mik mu tihamulak adi yadi hidi'walaᅇ nohik.”

Samaliyahidi Jesu eᅇ mihiniᅇe yot kameheyemgiᅇ

⁵¹ Jesu kotigoᅇ kunum gineᅇ udanedok naiᅇiᅇ dulaune Jelusalemde loloᅇdok nadikwambundanᅇ yoguk.

52 Unduņ yona me noli yenuņkulune timen ugiņ, wooņ Samaliyahi'walaņ yokwet niņ ginen nemenemek tiulidoko tine ugiņ.

53 Ingoņ uņahi adi Jelusalemde we yoguk dok-tiņa uņoņ mu uundok yona nihep tigiņ.

54 Unduņ tubune Jesu mihinijyat Jems dut Jondi u kaņ Jesu niņgumuk, "Wapum, du kedem yoben kaņ kunum gineniņ kudup yodene fooņ yehi-dadapmawek."

55 Unduņ yogumuk kaņ Jesudi udaneen unduņ mu titiņdok yona moņ yenintoņa

56 yokwet noli ginen une ugiņ.

Inde'walaņ titiņ u ulatifoņ Jesu didimeniņgoņ takalidok

(Matiyu 8:19-22)

57 Talipmen ulune me niņdi Jesu niņguk, "Nu du dambedambek waaņ kaņ wondok tuwot gehikeleyawaat."

58 Unduņ yobune Jesudibo niņguk, "Kamo moin heki adi kawade ginaneņ ikiņ eņ bagi heki adi yohineņ ikiņ ingoņ Me Kobumuņ adi deila hakula titiņdok kweli nemoņ."

59 Unduņ niņa me niņbo nehikeleweņ niņguk, ingoņ me u yoguk, "Wapum, nadiune timen wooņ batne wenefulaņa bit."

60 Unduņ yobune Jesudi niņguk, "Dabaņ u biune dabahi noliyedi wenefulanen. Eņ du adi wooņ Bepaņ'walaņ Hatihati Kobutdok gigit yohautawen."

61 Me niņdibo yoguk, "Wapum, nu kedem gehikelewit ingoņ timen wooņ wapmihi tamne, 'agaņ ulat' yeniņa bit."

62 Undun yobune Jesudi ninguk, “Me niñdi kwanai titawoon kotigon udaneen sigisigi diwelak undiniñdi Bepañ’walañ heben gineñ hatihati kobut diniñ kwanai titiñdok tuwot mon.”

10

Jesudi me nadisukilitinit 72 timen yapmeune yokwetkwet woon Hatihati Uñgoniñ diniñ mede yeniñgin

1 Undun tiña Jesudi me 72 yehidaneen me lufom lufom yeniñkulune yokwet indigon ugin. Ne kougon wene nadiña me timen yeniñkulune ugin.

2 Mede indin yeniña yeniñkukuk, “Nanaje mongotnadok fee kitain, ingon nanaje mongotnadok-medi lufomgon tilak. Undun doktiña hidi dinina Molom ninadiune kwanai-me noli maan yehitubu-mintaune kwanainiñ gineñ uñdok.

3 “Undun doktiña unen, nu dompa heki kamo moin gineñ wiin undun dabugon haniñkutata ala nadinadiñale unen.

4 Ale unene muneen, lik, en kayonnamokop adi mu mongotneen, tiña nebek niñ talipmen tubumintañ niutumba mu tineen.

5 Hogok woon yot niñ gineñ loon timen indin yoyaneen, ‘Kulema metam yot inon ikiin dut halek.’

6 Tiña yot wondok gineñ me kuleman itoune kan kulema mede u biune adut hatuwaak. En mon kan kotigon lomtaneen.

⁷ “Enj kwanai-me adi tuwahik mongotne tinjit doktiņa yot dan hapmeyaneeneņ ungoņ hali nanaje ime maņgoņ uņoņ hamaneeņ uņakoņ hogok naaņ hakaneeņ. Yot uņoņbo uņoņbo adi mu itneeņ.

⁸ Tiņa yokwet niņ gineņ uune haniutumbaar nemek hamaneeņ uņakoņ naaņ

⁹ yagithinit yehitubu-kedebaaņ metam indin yeniyaneeņ, ‘Bepaņ’walaņ Hatihati Kobuli agaņ hehitubu-dulalak.’

¹⁰ “Tiņa yokwet wapum niņ gineņ uune mu haniutumbaune kaņ talik kuyahikuyahi gineņ wooņ indin yeniyaneeņ,

¹¹ ‘Yokwet wapumhik’walaņ figifigi kayonik foloņ ikiin u hidetok ulumamaņe-kuhamam. Ingoņ Bepaņ’walaņ Hatihati Kobuli agaņ hehitubu-dulalak u kaule mu tineņ.’

¹² Nu hanimbe nadineņ. Bepaņ’walaņ nai wapum mintawaakneņ Bepaņdi yodapmaune malabumuņ metam yokwet uņahidok mintayembaak wendi malabumuņ Sodom gut Gomola mintayemguk u yalakapmeņ tibaak.”

*Kwanai me’walaņ mede nadilat yoņa Jesu eņ
Bepaņ ne’walaņ mede nadidok
(Matiyu 11:20-24)*

¹³ “Hidige, Kolasinhi tiņa Besaidahi, hidi’walaņ uņoņ kudi tugut u Saidon dut Taiya uņoņ tibe tugut binek metam uņahi adi kobulabulaye tiņa kadakaninņhik sigilulum tiyemne tigin.

¹⁴ Unduņ doktiņa kougoņ nai wapum foloņ hidi’walaņ malabumuņdi adi’walaņ yalakapme tibaak.

15 Tiña Kafanaumhi, hidi hidetok nadiune lolon tilak, ingon on, hidi adi hamdok gigit.”

16 Unduñ yona Jesudi mihinje indin yeninguk, “Nebek nin hidi’walañ mede nadiluwaak adi nu’walañ nadiluwaak, en nebek nin hidi mon haniluwaak adi nutok mon naniluwaak, tiña nutok mañ mon naniluwaak adi me napmeune fogut u mañ mon niluwaak.”

Jesudi me 72 wohiye hatihati pepa folon youlinjit wondok yenimbihikuk

17 Me 72 adi kotigon udaneen nadifo folon busuwaan yogin, “Wapum, indi yabap heki mañ du wohoge folon mede yenine nadinjit.”

18 Unduñ yogin kañ Jesudi yeninguk, “Nu Sadan kawene filimpit tilak dabugon tiña pilap hinek kunum ginenin diliteleen foguk.

19 Ale i nadineñ, nu mingembet mikhinit be mañgitalita folon yaliune mu hehisiin dok sañinin be me kadakanin dinin sañinin ulatifo-fondok sañinin mañ hamuñat. Tiña nemek nin di tuwot mu hehitubu-kadakuwaak.

20 Ingon yabap hekidi medehik nadinjit wondoktiña mon, hidi’walañ wohiye kunum ginen youlinjit hatak wondoktiña nadifo tinen.”

Meenin Jesu’walañkade kadiin adi Jesu ne’walañ mebi nadiin

(Matiyu 11:25-27; 13:16-17)

21 Nai unanin Jesu, Ungonin Munabuli’walañ welenadifodi fotokomimbune indin yoguk, “O Me Bañ, kunumkwet dinin Wapum, Du nemenemek i me nadinadinhinit be nadinadalehinit’walañkade kamehebi tugun.

Tiņa me nadinadihikdok nadiune wapmihidok tuwolit tilak aditok adi miņņon taņakiyeyembune kaiņ. O Me Baņ, da unduņ mintadok yokwambundaan nadifo tuguņ wondok tuwot mintalak doktiņa nadifo tiņa ganiutumbalat.

22 “Nu Batnedi nemenemek agaņ namdapmalak tiņa adi kubuņņdi nadinamulak. Nebek noli nemoņ. Kaņ nebek niņdi Me Baņ mu nadimilak, Mihidi hogok nadimilak. Tiņa me nediyen Mihidi yehidanelak adi hogok yenindakaleune nadidakaleiņ.”

23 Unduņ yeniņa Jesu udaneen mihiniyedok hogok indiņ yeniņguk, “Nediyen nemek hidi kaiņ u kanen adi Bepaņdi yabunadiune utumba tilak doktiņa kedem nadifo tinenņ.

24 Nu biyagoņ hanilat. Polofet fee tiņa Judahi’walaņ mapme fee adi nemek hidi kaiņ i kanim yoņa gigne tigiņ iņņoņ mu kagiņ. Tiņa nemek hidi kobuk nadiiņ u nadinim yoņa gigne tigiņ iņņoņ mu nadigiņ.”

Samaliyaniņ me niņdi memikniņ tubulodaguk

25 Yodoko Mede hinale niņ nadinadiņiņ wapum hinek adi pilali Jesu’walaņ nadinadi kameka kameka tibe indiņ ninadiguk, “Hinale, nu dedin tiņa Hatihati Fafaņeniņ kahilewaat?”

26 Unduņ niņņuk kaņ Jesudibo niņņuk, “Yodoko Mededi dedin yolak, kaņ du metam dedin yenindidimelaņ?”

27 Unduņ ninadiune yoguk, “Du Wapum Bepaņge welegedi be munabuligedi be saņiņņgedi be nadinadigedi aditok hogok

nadimindapmaluwaan. Tiña datok nadilan undugon hinek metam nolidok nadiyahemiluwaan.”

²⁸ Undun yobune Jesudi ninguk, “U biyagon hinek yolan ale undugon tiña kedem hatibaañ.”

²⁹ Undun yoguk kañ Yodoko Mede hinale adi nadimimbune me nadinadinit mokit tibaakneñ yona kotigon indin ninadiguk, “Nu notne neeñ?”

³⁰ Yoguk kañ Jesudi yoguk, “Helenin me nin adi Jelusalem binja Jelikode wene uguk. Kañ kubome hekidi woom yali honeen tinahukutnin kwihi lom mongodapmaan kisañgon ula utubukadaka hinek tigin. Tiña ungon bikabuna uune kumundegon hatuguk.

³¹ “Kañ Silonyot dinin talitimen nin di talik ungon woon kañ kakabele tiña talik fukunin kalakapmeen uguk.

³² Kañ Silonyot dinin tipilapilaye-me nin adi maan talik unakon woon kañ talik fukunin yakaan kalakapmeen uguk.

³³ “Kañ Samaliyanin me nin adi talik unakon woon me u kañ bulaningon kisañ nadinja

³⁴ haguwo mongo woon utubukadaka tigin folon hafiyeen ibiminja nagiloon donkinin folon kameen nagi woon yot tuwati ikiinnej kameen kadokoguk.

³⁵ Ala heleune weene me yot kadoko tulugkdok muneen minja indin ninguk, ‘Kadokoune kougon udaneen buna kotigon nemenemek tiban wondok gehituwawaat.’ ”

³⁶ Unduņ yoņa Jesudi indin yodapmaguk, “Du dedin nadilaņ, me lufomkulitniņ unjt adi’walaaniņ neeņdi me noliniņ hinek tiņak?”

³⁷ Unduņ ninadiune Yodoko Mede hinaledi yoguk, “Me woon tubuloda tiņak adi.”

Yoguk kaņ Jesudi indin niņguk, “Du maan woon unduņ hinek tuluwaan.”

Jesu adi nemek tuwolit nimilak

³⁸ Jesu tiņa mihiniye adi woon yokwet niņ ginen wosuwaune tam niņ wou Mata adi buņa Jesu eņ mihiniye yenihamaneņ yanagila yolineņ ugiņ.

³⁹ Kaņ uņoņ Mata deleņ niņ wou Maliya adi buņa Jesu heben foloņ ilaņa Jesu’walaņ mede nadinadi tuguk,

⁴⁰ kaņ Mata adi hinaņ be yot tiulidoko wondok nadibedi tiņa kwanai tuguk.

Unduņ tiņa buņa Jesu niņguk, “Wapum, du dalane binabune kwanai na hogok tibe kaune dedin tilak? Fit nimbune buņa nehitubulodawek.”

⁴¹ Unduņ niņguk kaņ Jesudibo yoguk, “Mata, Mata, du nemek fee wondok nadibedi tilaņ

⁴² iņgoņ nemek kubuņoņ hinek wondi foloņ tilak. Nemek foloņ hinek uyadi Maliyadi kahilelak u tuwot mu lomtidok.”

11

Jesudi mihiniye ninadi titiņdok talii yenin-didimeguk

(Matiyu 6:9-15; 7:7-11)

¹ Heleniņ Jesu adi kwet niņkade woon Bepaņ ninadi hatuguk. Tiņa tubudapmaune mihiniņ

ninđi indin ninjuk, “Wapum, du Jondi mihinjiye yenindidimeguk unduñ dubo indi ninadi titinđok ninindidimewen.”

² Unduñ yobune Jesudi yeninguk, “Ninadi tine kañ indin yoyaneen,

‘Me Bañ, du’walañ wocho ungonin hinek u ganin-tilolon tinene hatuwaak.

Unduñ doktiña du buña welenik tuwot en kwet tuwot Wapumnik tinimben.

³ Melenai tuwolit nanañenik nimiluwaan.

⁴ Indi me nolidi kadakanin tinimbune yomhik biyemne nibuña dubo indi’walañ yomnik tumolokut-nimiluwaan.

Tiña tikamanda ginen mu nipmewen.’ ”

⁵ Unduñ yonã indin yeninguk, “Nebek hidi’walaanin ninđi nolinin’walañ yolineñ timin lekingon woon indin nimbek, ‘Kedem be belet yawe lufomkulitnin namben ala kibibo tuwaan gambaat.

⁶ Me notne nin timin busuwalak, kañ nu nanañene mon doktiña buña ganilat.’

⁷ Unduñ yoben kañ noke wondi yot maanen ungon hali indin tuwot mu yobek, ‘Talik agañ tehekilitiña wapmihineye indi agañ deikam doktiña mu pilali gambit ale mede wapum mu toben.’

⁸ I nadinen, nolinin doktiña mu pilali gamdok nadiwek ingon fiit yogigine ha-tibaaknen yonã kedem pilali nemenemekdok yoben u gambek.

⁹⁻¹⁰ “Unduñ doktiña indin nadinen. Yonadi tiin adi foloon mongokiin doktiña hidi gigne tiña yonadiyaneen. Lohi tiin adi foloon tubumintain

doktiņa gagine tiņa lohiyaneņ. Yeme foloņ youtnadiņ adi yeme dilitomyemulak doktiņa giginēņ yeme youtnadiyaneņ.

11 “Nebek me wapmihihinit hidi mihihikdi pisidok hanimbu miņgembet kedem be mineņ?

12 Be pupup kilikdok hanimbu maņgitalita kedembe mineņ?

13 Hidi kadakanij titiņdi wapmihihiye nanane fofohi yemiņ iņgoņ oņ, Kunum Behik adi halakapme-dapmalakdi Uņgonij Munabulidok ninadi tubune kedem hamuluwaak.”

Jesudi yabap yehikeleune meeniņ nolidi niņkadakagiņ

(Matiyu 12:22-30; Mak 3:20-27)

14 Me niņ adi yabapdi fomimbune mede mu yoluguk ala Jesudi yabap u keleune me u mede yoguk. Kaņ metam adi kaņ boho tigiņ.

15 Iņgoņ nolidi yogiņ, “Me i yabap heki’walaņ wapumhik, Belisibudi tubulodaune yabap yeniņkelekuyaulak.”

16 Unduņ yogiņ kaņ metam noliyēņ indij niņgiņ, “Du Bepaņ’walaaniņ biyagoņ nobu fowēņ kaņ kudi neēņ tubune saņiniņge kanim.”

17 Iņgoņ Jesu adi nadinadihik u kanadiņa indij yēniņguk, “Kwet wapum niņ adi utawaaņ bop molomolom tiņa mindobuneņ kaņ kwet u pilap kadakawek. Be hekinolit niņ adi daneēņ molomolom hatiņa mindobu tubune lekiņgoņhik foloņ utawa utawa hali kadakawek.

18 “Hidi nu Belisibudi saņiniņ nambune yabap yehikelelat yoiņ, iņgoņ Sadaņ’walaņ mebopdi

utawaan bop lufom tiņa mindobu tubune adi'walaņ kwanai deti saņiniņnit halek?

¹⁹ Ale nu undugoņ nobu tilit kaņ me hidut hatiņ adi dedin tiņa yehikelein? Me hidut hatiņdi hidi yalaņ yoiņ u tubudakalelak.

²⁰ Nu Bepaņ'walaņ saņiniņņiņ gineņ nobu yabap heki yehikelelit kaņ hidi Bepaņ'walaņ hebeņ foloņ Hatihati Kobulidi agaņ hehitubudulalak u agaņ mintadakalelak.

²¹ “Me fafaņeniņ niņdi mik diniņ bombon tiulidokoņ yoli kadoko fafaņeņ tilakneņ u bombonņiņ kede m ilimiņ,

²² iņgoņ me niņ fafaņeņ hinek wondi bulakneņ me u ulaņa mik bombonņiņ moņgola nemek noli kubonelak u daneņ me noliņiye yemulak.

²³ “Nebek niņ nu menot mu tinamulak adi yadi mik tinamulak, be nebek niņ nu mu nehitubulodaņ kwanaine kadokolak adi yadi yehitubupuhene tilak.”

*Wele tubutakale tikaan Jesu mu bikabudok
(Matiyu 12:43-45)*

²⁴ Unduņ yoņa tomboyoula indin yeniņguk, “Yabap adi me niņ welen gineniņ labuņa wooņ kwet ime moņ gineņ kwet fiilen hakula titiņdok kwet lohitaalak. Lohitawooņ moņ lohikaan indin yolak, ‘Kotigoņ udaneņ yotnede wit.’

²⁵ “Unduņ yoņa kotigoņ udaneņ wooņ kalune yot yohomuņ tiņa tutumbanit u kalak.

²⁶ Tiņa kotigoņ wooņ yabap kadakahi hinek 7 nimaan yanagila buņa uņgoņ noņgoņ itowiiņ. Unduņ tubune me u koom yabap kubugoņdi

fomimbu hatiguk undinin u wabinja aganj kisanj hinek kadakalak.”

²⁷ Jesudi mede undun yobune tam ninj metam bop ginenj ungonj pilali indinj yoguk, “Tam gehitubu-mintaanj gabudokoonj nom gamguk adi Bepanjdi kaune utumba tilak.”

²⁸ Undun yoguk kanj Jesudibo indinj yoguk, “U kedem yolanj ala ninj indinj, metam Bepanj medeninj nadinja tagimneinj adi Bepanjdi yabunadiune utumba hinek tilak.”

Meeninj mohok Jesudi Bepanj'walanj kudi tubune kakanj dok yogigine tiginj

(Matiyu 12:38-42; 5:15; 6:22-23; Mak 8:12)

²⁹ Metam feedi bopneginj kanj tomboyoula indinj yeninguk, “Metam kobuhi hidi kadakaninj titinj digonj kunum gineninj kudi titinj dok naniinj. Ingonj kudi gitipmunj nemonj.

³⁰ Jonadi Niniwehidok kudi tiyemguk undun Me Kobumunj adi metam kobuhi kudi tiyembaak kanj kaneenj.

³¹ “Sebahi'walanj Tam Wapme lolonjit adi yolikweli binja pilali Mapme Solomondi mede nadisuja nadidakalenit yoguk u nadiwene uguk. Ale indinj hanimbe nadinej. Kobuk hebehik folonj yatak adi Solomon kalakapme tilak dok-tinja Bepanj'walanj nai wapum folonj Sebahi'walanj Tam Wapme adi pilali metam kobuhi hidi'walanj mebihik yobihilune kadakaninj hihik dininj kibikonj beneenj.

³² “Niniwehi adi Jonadi yenimbune kadakaninj hihik sigilulum timinj ginj. Enj kobuk yuku hidut yatak yonj adi Jonadok tuwot monj,

ala nai wapum foloŋ metam kobuhi hidi mede gineŋ hapmeneeŋ.

³³ “Nebek niŋdi kamaŋ galiŋa kamehebi mu tilak, tobo galiŋa foloniŋoŋ kameu ila hautaune metamdi hauta u kaŋ yopmaŋ foiŋ.

³⁴ Dauhik adi foloohik diniŋ hauta, ala dauhikdi kedem halune foloohikdi hauta gineŋ hatibetik eŋ dauhikdi sipmakaune foloohik adi mambip gineŋ hatibetik.

³⁵ Unduŋ doktiŋa hautahik welehiŋ gineŋ hatak u mambip tibaakneŋ doktiŋa nadinadiŋale hatiyaneeŋ.

³⁶ Tiŋa welehiŋ be sigihik gineŋ mambip nemu haletik adi foloohik wanaŋ hogok hautadap-mawetik. U kamaŋdi galiu hautagamulak un-diniŋ hautawetik.”

Bepaŋ'walaŋ mede adi manikdi hogok mu yodok

(Matiyu 23:1-36; Mak 12:38-40; Luk 20:45-47)

³⁷ Jesu adi mede yodapmaune Falisi niŋdi nanaŋe nonŋoŋ nanaŋdok yoŋa niŋa nagila ugu-muk. Woonŋ nanaŋe nanaŋdok ikumuk,

³⁸ ilaŋa Jesudi kohoŋ mu youtela ikuk kaŋ Falisidi kaŋ boho tubune niŋguk,

³⁹ “Falisi heki hidi adi maliŋ be ime utnaŋdok tout u sigihineŋ hogok youtewalandaiŋ, kaŋ maaneŋkade adi kadakanineŋ titiŋhikdi fotokoon hatak.

⁴⁰ Kaulehi hidi, Bepaŋ nemek sigiŋ tuguk-digoŋ maaneŋ mube tuguk?

⁴¹ Undun doktiņa nanaje ime maliņhik ginen ikiņ u fiywakahidok yembune welehik walandawek.

⁴² “Hidige! Falisi heki, habunadiwe tuwot mu tilak! Hidi adi nemenemek-kabe diniyetiņ u faki Bepandok kedem miņ, inģon hidi welehikdi Bepaņ mu kahileiņ, tiņa metam fiywakahi’walaņ malabumuņ mintalak u mu yehitubu-lodaņ tubudidimeiņ. Yodoko Mede yoņ adi biyabu mu titiņdok. Tiņa noli dibek feņ yehikeleiņ u maņ kedem yehikeleen titiņdok, inģon niņ takaliņa tiņa niņ mu bibiņdok.

⁴³ “Hidige! Falisi heki, habunadiwe tuwot mu tilak! Hidi adi bopyotneņ me wohiyenit’walaņ pop foloņ iitdok hogok nadiņ tiņa yowawaliwen haniutumbaņ habugikiņģon tihamdok nadiņ.

⁴⁴ Hidi adi bom kumuhi yehiweneņ fek mu tiņ kaņ metamdi sithik foloņ uņģon yaliņa yawiņ undihi. Undun doktiņa Bepaņ namanda foloņ nemek undihi wa geņģeņhinit.”

⁴⁵ Undun yobune me Yodoko Mede hinale niņdi niņģuk, “Hinale, du undun yoņa indi maņ niņiņtifo tilaņ.”

⁴⁶ Undun niņģuk kaņ Jesudibo yoguk, “Hidige! Yodoko Mede hinale heki, habunadiwe tuwot mu tilak! Hidi adi metam Yodoko Mede malabumuņ hinek yembune adi kwanaimiņ tiņ kaņ hidi yehitubu-lodadok kohohik mu kihiwakiņ.

⁴⁷ Hidi papahiyedi polofet hogohogok widi-hikumunģiņ kaņ hidi agaņ yabukiyondaņ sithik momoonģon tutumbaiņ.

48 Unduñ tiña papahiye'walañ kadakanij u kaune utumba tilak. Adi widihikumunñ tiginñ kanñ hidi sithik yabu-utumba tiinñ.

49 “Bepañdi u agañ nadidakaleenñ indinñ yoguk, ‘Nu polofet be aposel aditok yeninñkule uune noli widihikumuneenñ eñ noli widihi yehikele tineenñ.’

50 Unduñ doktiña polofet hogohogok kwet tububihikukneningonñ widihikumunñginñ wondok kibikonñ metam kobuhi hidi hekineenñ.

51 Tububihila Abel'walaaninñ labugelabuge Sakaliya Silonyot maanenñ alta eñ Yotmaanñ Uñgoninñ lekinñgonñhik folonñ ulukumunñginñ. Biyagonñ hinek hanilat. Metam kobuhi hidi, polofet kumunñginñ hogohogok adi'walañ nangathik dininñ kibikonñ hekineenñ.

52 “Hidige! Yodoko Mede hinale heki, habunadiwe tuwot mu tilak! Hidi metamdi Yodoko Mede nadidakaledok talik u yolomti tiinñ. Unduñ tiña hidi hide mu foinñ tiña metam nolidi fone nadinñ inñgonñ hidi kamehep tiyemiinñ.”

53 Jesu adi unduñ yonña yot u bikabuña ulune nai unñaningonñ Yodoko Mede hinale tiña Falisi heki adi tububihila mik timiña yonadi fee timimbune

54 manñgonñ mede fai ninñ yobune nadiña nagila mede ginenñ kamenñdok yonña kakuwali keleyawaginñ.

12

Nemek meeniñdi kabup tihebiyam u kougonñ minñgonñ mintadapmawaak

¹ Adi unduñ tulune metam fee hinekdi bopneñ kiyali tubune Jesudi timenñ mihiniye indinñ yeniñguk, “Hidi Falisi heki’walañ belet tububedidok haguwo gineñ foneeneñ ala nadinadiñale hatiyaneñ. Nu mede yolat adi meeniñdi yabunadiune utumbadok hogok nadiña yalañ tiñ wondok nadi hanilat.

² Biyagonñ hinek nadineñ, nemek tumut gineñ hatak u naininde miñgoñ mintadakalewaak, eñ nemek niñ kabup yonadiñ u naininde miñgoñ nadidapmaneñ.

³ Ala nemek niñ mambip gineñ yoiñ u miñgoñ hauta gineñ nadidok, tiña nemek niñ yot maaneñ mede hamahamap yonadiñ u naininde miñgilanñgoñ katihautaune nadidok.”

*Unñgoniñ Munabuli niñkadaka mu titiñdok
(Matiyu 10:19-20)*

⁴ “Notneye, hidi indinñ nadineñ. Hidi nebek niñ sigihik gitnem hogok tubukumunña mindañkade nemek niñ titiñdok sañiniñniñ baniñ tilak, aditok munta mu taneñ.

⁵ Hidi kañ munta timiñdok adi Bepañ hogok. Adi yadi kumumbune mindañkade ganiñkulu ham gineñ fofonñdok sañiniñniñ halimilak.

⁶ Bagi nandit-kabe 5 muneñ gimihilufomdi kedem tuwawetiñ. Inñgoñ bagi kuyahi-kabe undihi u Bepañdi kubugonñ-kabe niñ kaule mu timilak.

⁷ Be kinik hapmunñ yokunat dedigonñ u agañ nadidapmalak, doktiña munta mu taneñ. Hidi adi bagi nandit-kabe u yalakapme tiñ.

⁸ “Nu biyagonñ hinek hanimbe nadineñ. Nebek niñdi metam namandahik foloñ nu wotnene

miŋgoŋ yohautawaak adi yadi Me Kobumuŋdi Bepaŋ'walaŋ aŋeloŋiye namandahik gineŋ kibibo adi'walaŋ wou miŋgoŋ yohautawaak.

⁹ Eŋ nebek niŋ metam namandahik foloŋ wotnene yokamehebi tibaak adi Me Kobumuŋdi Bepaŋ'walaŋ aŋeloŋiye namandahik gineŋ kibibo mu nadimilat yobaak.

¹⁰ Tiŋa nebek niŋ Me Kobumuŋ niŋkadaka tibaak adi Bepaŋdi kadakaninŋinŋ kedem bimimbaak inŋoŋ nebek niŋ Uŋgoŋinŋ Munabuli niŋkadaka tibaak adi yadi kadakaninŋinŋ hogok kameu halaak.

¹¹⁻¹² Tiŋa undugoŋ mede gineŋ hapmeŋdok hanagila bopyotneŋbe, be mapme'walaŋbe, be me wapuhi noli'walaŋ uune munta tiŋa mede dedinŋ yeninim yoŋa nadibedi mu tineeŋ. Nai uŋaŋinŋoŋ Uŋgoŋinŋ Munabulidi mede dedinŋ yodok u adi hanimbune yenineeŋ.”

Muneŋ bombonŋdok siloda mu titinŋdok

¹³ Me niŋ metam bop wapum gineŋ pilali Jesu indinŋ ninadiguk, “Hinale, datne nimbune betnikdi bombonŋ boihatina kumuŋguk u ne hogok boihatilak ale daneŋ neeŋ nambek.”

¹⁴ Unduŋ yobune Jesudi indinŋ ninadiguk, “Nu kiyap be talitimeŋ neeŋdi napmeguk ale bombonŋhik danehambit?”

¹⁵ Unduŋ ninadina tomboyoula indinŋ yeniŋguk, “Me niŋ hatihati u bombonŋdi mu tubumintamimbu hatilak, be me muneŋ bombonŋnit adi maŋ undugoŋ, doktiŋa hidi nemenemek hidetok wapumgoŋ moŋgotneeneŋ ala nadinadinŋale hatiyaneŋ.”

¹⁶ Unduḡ yeniḡa yoyout mede indinḡ yeniḡuk. “Me bombonḡit ninḡ adi kweli wapum gineḡ tite yetibu foloonḡ wapuhi fee mintaginḡ.

¹⁷ Kaḡ weneeḡ yot danḡ boiwaat yonḡa nadibedi tuguk.

¹⁸ Tiḡa yoguk, ‘Wai komihi uyakulaḡa gitipmunḡ wapuhigonḡ maanḡ tite unḡonḡ weneboiwaat.

¹⁹ Unduḡ tiḡa “Nu nemenemek aganḡ tuwot hinek itnamiinḡ” yobaat. Tiḡa bombonḡ fofoonḡ gulet fee boi iitdok nadilat ale baigonḡ hatiḡa hinamuni tiḡa nananḡ ime naanḡ nadifo folonḡ hatiluwaat.’

²⁰ “Unduḡ yoguk inḡonḡ Bepanḡi indinḡ ninḡuk, ‘Du me kauleḡ, kamiḡ timinḡ kumuḡa bombonḡe boilanḡ u tuwot mu monḡolen.’ ”

²¹ Jesu adi unduḡ yonḡa indinḡ yeniḡuk, “Me muneeḡ bombonḡhik nehitok hogok duhuduhu wapum iyemdok tiyout tihatiinḡ adi yadi Bepanḡ’walaaninḡ bombonḡdok hambeep hatiinḡ.”

*Siginik ulihidok yonadibedi kisanḡ mu titinḡdok
(Matiyu 6:25-34; 6:19-21)*

²² Unduḡ yonḡa mihinḡiye indinḡ yeniḡuk, “Hidi nananḡ nakilitiḡa hatidok be foloohik tinahukut timindok wondok nadibedi mu taneeḡ.

²³ Hatihatidi nemek foloonḡ tilak, nananḡedi monḡ, be foloohikdi nemek foloonḡ tilak, tinahukutdi monḡ.

²⁴ Kalaḡkatak u yabuneḡ, adi nananḡ diniyeti mu tiinḡ eḡ nananḡ tiyout mu tiinḡ. Adi yadi Bepanḡi nananḡ yemtoi tubune naanḡ hatiinḡ. Hidi adi undihi monḡ. Hidi yadi momoonḡ hinek tihamulak.

25 “Hidi nadibedi tiŋa hatihatihik kedembe tomboyoutneen?

26 Hidi nemek kuyaniŋ-kabe i tuwot mu tineŋ doktiŋa nemek noli hogohogokdok nadibedi manŋonŋde tiŋ?

27 Wowonŋ giminiŋ behepenenŋ ikiŋ u yabunenŋ, adi dinina kwanai be tinahukut kaliŋ mu tiŋ, inŋonŋ adi Mapme Solomon’walaŋ tinahukut fofonŋ hinek tuluguk u kalakapmenŋ hinek tiŋ.

28 Wowonŋ giminiŋ adi kobuk mintaŋ halonŋ mele diweune daanŋ gweheyeenŋ golopmanŋ tiŋ adi Bepaŋdi tinahukut fofonŋ unduŋ tiyemulak. Unduŋonŋ hinek hidi maanŋ kedem tinahukuhamuluwaak. U kaŋ hidi deti nadisukiliti gilaŋgilaŋ tiŋ?

29 “Unduŋ doktiŋa helemahелеmanŋ manŋonŋ nanim yoŋa welemulap mu taneenŋ.

30 Unduŋ adi metam kwetkwet Bepaŋ mu nadisukilitimiŋdi wondegonŋ nadibedi hinek tiŋ, inŋonŋ hidi yadi Behikdi manŋomanŋonŋdok nadiŋ u agaŋ nadilak.

31 Unduŋ doktiŋa hidi Bepaŋ’walaŋ Hatihati Kobuli kahiledok gicine tubune nemenemek noli u kedem hamuluwaak.

32 “Mebop kuyaniŋ-kabe hidi, Behikdi Hatihati Kobuli hiditok tiulidokolak wendok nadifo tilak. Unduŋ doktiŋa hidi fafaŋe tiŋa hatiyaneenŋ.

33 Tiŋa bombonŋhik boiune metam nolidi buŋa tuwaune muneenŋ fiyewakahidok yemneenŋ. Unduŋ tineenŋ kaŋ muneenŋ bombonŋhik kunum ginenŋ ihamuneenŋ u kubome hekidi kubo mu tineenŋ be dindilakidi sitomsitom mu tineenŋ.

34 Kaŋ welehiŋ be nadisuhik adi bombonŋihik itneeneŋ unŋon halaak.”

Welenikdi damodamo mu titinŋdok

35 “Tiulidoko tiŋa kamaŋhik galiŋa woom hatiyaneeŋ,

36 tipilapilaye-me hekidi bombonŋihik kwet niŋkade uune woom hatiŋ unduŋ. Ala busuwaan yeme ulune pilap wooŋ dilitomiŋ undiniŋ.

37 Tipilapilaye me damo mu deila tiulidokooŋ welehiŋdi kaipmuŋ hatibune bombonŋihik buŋa yabulak adi nadifo tiŋ. Indiŋ nadineŋ, bombonŋihik adi udaneŋ buŋa undiniŋ yehitubumintawaak adi dahidahi wahiniŋ kwihina yenimbune buŋa bopneeŋ ilune nanaŋe nonŋon nanaŋdok yenimbaak.

38 Tipilapilaye me undihi adi welehiŋ kaipmuŋ hatilune timiŋ lekiŋon be helehelede busuwaan yabaak adi momooŋ hinek nadiwaak.

39 “Tiŋa indiŋ maŋ nadineŋ. Me niŋ adi kubome hekidi yoli ubulaginedok nai agaŋ binek nadilakneŋ damo tuwot mu deiletiŋak. Hogok damo kaipmuŋ halune me kubome hekidi yoli tuwot mu ubulagineŋ fonetiŋit.

40 Wendok tuwot, hidi maŋ unduŋon welehiŋ tiulidokooŋ hatiyaneeŋ. Me Kobumuŋ adi naininde hidi mu nadiŋa hogok hatifit tulune tobogoŋ busuwawaak. Unduŋ doktiŋa hidi tiulidokoniŋa hatiyaneeŋ.”

*Tipilapilaye mihi haŋindaŋ
(Matiyu 24:45-51)*

41 Unduᅇ yobune Pitadi indinᅇ ninguk, “Wapum, yoyout mede i inditok hogok be yonᅇn be metam hogohogok wanaᅇdok?”

42 Unduᅇ yobune Wapumdi ninguk, “Me nadinadinit, me momoonᅇ adi bombonᅇgidi me talitimenᅇ kameune tipilapilaye-me noli nanaᅇhik nai folonᅇonᅇ daneyemuluwaak.

43 Unduᅇ ti hatulune bombonᅇgi busuwaanᅇ kan aditok nadifo tibaak.

44 Nu biyagonᅇ hinek hanilat. Adi talitimenᅇ lolonᅇnit kameenᅇ nemenemeknᅇnᅇ noli maanᅇ yabudokodok nindapmawaak.

45 “Be me u kadokome hogoli hatinaᅇ indinᅇ yobek: ‘Me bombonᅇgine adi pilap mu baak ale.’ Unduᅇ yonᅇa tipilapilaye-metam noli widihinᅇa nanaᅇ naanᅇ ime fafanᅇnᅇ maanᅇ naanᅇ tibubuye hatibaak.

46 Unduᅇ tinᅇa me bombonᅇginᅇnᅇ tiyaugene bek u nadinadinit mokit hogok bubuyonᅇonᅇ hatilune bombonᅇgi busuwawaak. Buᅇa talitimenᅇ u ulanaᅇ dohipihipik tinᅇa tikulune metam nadisukilitinit mokitdi hatineenenᅇ unᅇonᅇ fowaak.

47 “Tipilapilaye me adi bombonᅇginᅇnᅇdi nemek titinᅇdok nilak u aganᅇ nadikabelᅇnᅇ tilak adi kibikonᅇ kwadi wapumdi wihitnadidok.

48 Kanᅇ tipilapilaye-me ninᅇ adi bombonᅇgidi nemek titinᅇdok yonᅇak u mu nadinᅇa hogok hali nemek mu titinᅇdok tinᅇak adi yadi kisanᅇonᅇ mu wihitnadidok. Metam Bepanᅇdi duhuduhu wapum yemulak adi kwanai gigne tinᅇa tubune Bepanᅇdi kaune tuwot tibek.”

*Jesu adi hauta tiŋa foguk
(Matiyu 10:34-36)*

⁴⁹ “Nu kwetfolon inon kudup hewe fogut doktiŋa kwanaine agan tububihile tilat,

⁵⁰ inonon timen folofigitadi Imeyout dabugon foloone folon buŋa lonambaak. Undun doktiŋa welemulap naditauyen kwanaine tubudapmawe u maan dapmawaak.

⁵¹ Tiŋa nu adi kwetfolon inon kulema tubumintadok mu fogut, nu adi metam yehiulitawawene fogut.

⁵² Undun doktiŋa kobuk nai indinde hekim-imbet bop kubugon di daneen lufom tobonin en lufomkulitnin tobonin tiŋa utawa-utawa tubumintaneen.

⁵³ Kan me yabet adi kikakwihita tidemeek, en waabi yamit adi maan kikakwihita tidemeek, en yanabunjit adi maan kikakwihita tidemeek.”

*Bepan'walaŋ mede dinin mebi didimeningon na-
didok*

(Matiyu 16:1-4; Mak 8:11-13; Matiyu 5:25-26)

⁵⁴ Undun yonon koti indin yoguk, “Hidi mulukwan mele fofon ginenkade galiune gwi utuwek yobune biyagon utak.

⁵⁵ Kan sububa gyaŋkade fedila buŋa suwonkade folak kan mele nai yobune meleyen yatak.

⁵⁶ Kaulehi hidi, gwi mele dinin nai u kedem yoin inon dedin doktiŋa nai yendinin mebi mu nadin?

⁵⁷ “Hidi mangonde titin fofohi denak en titin hogohi denak u mu yabudakalein?

⁵⁸ Tiña du nebek niñdi mede gineñ gapmewene ganagila uune hide hogok talipmenj unjila mede yotubudidime pilap tidemeek. Eñ moñ adi ganagila woonj me mede yodapmandapmanj'walañ uune adibo ganiñdapmaune kumondulum hekidi ganagila woonj yot fafañeniñneñ gapmeneeñ.

⁵⁹ Nu biyagonj ganilat, du uñonj hatinja hogok mu foonj baañ. Me noke'walañ kibikonj wobudapma-hinakaanj kedem foonj baañ.”

13

Welenik biyagonj tubutakalene Bepañdi yomnik tumolokutnimunja nibukahilelak

¹ Nai uñaniñ metam nolidi Jesu indinj nimbi-hikinj, “Galilihidi Bepañdok hemundumundune tulune Pailatdi widihikumunjuk.”

² Unduñ nimbu nadiña yeniñjuk, “Metam widihikumunjuk u Galilihi metam noli yalakapmenj tiña kadakaninj wapum tiginj be dedinj?

³ Moñ hinek, hanilat. Indinj nadineñ, hidi kadakaninjhik sigilulum mu tiyemneñ adi metam u kumunjinj undugonj hinek hidi maañ kumuneenj.

⁴ “Kañ metam 18 Siloam gwañ kawade yot goloñ foonj widihikumunjuk u dedinj nadiyemiinj? Adi kadakaninjhik Jelusalemhi noli'walañ yalakapmelak be dedinj?

⁵ Moñ hinek. Indinj nadineñ, hidi kadakaninjhik sigilulum mu tiyemneñ adi metam u kumunjinj undugonj hinek hidi maañ kumuneenj.”

Bem giminj mebi ninj foloñ mu wodiune figolokut titinjdok

⁶ Unduñ yoña yoyout mede indin yeninguk, “Me nin adi wain fiyenin ginen bim nin yetiguk. Ala wooñ foloñ kalin diweguk ingon nemu kan

⁷ kwanai-menin indin ninguk, ‘I kalañ, gulet lu-fomkulitnin wondok tuwot bem i foloñnit mokit yatilak tiña kwet galiki hogok moñgofit tilak ale figolowen.’

⁸ “Unduñ nimbune kwanai-menin adi indin ninguk, ‘Biune gulet kubugon yalune mebinen kwet wenekemadina kwet dinin galiki neen kikuloli timimbene

⁹ gulet nin gwelendok foloñ nobu tibaak kan bine yalaak en moñ adi fikapman titindok.’ ”

Jesudi Sabat gulet folon tam nin tubukedebaguk

¹⁰ Sabat nin folon Jesu adi bopyotnen foon Mede Momoon yoyo tuguk.

¹¹ Kan unon tam nin yabap kadakanin di fomimbu gulet 18 wondok tuwot sigin muneneen hatuluguk adi maan unon ikuk.

¹² Ala Jesudi kan katinimbu buune ninguk, “Tam, du yagitge agan bigabulak.”

¹³ Unduñ niña kohon mebi folon kameune nai unaningon sigin didimeune Bepan niña tilolon tuguk.

¹⁴ Unduñ tuguk kan bop yot dinin talitimen adi Jesu Sabat folon kwanai tilak yoña nadikadaka tiña metam indin yenintoguk, “Kadehati 6 hakiin ala nai unanin kedem buune hehitubukedebaluwaak, en Sabat folon adi mu baneen.”

¹⁵ Unduñ yobu Wapumdi ninguk, “Yalan-me hidi! Metam nolidi habunadiune utumba titindok yoña yalan yoin. Hide hinek adi makauhik be

donkihik Sabat folon fiyali yanagi uune kilihikit be ime nanan tiin.

¹⁶ Ingon kamin Abalaham'walañ yalaki nin adi Sadañdi tehiguk u Sabat folon mu fiyakulimindok naniin."

¹⁷ Unduñ yobu metam adi nemek momoon tinak yoña nadifo tubune memikniye adi meka tigin.

Bepañ'walañ mede adi mastat kilik dabugon eñ belet tububedidok haguwo wondok tuwolit (Matiyu 13:31-33; Mak 4:30-32)

¹⁸ Unduñ yoña indin tomboyoula yeninguk, "Bepañ'walañ Hatihati Kobuli u dediningon? Mangondut kamekaan yobit kan tuwot tibek?"

¹⁹ Uyadi mastat* kilik undinin. Ala me ninđi tinã wooñ fiyenin ginen yetiguk kan labuña loon bem wapum tubune bagi heki adi buña tañenin folon ungon deipilat tigin."

²⁰ Unduñ yoña kotigon indin yeninguk, "Bepañ'walañ Hatihati Kobuli u dediningon yobit?"

²¹ Uyadi indin. Tam ninđi belet tububedidok haguwo u palawa dut miñobuña bikabune hali bedi tilak undinin."

Gigine tinã kunum ginen lolondok (Matiyu 7:13-14, 21-23)

²² Jesu Jelusalemde wene talipmen yokwet indigon wooñ metam Mede Momoon yeniyenin titauguk.

* **13:19:** Mastat dinin mebi kanadiwe nadiña pepa yendinin dikiinen Diksineli ginen ungon kawen.

²³ Kañ me niñdi indin ninadiguk, “Wapum, Bepañdi metam lufom-kabe binek yehitubulodañ yanagilaak be dedin?”

Unduñ ninadiune Jesudibo indin yeninguk,

²⁴ “Metam feedi taliyeme gidan ginen fone tiin ingon moñ tiin doktiña hidi uñon fofondok mahik sikilitiña fafane tiña foyaneñ.

²⁵ Tiña yot wondinin wapumdi talik tehewaak kañ hidi woon dilitomnimbek yoña yeme ulaña nineñ, ‘Wapum, kedembe taliyeme dilitomnimbek.’ Unduñ nineñ kañ hanimbaak, ‘Nu hidi mu nadihamulat.’

²⁶ Unduñ hanimbaak kañ nineñ, ‘Du koom nanaje indut nongon nagumun tiña du koom Mede Momoon indi yotnikwetninen uñon yoyauguñ.’

²⁷ Unduñ nineñ ingon hanimbaak, ‘Nu hidi mu nadihamulat ale metam kadakanin titin hidi tabaut!’

²⁸ Hidi haniñkulu kwet kadakanin ginen foon Abalaham, Aisak eñ Jekop tiña polofet heki adi Bepañ’walañ Hatihati Kobuli ginen ilune yabuña welehek kadakaune kobulabulaye tiña masiñkilip taneñ.

²⁹ Kañ metam mele labulabunenjkade buneñ, agañ mele fofonnenjkade buneñ be uñandin be uñandin buña Bepañ’walañ Hatihati Kobuli ginen ilaña hinamuni tineñ.

³⁰ Metam timenhi noli mindañ yapmewaak. Eñ mindañhi noli timen yapmewaak.”

*Jelusalemi mute mede yeninguk
(Matiyu 23:37-39)*

³¹ Nai unjaningon Falisi noli Jesu hakuknen buja ningin, “Helot adi gulukumun tibe yolak ale momon tinja kwet nin wenj.”

³² Undun nimuntamuntayeune Jesudi yeninguk, “Kamo moinj u wooj indin ninen. Kamiñ dut halon e metam yabap yehikelekuyemuña yagithinit yehitubu-kedebait, ala helen aganj kwanai tubudapman tibaat.

³³ Kunjon on, kamiñ, halon, be helen kwanai titaunila unon usuwawaat. Tiyaugene polofet kwet yagadi hatilune ulukumuneeneñ. Adi ulukumundok kwet adi Jelusalem unon yonit.

³⁴ “Jelusalemhi kadayo! Hidi Bepandi polofet fee hiditok yeningkuk kan widihikumunjin. Kan nu nai fee hinek pupupdi mihininjiye yehik-walanelak undun kohonedi metamneye yehik-walanewe nadigut, injon hidi kamehep tinam-agin.

³⁵ Undun doktina i kanen. Bepan aganj bihabulak. Yohikwehik u uyapupuheneune kwet hogok halaak. Biyagon hinek hanilat. Hidi mu nabuna hatigene kougon indin yona kotigon nabuneen, ‘Me i Wapum wou ginen bulak adi Bepandi kahan timimbek!’ ”

14

Jesudi Sabat gulet nin ginen me nin tubukedebaguk

¹ Sabat nin folon Jesu adi Falisi heki’walan talitimen nin dut nanane nade ulune Falisi heki adi me yagitnit nenobu tubukedebawek yona kakuwali ti ugin.

² Kañ me niñ folobedibedinit yopmañ ungoñ hakuk.

³ Kañ Jesudi me u kañ Yodoko Mede hinale tiña Falisi heki indiñ yeninadiguk, “Yodoko Medenikdi Sabat foloñ tubukedebakedeba kwanai kedem be titindok yolak be dedin?”

⁴ Unduñ yeninadiguk kañ adi nemek nemu yoña ikiñ kañ Jesu adi me u honeeñ tubukedebañ niñkulune yolide uguk.

⁵ Niñkulune uune indiñ yeninguk, “Hidi mihihik be makauhik niñ adi ime koñ gineñ foune Sabat foloñ doktiña kedembe bikabune ungoñ halek?”

⁶ Unduñ yeninguk kañ mede tubu-udanedok lohi tiña hogok ikiñ.

⁷ Kañ nai unaningoñ metam feedi hinamuni tiginneñ ungoñ kwet fofohi yabukahileeñ ikiñ kañ Jesudi u mañ yabuña yoyout mede niñ indiñ yeninguk.

⁸ “Me niñdi hinamuni tiña nanaje nongoñ nanañdok hanimbune kañ wooñ kwet fofohi mu yabukahileeñ ikaneñ, ti me lolonit niñ buune

⁹ me nai kamehambek negoñ indiñ hanimbaakneñ, ‘Du tabaune adi buña ilek.’ Unduñ hanimbune hidi mindañ hinek wo ila metam dauhik gineñ meka kisañ tineeneñ

¹⁰ doktiña timenñ wooñ kwet hogoli gineñ ilune me nanaje tiulidokonañ ne buña habuña yoluwaak, ‘Notne, pilali kwet fofoon gineñ ileñ.’ Unduñ hanimbu metam nohiye namandahik foloñ welemomoonñ nadineñ.

11 Biyagon hinek nadienej, me netok nadiune lolon tilak adi nintinajofonj titindok. Tina me netok nadiune fofonj tilak adi nintinajalolonj titindok.”

12 Unduñ yonja me hinamuni molomdok indin ninguk, “Me nokeye, be dake-kwayageye, be magemageye be me bombonjhinit mu yehimaneluwaan. Adi yadi kibikonj tigamdok nadinja yehimaneluwaan doktinja tuwaninj aganj ungon mongolune dapmaluwaak.

13 Unduñ doktinja hinanj tinja me yehimanewe nadinja metam fiyewakahi, be kayohik kuminj talik mu yawiin be dauhik sipmakahi yehimaneluwaan.

14 Tinja adi undihidi kibikonj mu tigamaneen doktinja Bepandi kahanj tigamuluwaak. Tinja kougon metam fofohi kumunj gineninj pilatneenenj nai unjaninj Bepandi kibikonj tigambaak.”

*Hinamuni gineñ mu uuñdok yogin
(Matiyu 22:1-10)*

15 Unduñ yobune me nin nanane nongon ila naginji mede u nadinja Jesu indin ninguk, “Metam Bepan’walañ hebenj gineñ Hatihati Fafaneninj gineñ hali hinamuni naneenj adi nadifo wapum hinek tineenj.”

16 Unduñ yobune Jesudi ninguk, “Heleninj me nin adi hinamuni tinja metam fee hinek yehimaneguk.

17 Ala nanane nananj nai tubune tipilapilaye mihininj nin ninjulune wooñ me medenai koom kameyemguk u indin yeninguk, ‘Nemenemek aganj tiulidokomun ale bunenj.’

18 “Unduŋ yenimbune adi wanaŋ mu uuŋdok nadiŋa yotebitebi mede indiŋ niŋgiŋ. Me timenŋ kaguk adi indiŋ yoguk, ‘Nu kwet wapum niŋ tuwanaŋat doktiŋa woonŋ kawit, ale fiit nadinamenŋ.’

19 Kaŋ nolidi yoguk, ‘Nu makau 10 tuwanaŋat doktiŋa yanagila yauka yauka tibit ale fiit nadinamenŋ.’

20 Kaŋ nolidi yoguk, ‘Nu tam kobuŋonŋ tiŋat doktiŋa mu wit.’

21 “Unduŋ hogok yodapmaune tipilapilaye mihi adi kotigonŋ udaneenŋ woonŋ bombonŋi niŋguk kaŋ nadikadaka tiŋa yoguk, ‘Pilap hinek woonŋ talik folonŋ be yokwet maanenŋ metam fiyewakahi be kayohik kadakahi be dauhik sipmakahi yabuŋa yanagila bunenŋ.’

22 “Unduŋ yobune muniniŋ yali medenŋiŋ yoguk u agaŋ foloonŋnit tuguk, kaŋ tipilapilaye mihidi niŋguk, ‘Bombonŋi, medege agaŋ foloonŋnit tilak iŋgonŋ yotmaanŋ tuwot mu tilak.’

23 “Unduŋ yobune bombonŋidi niŋguk, ‘Woonŋ talik giyoki tuwot yaunŋa metam yabenŋ u yeniŋgigineune bunŋa yotmaanŋ i fo itoko hinek tinenŋ.’

24 Tiŋa ganimbe nadiwenŋ, me koom yeniyehimanegut adi nanaŋe-kabe nemu naanŋ kanenŋ.’ ”

Meeniŋdi Jesu kelene nadiŋa kaŋ baigonŋ ila nadidakale-hinakaanŋ keledok

(Matiyu 10:37-38; 5:13; Mak 9:50)

25 Heleniŋ metam feedi Jesu keleginŋ kaŋ udaneenŋ indiŋ yeniŋguk.

26 “Nebek niŋ nu nehikelelak iŋgoŋ miŋbeu, be wapmihiniŋ tam be wiwi kwayaniye be ne’walaŋ hatihati hogohogok u sigilulum mu tiyemilak adi yadi nu’walaŋ mihine mu tibaak.

27 Eŋ nebek niŋdi kolonɔdabekniŋ mu bemŋa nehikelewaak adi nu’walaŋ mihine mu tibaak.

28 “Nebek hidi’walaaniŋ niŋdi yot kweheyeniniŋ niŋ mawe nadiŋa kaŋ timeniŋ baigoŋ ilaŋa tuwaŋiŋ kanadi tilak, tiŋa kedom be mamaŋdok be moŋ u mindaŋ yodapmalak.

29 Moŋ nobu kaŋ yot taka heki timeniŋ mu wenedahilak. Unduŋ tubune metamdi kaŋ gege tineeneŋ.

30 Tiŋa indiniŋ yoneeneŋ, ‘Me i yot tububihifit tuguk, tiŋa mu madapmalak.’

31 “Mapme niŋdi mapme noli dut mik tibene nadiŋa adi timeniŋ baigoŋ ila kanadi tilak. Ne’walaŋ mikmeniye 10 tausen binek, kaŋ mapme toboniŋ bulak’walaŋ mikmeniye 20 tausen. Unduŋ doktiŋa mik gineŋ kedom be fafaŋeŋ mapme noli u kalakapmewek u kanadi tilak.

32 Tuwot moŋ nobu nadi kaŋ mede kameune mapme noli’walaŋ uune wabiŋa kulema tubu-mintaŋiŋ.

33 “Undugoŋ hinek hidi’walaaniŋ niŋdi nemen-emekniŋ hogohogok sigilulum mu tiyembek adi nu’walaŋ mihine hinek tuwot mu hatibek?

34 “Feleniŋ adi kobaŋ iŋgoŋ kobaŋiŋ dapmaune kotigoŋ koba mu tilak.

35 Hogoli doktiŋa nemek ube u titiŋdok moŋ. Adi tukulune gilem gineŋ uuŋdok.”

Unduŋ yoŋa yoguk, “Nebek niŋ adi nadi-dakalewe kaŋ magi baigoŋ kametnadiŋa nadi-wek.”

15

Dompa fikuk diniŋ yoyout mede (Matiyu 18:10-14)

¹ Heleniŋ me kadakaninŋ titinŋ hekidi Jesu medeniŋ nadine buginŋ.

² Kaŋ Falisi tiŋa Yodoko Mede hinale heki adi kaŋ nadikadaka tiŋa indinŋ yoginŋ, “Me yadi me kadakaninŋ titinŋ yehimaneenŋ yeniutumbalak.”

³ Unduŋ yoginŋ kaŋ Jesudi yoyout mede indinŋ yeninguk.

⁴ “Hidi’walaaniŋ nebek niŋdi binek dompa 100 yabudokoluwek ala kubugoŋ niŋ filune dedinŋ tibek? Dompa 99 u deit tiinŋneŋ ungoŋ biyabuŋa noli u lohiyaugeyauge

⁵ kaŋ nagila kaluwanŋinŋ foloŋ kameenŋ nadifo tiŋa nagila buŋa yopmaŋ busuwawetik.

⁶ Busuwaanŋ noliŋiye mede kameyembu bu-une yenimbetik, ‘Nu dompane niŋ filak aganŋ tubumintaanŋ nadifo tilat doktiŋa hinanŋ wapum tinim.’”

⁷ Jesudi unduŋ yoŋa indinŋ yeninguk, “Indinŋ hanimbe nadineŋ. Me fofohi 99 aditok kunum gineŋ nadifo tiyemiinŋ ingoŋ me niŋ kadakaninŋ titinŋdi welenŋ tubutakalelak aditok adi nadifo loloŋnit hinek tiinŋ.”

Muneŋ fikuk diniŋ yoyout mede

⁸ “Be tam niŋ adi 10 siliŋ boihatibek kaŋ kubugoŋ niŋ filek kaŋ tam u dedinŋ tibek? Adi

kaman galina yoli yohomun tina baigon lohina kan tibetik.

⁹ Tina nolinije yenimbune buune yenimbek, 'Nu muneene nin filak u agan kan tinat doktina nadifo tilat ale hinar tinim.'

¹⁰ "Undugon hinek Bepar'walar anelo heki adi me kadakanin titin nin di welen tubutakaleen udanelak doktina adi nadifo wapum tiin."

Mihi nin fikuknenin kotigon udaneguk dinin yoyout mede

¹¹ Undun yona tomboyoula indin yeninguk, "Me nin hatiluguk adi mihinijyat lufomuk.

¹² Ala Monenindi beu indin ninguk, 'Me ban, bombon nutok u kami danenamben.'

¹³ Undun nimbune daneminguk, kan muninin hatina muneen bombonnin mongola yokwet bik-abuna uguk. Kwet nin kade kweetnin hinek woon, muneenjin nadi mu tina kaka hinek kudapmaguk.

¹⁴ "Kan nai unanin nanane map wapum hinek mintaguk kan adi nananenit mokit, hogok hatifit tuguk.

¹⁵ Undun doktina me unanin nin woon kaune tipilapilaye kwanai titindok yona nin kulune woon makaye nanane yemyem tuluguk.

¹⁶ Unon woon makaye nanane unakon fiit nawit nadin uguk. Ingon u maan kamehep timingin.

¹⁷ "Undun timimbune hanadikunakunale-tauyen indin naditonguk, 'Batne'walar kwanai-me hogohogok adi nanane wapum hinek nai, kan nu mihinin hinekdi inon map kisan hinek tilat.

18 Unduŋ doktiŋa pilali batne'walaŋ woon indin nimbit, "O me baŋ, nu Bepaŋ sigilulum timingut tiŋa du maan sigilulum tigamuŋa kadakanin tugut

19 doktiŋa nu du mihige hinek kotigoŋ mu nanimbu hatiluwaat. Kwanai mege hogok nanimbu hatiluwaat." '

20 Unduŋ yoŋa pilali beu kawe uguk.

"Woon yot tubudulalune beudi kaguk, kaŋ welen goloune bulaningon hinek nadiŋa kiya-neeŋ woon toboŋa singongome tuguk.

21 Kaŋ mihiniŋdi yoguk, 'Me baŋ, nu Bepaŋ be du hidi sigilulum tihamuŋa kadakanin tugut doktiŋa nu du mihige hinek kotigoŋ mu nanimbu hatiluwaat.'

22 "Unduŋ ninguk ingon beu adi tipilapilaye mihiniye yeninguk, 'Pilap hinek woon dahi-dahi fofoon nin tineŋ, haluntuk nin tineŋ eŋ kayonnamokop moŋgotneŋ. Unduŋ moŋgola buŋa tinahukulimineŋ.

23 Tiŋa woon makau mihinin foloonnit hinek unak ulune hinaŋ wapum tinim.

24 Mihine i agaŋ kumungukneneŋ udanelak, tiŋa agaŋ fikuk ingon tubumintayam doktiŋa hinaŋ tinim.' Unduŋ yoŋa hinaŋ tububihikin.

25 "Unduŋ ha-tulune Tuwo adi kade gineŋ ha-tiguk ala udaneeŋ buŋa yot tubudulaan nadilune kap miyeen tonadifo tigin.

26 Nadiŋa tipilapilaye-me nin katinimbu uune ninguk, 'U maŋgoŋ tiŋa toin?'

27 "Unduŋ nimbune yoguk, 'Kwayage koti kule-maŋgoŋ udaneeŋ buŋak kaŋ bahadi wendoktiŋa nadifoŋ makau mihinin foloonnit ulaŋa helak.'

28 “Unduᅇ nimbune nadiᅇa kwihita tiᅇa yot maaneᅇ mu foune beudi buᅇa yot maaneᅇ fo-foᅇdok niᅇkulemaguk. Kaᅇ mihiᅇiᅇdi welen kudup daune niᅇguk,

29 ‘Iᅇkaweᅇ, nu guletgulet hatitabam hogohogok adi me kwanai tuwaᅇit mokit adi tiᅇiᅇ dabugeᅇ tiᅇamulat. Tiᅇa mede wobu nemu tiᅇamulat iᅇgeᅇ du meme bedikwambundaᅇ kabe nemu nambune notneye dut hina nadifo tugumun.

30 Iᅇgeᅇ mihiᅇedi bombeᅇge moᅇgo wooᅇ tali-tam heki dut hatiᅇa tubudapmaᅇ buᅇak kaᅇ makau mihiᅇiᅇ foloᅇnit hinek ula hinaᅇ ya nadifo toiᅇ.’

31 “Unduᅇ yobune beudi indiᅇ niᅇguk, ‘Mihine, du adi helemahelamaᅇ nukut iᅇgeᅇ hatilaᅇ dok-tiᅇa nemenemek hogohogok u dutok.

32 Kaᅇ kwayage adi agaᅇ kumuᅇgukneᅇniᅇ udanekaᅇ be fikukneᅇniᅇ tubumintayam doktiᅇa hinaᅇ wapum tiᅇa nadifo tinene utumbawek.’ ”

16

Muneᅇ bombone kadokome hogoli diniᅇ yoyout mede

1 Jesudi mihiᅇiᅇye indiᅇ yeniᅇguk, “Me muneᅇ bombeᅇnit niᅇ hatiluguk adi tipilapilaye-meᅇiᅇ niᅇ kameune bombeᅇniᅇ wondok me wapum ila yabudokoguk. Ala heleniᅇ me niᅇdi me bombeᅇnit indiᅇ niᅇguk, ‘Du tipilapilaye-meᅇ me wapum kameᅇaᅇ adi muneᅇge kaka hinek moᅇgola kudapmaᅇ tilak.’

2 “Unduᅇ niᅇguk kaᅇ me bombeᅇgidi tipilapilaye-meᅇiᅇ katinimbu buune niᅇguk,

‘Du muneenje monjo kaka tinan yonit nadinat doktina nu’wala bombon yabudokolan u pepa folon youdidimeen namuna kwanai wabiwen.’

3 “Undun nimbune tipilapilaye-me wendibo indin nadiguk, ‘Nu kwet youyout kwanai titindok saninijne monnen nehikeleкулune dedin tibat, tina nayo titindok mekanjon dedin tina yobaat?’

4 Injon aganj nadilat, kougon kwanai wabina woon hatibaatnen metam feedi not tinambune yohinen wene naniutumbaan momoon tinama-neendok indin tiyembit.’

5 “Undun yona metam bombon bombonjin’wala tobogon mongokin katiyenimbune buune me nin ninguk, ‘Du bombongine’wala bombon tobogon mongokun u dedin hakamulak?’

6 “Undun ninadiguk kan yoguk, ‘Wel dalam 100 mongokut’ yoguk kan ninguk, ‘Pepage bombon tobogon mongokun dinin yon, ale unjon foon ila 50 youlen.’

7 “Undun yona me nolibo ninguk, ‘Du’wala dedin?’ ninguk kan yoguk, ‘Hangom bet 1000.’ Undun yoguk kan ninguk, ‘Pepage bombon tobogon mongokun dinin yon, ale foon ila 8 handelet youlen.’

8 “Tipilapilaye me kadakanin adi ne iitnin utumbadok nadin kwanai undun tubune bombongidi u kan nadin nadinindok nina tilolon tuguk. Undun doktina hidi kwetfolon memetam nadinadinitdi metam hauta ginen hatiin yalakapmedapmaan gitagon iutumba tiin u kan nadinen.”

⁹ Jesu adi undun yeninga tomboyoula indin yoguk, “Undun doktinga indin hanilat. Kwetfolon dinin bombon wondigon menot titindok silon taneen. Undun tinga hatitulune kwet dinin nemene-mek liweune kougon hatihati dapmandapmanjit mokit ginen uune Bepandi haniutumbaar hanag-ilaak.

¹⁰ Be nebek nin adi bombon lufom-kabe ingon mohinek yabudokolak adi bombon fee kadem yabudokowek. Kan nebek nin adi bombon lufom-kabe momoongon mu yabudokolak adi bombon fee tuwot mu yabudokowek.

¹¹ Undun ginen doktinga nebek nin kwetfolon bombon fofongon mu nobu yabudokoune bombon foloon hinek deti mimbaak?

¹² Tinga undugon du me noli'wala bombon momoongon mu yabudokoune datok detinga gambek?

¹³ “Me nin adi bombongi lufomdok kwanai tuwot mu tibek. Undun tibek adi ningdok hogok nadinga nin adi lakata timimbek, be ningdok momoon timinga nin kahainginda tibek. Undun doktinga hidi Bepan'wala kwanai maan en muneendok kwanai maan mu taneen.”

Jesudi Falisi hekidok mute mede yeninguk

¹⁴ Undun yobune Falisi heki adi muneendok nadigalika tagin, doktinga mede u nadinga nadihainginda tigin.

¹⁵ Kan Jesudi yeninguk, “Hidi yadi metamdi habuna nadihambu utumba titindok nadinga kwanai tiin ingon Bepandi welehek kan nadiune tuwot mu tilak. Nemenemek kwetfolon

medi kaune momoon tilak u Bepandi kan madi-madikenjon nadilak.

¹⁶ Tiña Moses'walañ Yodoko Mede dut polofet hekidi youkudip tigin u keleen hatitalabune Jon Imeyout me mintagukneñ unjon dapmalak, kan unjan Bepañ'walañ Hatihati Kobut yohautaune metam nadiña fafañe tiña wondok maaneñ foij.

¹⁷ Biyagon hinek kunumkwet adi kedem liwedemeek unjon Yodoko Mede adi faki-kabe nemu liwewaak.

¹⁸ “Me niñ adi tamñin kelekula gitipmun tibaak adi yofolokhik fafañe u ulopmadiwaak doktiña kefile dinin malabumun hekiwaak. Kan me niñdi tam kelekut tigin u nagilaak adi maan memalam dinin kifolok tubudokoon kadakanin tibaak.

Lasalus tiña me bomboñnit dinin mede kahat

¹⁹ “Me muneen bomboñnit niñ hatiluguk adi tinahukutñin muneen wapumdi tuwaan tinahukutuguk. Tiña helemahelman nanane ime momoon naan yot momoon gineñ itouluguk.

²⁰ Nai unjan me fiyewakan niñ hatiluguk wou Lasalus, adi foloon folon wede gitigitik.

²¹ Ala me bomboñnitdi nanane naune munamunam falik falipmen mayagin u mimbune nanandok yonã nagila woon yoli yeyemen kameune ituguk. Kan kamo hekidi maan buña wedenjin himbitnayagin.

²² “Undun tiña hatigene Lasalus kumunguk kan anelo hekidi buña nagila loon Abalaham dut kameune ikuk. Kan me bomboñnit adi maan kumumbune wenegin

²³ kañ hamdok gigit tuguk. Tiña folofigita ginen hali diween Abalaham kweetniñ gwan kaguk, kañ Lasalus adi Abalaham gaga foloñ ikuk.

²⁴ Kañ katiguk, ‘O Abalaham, batne, nu kudupdi nehidaune folofigita kisañ hinek nadilat ale nutok bulaniñgoñ nadiña Lasalus nimben kañ kohon ime ginen kapmañ tiña buña mebelemne foloñ kameune kulemawek.’

²⁵ “Unduñ ninguk kañ Abalahamdi yoguk, ‘O mihine, du koom hogok hatiguñneñ unon nemenemek fofoon tugun kañ Lasalus adi tibulabulaye hati tuguk u kaule be tilañ? Unduñ doktiña kobuk Lasalusdi inon nadifo foloñ hatak kañ du folofigita ginen hatañ.

²⁶ Tiña indin maañ, kubali wapumdi du tiña indi lekingoñnik foloñ hatak u nebek niñdi inandin yali lahula guñandin uundok tuwot moñ, be guñandin yali inandin bubundok u maañ tuwot moñ.’

²⁷ “Unduñ yobune me bomboñnit wondi yoguk, ‘Batne Abalaham, fiit Lasalus niñkulune batne yolineñ wooñ

²⁸ kwayaneye 5 u folofigita kwetneñ inon mu bubundok yenimbek.’

²⁹ “Unduñ yobune Abalahamdibo yoguk, ‘Kwayageye mede yenindok adi Moses tiña polofet heki ungon hatiñ doktiña adi yenimbune nadineñ.’

³⁰ “Unduñ yobune me bomboñnitdi yoguk, ‘Unduñ adi tuwot moñ, nebek niñ kumuñ gineniñ pilali wooñ yenimbune kedem kadakaninñhik sigilulum tiña wele tubutakale tineñ.’

31 “Unduḅ yoguk kaḅ Abalahamdibo niḅguk, ‘Adi Moses tiḅa polofet heki’walaḅ Youkudip Mede mu nadiiḅ doktiḅa me kumuḅ gineniḅ kaikaanḅ pilalek’walaḅ mede maanḅ mu nadineḅ.’”

17

Nemenemek titiḅdok u nadidakaleeḅ titiḅdok (Matiyu 18:6-7, 21-22; Mak 9:42)

¹ Unduḅ yoḅa Jesu adi mihiḅiye indiiḅ yeniḅguk, “Metam wanakanḅ hogohogok kadakaniiḅ mebimebi mintayemulak. Inḅgoḅ me nediyeḅ kadakaniiḅ titiḅdok weleyouyout tiyemulak adi moniiḅ, adi kibikoḅ dediniḅgoḅ hinek timineeḅ!”

² Tiḅa undugoḅ me undiniḅ adi hatiḅa wapmihi kuyahi-kabe niḅ nihoḅokeneune kadakaniiḅ tibaakneḅ doktiḅa timenḅgoḅ kawade bigim wapum wondi kodi foloḅ tehikapmamiḅa silonetikulune imenḅwanḅ wapum gineḅ foon kumuḅ tibaak.

³ Unduḅ doktiḅa nemenemek taneeḅ u baigoḅ kaḅ nadidakaleeḅ taneeḅ.

“Be me nokedi kadakaniiḅ tubune kaḅ mede baigoḅ nimbune welenḅ tubutakaleune kadakaniiḅniḅ bimiluwaanḅ.

⁴ Be hele kubugoḅ maaneḅ kadakaniiḅ 7 tigamuḅa wooḅ kotigoḅ udaneeḅ buḅa nai 7 wendok tuwot welebulaniḅgoḅ ganimbune kaḅ kadakaniiḅniḅ bimiluwaanḅ.”

Jesudi nadisukiliti titiḅ diniḅ mebi yodakaleguk

⁵ Aposel heki adi Wapum indiiḅ niḅgiḅ, “Nadisukilitinik tububedinimbeḅ.”

⁶ Unduñ ningiñ kañ Wapumdi indin tubu-udaneyemguk, “Nadisukilitihik-kabe mastat kilik* undiniñ halune kwele wapum gu madila labukadoña wooñ imengwan gineñ yalen nimbune kedem tibek.”

Jesudi tipilapilaye-me'walañ titiñhikdok yoguk

⁷ “Nebek niñ adi tipilapilaye-meniñ niñ hatiliwek ala adi dinina kwanai be dompa yabudoko tiyaña udaneen yopman buune nananenin pilap wooñ nanandok tuwot mu nimbek.

⁸ Moñ hinek. Tobo indin nimbek, ‘Hinañ dinin tinahukut tiña nanañe tiulidokoune nu nadapmawe dabo kougoñ hinawen.’

⁹ Adi kwanainin unakon doktiña me wapumdi tipilapilayenindok welemomoon mede mu nimbek.

¹⁰ Unduñ doktiña hidi mañ undugon hinek taneen. Bepandi nemenemek titindok hanilak u tiña yoyaneen, ‘Indi kwanai niniñak unakon-kabe hogok tumun ale kwanai-me fofohi mu niniñdok.’ ”

Jesudi me wede hakiñhinit 10 yehitubukedebaguk

¹¹ Jesu adi Jelusalemde wene Galili dut Samaliya kwet kimindep tamukneñ talik uguk.

¹² Wooñ yokwet niñ gineñ fowe tulune me wede hakiñhinit 10-di tubumintañ kabe-tamaigon gwan yali indin kutiniñin,

* **17:6:** Mastat dinin mebi kanadiwe nadiña pepa yendinin dikiineñ Diksineli gineñ unon kawen.

13 “O Jesu, me wapum, du inditok bulaningon nadiwen!”

14 Undun kutiningin kan Jesudi yabuņa yeninguk, “Unen kan Silonyot dinin talitimen hekidi habuņa nadinen.” Undun yenimbune woon talipmen kedebadapmagin.

15 Undun tina adi’walaanin me kubugon ninđi kedebadapmagin u kan nadinu kotigon udaneen Bepan wou niutumbatabuguk.

16 Buņa Jesu yakuknen kayon ginen maan hali welesilon mede ninguk. Me u yadi Samaliyanin.

17 Doktina Jesudi me u kan indin yoguk, “Me 10 binemek kedebanjit yonu nadit, ingon me 9 denjon hakiin?”

18 Kan me kubugon kweetnininđi hogok udaneen buņa Bepan niutumbalak.”

19 Undun yonu indin ninguk, “Nadisukilitigedi gehitubu-kedebanjak ale pilali wen.”

Nai wapum dinin mede

(Matiyu 24:23-28, 36-41)

20 Falisi nolidi Bepan’walań heben ginen Hatihati Fafanenin denin mintawaak yonu Jesu ninadigin. Kan indin tubu-udaneyemguk, “Bepan’walań heben ginen Hatihati Fafanenin adi daugedi tuwot mu kawen.

21 Bepan’walań heben ginen Hatihati Fafanenin adi hidi’walań lekingonhik ginen hatak doktina nebek ninđi gu bulak, gu kawen be i bulak, i kawen u tuwot mu yobek.”

22 Undun yonu mihinnye indin yeninguk, “Hidi nai nin mintawaaknen Me Kobumun bubundok nainin kanim yo kaneen ingon tuwot mu kaneen.

23 Nai unjanij me nolidi hanineen, agan gwan mintalak be agan inonj mintalak yobune lohitaumu tineen, be biyagonj mu yo nadineen.

24 Filimpit tubune kunum hautadapmalak undunijonj Me Kobumunj nainij folonj minjonj buune kaneen.

25 Injonj timenj adi metam kobuhidi kahanjinda tineen kanj mindanjanj folofigita nadiwaak.

26 “Me Kobumunj’walañ nai adi Nowa’walañ nai gineñ mintaguk dabugonj mintawaak.

27 Metam hogohogok adi nanañe ime nanadi-foonj hekimalam tinja tilune Nowa adi muwageñij gineñ foune ime gabunjanj wapumdi bunja yehikufulaguk.

28 “Tinja undugonj Lot’walañ nai gineñ mintaguk dabugonj mintawaak. Metam hogohogok adi nanañe ime nañ, bombonj boinja tuwayaginjanj, be diniyeti taginjanj, be yot mamananj tulune,

29 Lotdi Sodom yokwet biguk nai unjanij kudup fafañenij kunum ginenij foonjanj yehidakumundapmaguk.

30 Ala Me Kobumunjanj ninjulune baakneñ nemek undunjanj dabugonjanj mintaune kaneenjanj.

31 “Nai unjanij nebek me ninjanj yot folonij halaak adi bombonijñ kalinjanj yot maaneñ mu fowaak, be nebek ninjanj kade gineñ hatibaak adi yopmande mu waak.

32 Lot tamnijñ’walañ mintaguk u nadineñ.

33 Nebek ninjanj hatihatinij netok kahilewaak adi fiit timimbaak, enjanj nebek ninjanj nutok tinja hatihatinij bikabaak adi hatihati foloonjanj kahilewaak.

³⁴ Nai unanin timin metam lufomdi gulup kubugon folon dahatune kubugon nin bikabuna kubugon hogok nagilaak.

³⁵ Be tamyat lufom adi henañ nongon ila tulune nin nagila nin bikabaak.”

³⁶ Undun yobu mihiniyedi u nadiña ninjin, “Wapum, u dan mintawaak?”

³⁷ Undun ninadigin kañ yeninguk, “Dabañ dan hali bitakalakneñ unon kalañkatak hekidi bopnein.”

18

Jesudi yonadi dedin titindok u tam kahat nin folon kamekaan yoguk

¹ Undun yona Jesu adi mihinije ninadi kwanai fafañe tiña titindok yona yoyout mede folon indin yeninguk,

² “Yokwet wapum nin gineñ mede yodapmandapman me nin hatiluguk, adi Bepañ be kwetfolon me yabuhandin tuluguk.

³ Ala adi hatilugukneñ unon tam kahat nin hatiluguk adi helemahelamañ woon mede nadiña yodapmandapman me wendi tubulodadok yona indin niluguk, ‘Nehitubulodañ me tobonin dut mede didimeñgon hinek yodapmawen.’

⁴ “Nai fee hinek niluguk ingon me mede nadiña yodapman me adi kibida tuluguk. Ingon mindañkade indin yoguk, ‘Nu Bepañdok munta mu tilat eñ metamdok nadibedi mu tilat,

⁵ ingon tam kahat i helehele buna nanimbaba tilak ale fiit tubulodañ mede didimeñgon hinek

yodapmawene bombonņin monņolek. Nu kwanai u mu tibit adi uņambunat tiņa nanilu nanilu lakata tibaatneņ.’ ”

⁶ Unduņ yoņa Wapum adi tomboyoula indin yoguk, “Me mede nadiņa yodapman me hogolidi mede yolak u nadineņ.

⁷ Bepaņ adi metamņiye netok yehikahilelak adi hanin tebele nimbulabulaye hati tiin u yehitubu-lodaņ mede didimeņņon hinek yodapmalak.

⁸ Tiņa unduņon baigon mu tilak, adi pilap hinek yehitubu-lodalak. Inņon Me Kobumun baakneņ metam nadisukilitihinit neņbe yehitubu-mintawaak be, be mokoņ?”

Jesudi yoyout mede meyat lufomdi Bepaņ ninadi tugumuk folon kamekaņ yoguk

⁹ Unduņ yeniņa me indihidok mede yoguk. Me nolidi nehitoک nadiune utumba tilak kaņ metam nolidok kadakanin titin nadiyemiin. Aditok yoyout mede indin yoguk.

¹⁰ “Helenin meyat lufom Silonņotneņ ninadi kwanai tide fogumuk, noli Falisi, agaņ noli takis muneņ monņomņot me.

¹¹ “Ala Silonņotneņ foon Falisi adi tabaņ yaliņa netok indin ninadiguk, ‘O Bepaņ, metam hogohogok adi kadakanin tiin. Eņ nu adi nememek natok hogok mu monņotot, be yalaņ mu yolat, be me noli’walaņ tam dut kefile mu tilat wondoktiņa welemomoon nadigamulat. Tiņa unduņon nu muneņ monņomņot me gu yatak adi undinin moņ,

¹² eņ Sonda kubuņon maaneņ kadehati lufom nanane kamehep tiņa map hali ganinadi tiņa

muneenje faki utawaan dutok gamulat doktiņa welemomoon nadigamulat.’

13 “Falisi adi unduņ ninadiguk kaņ takis moņgomonņot me adi kadakaninņinđok nadiņa meka tiņa tuneņ duwokene yali indin ninadiguk, ‘O Bepaņ, du me kadakanin titin nutok bulaninņon nadiwen.’ ”

Jesudi kahat unduņ tiyemiņa yeninguk,

14 “Hanimbe nadiņeņ. Takis moņgomonņot me adi ninadi kwanai tiņa yolide udaneguk nai uņaninņon hinek Bepaņdi ninadinin u nadiņa kadakaninņin tumolokulimimbune me u walandanda hinek tuguk. Bepaņ ne unduņ timimbune me didimenin tuguk. Inņon me noli adi ninadinin u indin doktiņa mu nadiminņuk. Meenin nediyeņ netok nadiune lolonnit tilak adi yadi niņa tifofoņ titinđok, eņ meenin nediyeņ netok nadiune fofonnit tilak adi yadi niņa tilolon titinđok.”

Jesudi yoguk, “Wapmihi kuyahi biyabune nu’walaņkade buneņ”

(Matiyu 19:13-15; Mak 10:13-16)

15 Metam noli adi wapmihihye Jesudi kohon kihik foloņ kamewek yoņa yanagila bugin, kaņ Jesu mihiņiye adi yenihep tigin.

16 Kaņ Jesudi katiyenimbu buune yeninguk, “Wapmihi biyabune nu’walaņkade buneņ. Kamehep mu tiyemineņ. Bepaņ’walaņ heben foloņ Hatihati Uņgonin hatak uyadi wapmihi undihidegoņ.

17 Nu biyagoņ hinek hanilat. Nebek niņ adi Bepaņ’walaņ Hatihati Uņgonin u wapmihi-kabedi

kahileiŋ unduŋ mu kahilewaak adi yadi maanen unŋ mu fowaak.”

Me niŋ muneen bombon wapumnitdi Jesu takaliwe yoguk

(Matiyu 19:16-30; Mak 10:17-31)

¹⁸ Unduŋ yobune Judame heki'walaŋ talitimen niŋdi yoguk, “Hinale momoon, nu maŋgoŋ tiŋa hatihati dapmandapmaŋnit mokit kahilewaat?”

¹⁹ Unduŋ ninadiguk kaŋ Jesudibo niŋguk, “Maŋgoŋde nu momoon nanilaŋ? Nebek niŋdi momoon nemu hatilak, Bepaŋdi hogok.

²⁰ Du Yodoko Mede indiŋ agaŋ nadilaŋ. ‘Hekimalam hidi kefile mu taneen, du me widihikumun mu tuluwaan, du kubo mu tuluwaan, du menolidok yalaŋ mu yeniluwaan, du maŋge baha'walaŋ mede tilolon tuluwaan.’”

²¹ Unduŋ yobune me wondi niŋguk, “Nu koom kuyaninenŋoŋ Yodoko Mede hogohogok u agaŋ tagimneen tugutdi titabulat.”

²² Jesudi mede u nadiŋa niŋguk, “U kedem tilaŋ iŋgoŋ nemek kubugoŋ nimaan titiŋdok hatak woŋ adi indiŋ. Bombonŋe hogohogok tuwadok boiune tuwaune muneen fiyewakahidok yembeŋ. Unduŋ tibeŋ kaŋ nemenemek momohi kunum gineŋ unŋoŋ boigambu itneen. Ale unduŋ tiŋa buŋa nu nehikeleweŋ.”

²³ Me u muneen bombon wapum hinek halimiŋguk doktiŋa mede u nadiŋa welemulap kisaŋ hinek tuguk.

²⁴ Unduŋ tubu Jesudi u kaŋ yoguk, “Metam muneen bombonhinit adi Bepaŋ'walaŋ heben

gineŋ Hatihati Uŋgoniŋ u kahiledok kwanaimiŋ hinek tiinŋ.

²⁵ Kale kamel* adi buŋi ginaneŋ fofonɔdok kwanaimiŋ hinek mu tibek, iŋgoŋ me muneenŋ bombonjhinit adi Hatihati Uŋgoniŋ kahiledok kwanaimiŋ wapumgoŋ hinek tineenŋ.”

²⁶ Unduŋ yobune metamdi nadiŋa yogiŋ, “Kei, unduŋ doktiŋa nediyeŋ kahilewaak?”

²⁷ Kaŋ Jesudi yeniŋguk, “U meeniŋdi titiŋdok tuwot moŋ, iŋgoŋ Bepaŋ’walaŋkade adi nemek u be u titiŋdok kwanaimiŋ mu tilak.”

²⁸ Unduŋ yenimbune Pitadibo niŋguk, “I kawenŋ, indi nemenemek hogohogok biyabudapmaanŋ du gehikeleyam.”

²⁹ Yoguk kaŋ Jesudibo yeniŋguk, “Biyagoŋ hinek hanimit. Nebek niŋ adi Bepaŋ’walaŋ Hatihati Fafaŋeniŋ doktiŋa wapmihi tam be yolikweli, be miŋbeu, be dali kwayaŋiye biyabulak adi

³⁰ nai indidegoŋ duhuduhu tubumintamilak, eŋ kougoŋ adi hatihati dapmandapmanŋnit mokit mimbaak.”

Jesu ne kumuŋa kaikaanŋ pilalaak wondok yenimbune nai 3 tuguk

(Matiyu 20:17-19; Mak 10:32-34)

³¹ Jesu mihiŋiye yanagi wooŋ nehi hogok yehibopneenŋ yeniŋguk, “I nadineŋ, ya aganŋ Jelusalemde loyam kaŋ uŋoŋ polofet hekidi Me Kobumuŋdok maŋgoŋ mintamindok yoŋa youkiŋ hogohogok u folooŋ mintawaak.

* **18:25:** Kamel adi kale wapum, makau dabugoŋ.

³² Me Kobumuŋ adi Loma me heki'walaŋ kohohik foloŋ kameneeŋ kaŋ nimpekit tiŋa nihaŋindaan maluluk suwambali

³³ kiyegelepdı utubukadakaan ulukumuneen, kaŋ helebufa lufomkulitniŋ hali kotigoŋ kaikaan pilalaak.”

³⁴ Unduŋ yenimbu mede u mu nadidakalegiŋ. Maŋgoŋde, mede mebidı hebihat tuguk doktiŋa mihiniyedi nadidakaledok kwanaimiŋ tigiŋ.

*Jesudi Jelikonıŋ me dawı sipmakan niŋ tubu-
tomiŋguk*

(Matiyu 20:29-34; Mak 10:46-52)

³⁵ Jesu Jeliko tubudulalune me dausipmik niŋ talipmeŋ ila nayo tuluguk.

³⁶ Ala unduŋ ila tulune metam feedi buŋa kalakapmelu nadiŋa yeniŋguk, “I maŋgoŋ tiin?”

Yobune niŋgiŋ,

³⁷ “Jesu Nasaletniŋ buŋa ulak.”

³⁸ Unduŋ yobune nadiŋa indiŋ kutiguk, “Jesu, Dewit'walaŋ yalaki, nutok bulanıŋgoŋ nadiweŋ.”

³⁹ Unduŋ kutibune metamdi nintoŋa kabup ilek yoŋa nihep tigiŋ iŋgoŋ me yadı toboniŋ gıgıne tiŋa wapumgoŋ hinek kutiguk, “O Dewit'walaŋ yalaki, nutok bulanıŋgoŋ nadiweŋ.”

⁴⁰ Kutibune Jesu uŋgoŋ yalı yenimbune me dausipmik u nagıla bugiŋ kaŋ Jesudi ninadiguk,

⁴¹ “Nu maŋgoŋ tigambit yoŋa kutinanılaŋ?”

Unduŋ yoguk kaŋ dausipmikdibo niŋguk, “Wapum, nu dau diwediwe tibe nadilat.”

⁴² Unduŋ yobune Jesudi niŋguk, “Dauge kedem diiweweŋ! Nadisukilitigedi gehitubu-kedebalak.”

⁴³ Undun nimbune nai unaningon dawi diwedakaleen Jesu keleen Bepan niutumbaguk. Kan metandi kudi u kan adi maan Bepan niutumbagin.

19

Sakiyasdi Jesu kawene bem folonin loguk

¹ Jesu adi Jeliko wosuwaan yokwet lekingon uguk.

² Yokwet unanin me nin wou Sakiyas. Adi muneen bombonnit tina takis mongomongot dinin talitimen hatiluguk.

³ Ala Jesu ungon ulune me u muningon-kabe doktina kakanok kwanaimin tuguk.

⁴ Undun doktina kiyaneen timen woon bem folonin loguk.

⁵ Kan Jesu adi bem u yakuknen woon dadiyeen diween Sakiyas kan ninguk, “Sakiyas, pilap fo! Nu kamin du yokenej wit.”

⁶ Undun nimbune pilap hinek foon Jesu nadifo folon nagila uguk.

⁷ Kan metam hogohogok adi u kan nimunumununeen indin yogin, “Me i me kadakanin titin yolinej nalum ulak.”

⁸ Yopman woon ila Sakiyas adi pilali yali indin ninguk, “Wapum, i nadiwen, nu kougon muneen bombonne lekingon daneen faki fiyewakahidok yembit tina metam yalan yenina bombonhik kubonegut u kedem kibikon wapumgon tubudaneyembit.”

⁹ Undun yoguk kan Jesudibo ninguk, “Du maan Abalaham’walañ yalaki ingon. Undun doktina

kamiñ Bepañdi metam yot yendok maanen iikiñ hidi hehitubu-lodañ hanagitak.

10 Me Kobumuñ adi me fiit tigin yolohiña yehitubu-mintaan yanagile buguk. Adi kwanai unjakoñ tibe buguk.”

Mapmedi udaneñ buña kwanai-me tuwahik didimeneñgoñ yembaak

11 Jesu adi Jelusalem tubudulalune metam adi Bepañ’walañ heben gineñ Hatihati Fafañeniñ agañ mintawe tilak yo nadigin. Tiña ungoñ yali nadilu tomboyoula yoyout mede indin yeninguk.

12 “Me niñ wougigitnit hatiluguk ala heleniñ kwet kweetniñ uune mapme kameniñ yonã uguk.

13 Ala wene tipilapilaye mihiniye 10 katiyen-imbun buune muneñ tumut kubugoñ kubugoñ yemiña yeninguk, ‘Hidi muneñ yeñgoñ moñgola kwanaineñ wapumgoñ yehitubu-mintaneñ.’

14 Unduñ yeñiña uune me noli adi mapme mu ilek nadigin doktiña mebop niñ mede indin yeñiña yeñinkulune mindañ keleen ugin, ‘Indi me i mapme mu hatibek nadiyam.’

15 “Kañ me u agañ wooñ mapme iitdok nin-dapmaune udaneñ buña tipilapilaye mihiniye yenimbune bugiñ. Kañ muneñ dedin yehitubu-mintañit yeninadiwene katiyeninguk.

16 Kañ me timen yakukdi yoguk, ‘Wapum, nu muneñ namguñ wondi kwanainewe muneñ tumut 10 nimañ tomboyoula mintaguk.’

17 “Unduñ yobune ninguk, ‘Kedem hinek tugun. Kwanai me momoon. Du nemek kuyanin u kedem kadokogun doktina ganindapmawe yokwet wapuhi 10 yabudokoluwaan.’

18 “Kanj me nolidibo buña ninguk, ‘Nu muneen namuna ugun wondi kwanainewe muneen tumut 5 nimaan tomboyoula mintaguk.’

19 “Unduñ yobune ninguk, ‘Kedem hinek tugun. Kwanai me momoon. Du nemek kuyanin momoon kadokogun doktina ganindapmawe yokwet wapuhi 5 yabudokoluwaan.’

20-21 “Kanj me nolidibo buña ninguk, ‘Muneenge tumut yon. Du me kongolondan tina undugon me nin di kwanai tubune foloon mintaune du hogok mongotdok nadilan. Unduñ doktina muneenge tubufilaatneñ yona munta tina haulebumdi yauneñ kamegambe hatak.’

22 “Unduñ yobune ninguk, ‘Tipilapilaye me hogoli du, da’walañ medege wendigon mede gineñ gapmelak. Du nu me kongolondan agañ nadinamulan, nu nemek na’walañ mu mongotat tina kwanai mu tilat ingon foloon mintaune mongotat.’

23 Ale du mangonde kamehafit tugun? Muneen yotneñ tina woon kameune kwanaineñ nolineñ mintaune buña mongolit on.’

24 “Unduñ yona metam unon yakin yeninguk, ‘Adi unduñ tuguk doktina muneen mingut u lomtina me kwanai tina muneen tumut 10 yehitubumintaguk mineñ.’

25 “Kanj yogin, ‘Wapum, adi agañ 10 mongolak.’

²⁶ “Unduŋ yogiŋ kaŋ yeniŋguk, ‘Nebek niŋ adi nemek miŋgiŋ u boiŋa hatibune kaŋ tomboy-oulimimbaak, eŋ nebek niŋ nemek miŋgiŋ u mu kame hatibune kaŋ lomtubune hogok hatiluwaak.

²⁷ Agaŋ ale me nediyen nu me mapme mu hatidok nadinamgiŋ u yanagila namandatne folon iŋgoŋ buŋa widihiliwe tineen.’ ”

Jesu donki folon Jelusalemde loguk

(Matiyu 21:1-11; Mak 11:1-11; Jon 12:12-19)

²⁸ Jesu adi mede unduŋ yeniŋa Jelusalemde koom uguk.

²⁹ Woon Oliwa Tuwai gagayen Betefage eŋ Betani yehitubu-dulaan

³⁰ mihiniyat lufom mede indiŋ yeniŋa yeniŋkulu timen ugumuk: “Hidi yokwet gu hatakneŋ woon donki mihiniŋ me nolidi koom nemu loon ila yaugiŋ ungoŋ tehiune yatak u fiyali nagi budemek.

³¹ Fiyalu nebek niŋdi maŋgoŋde fiyakamuk yobune kaŋ, ‘Wapumdi yendegoŋ yoŋak’ yodemek.”

³² Unduŋ yeniŋa yeniŋkulu meyat adi wosuwaan nemenemek Jesudi yeniŋguk undugoŋ hinek tubumintagumuk.

³³ Tiŋa donki mihiniŋ yafiyatu molomdi buŋa “Maŋgoŋde fiyakamuk?” yeniŋguk.

³⁴ Kaŋ yogumuk, “Wapumdi yendegoŋ yoŋak,”

³⁵ yoŋa fiyali hamantiŋa Jesu heki hakiŋnen ugumuk. Wosuwaan dahidahihik wahiniŋ kwihiŋa donki folon iŋa Jesu tubulodaune loon ikuk.

³⁶ Ilaña ulune metamdi dahidahihik wahinin kwihina tali folon gulup itaugin.

³⁷ Woon Oliwa Tuwai kolonen fonila Jelusalem tubudulaune metam Jesu keleyagin bop wapumdi Jesudi nemenemek wapum tuguk wondok Bepan welemomoon nadimina nina tilolon tigin.

³⁸ Tina kakalina indin yogin,
 “Mapme i Wapum wou ginen bulak, Bepandi kahan timimbek!”

“Bepandi welekulema tubumintanimilak doktina adi wou nina tilolon titindok.”

³⁹ Undun togin kan Falisi noli metam banamhik ginen ungon yali Jesu indin nintogin, “Hinale, du metangeye yenimbune wabinen.”

⁴⁰ Ningin kan Jesudibo yeninguk, “Nadiin be. Adi wabinen kan kawade hekidi tonā Bepan nitumbanen.”

Jesu adi Jelusalemdok bulaningon nadiguk

⁴¹ Undun totabuna Jelusalem tubudulaan Jesudi Judahi’walañ yokwet mebi Jelusalem u kan makat kokuk.

⁴² Indin nadiña koyeminguk, “Hidi kaminai yendok kulema ginen hatidok nadiña kadakalenetinjit binek adi kedem, ingon hidi adi dauhik sipmakahi doktina mu kadakalein.

⁴³ Undun doktina nai nin mintawaaknen memikhikdi mik bombonhinit buna hehikelemadiña yahedapmaan

⁴⁴ hidi be wapmihhiye fidihiña hehitapmetukulune maan hidihikumuneen. Hidi Bepandi hehitubu-kedebawe buguk nai u mu

kakiyondagin doktina undun tihamuneen, tina yokwet i tubuliwedapmaneen.”

Jesudi Silonyotnin uyadi ungonin yoguk

(Matiyu 21:12-17; Mak 11:15-19; Jon 2:13-22)

⁴⁵ Mede u yodapmaan Silonyot dinin hamuhe ginen foon metam muneen bombon kibikibi tina hatigin u indin yeniña yehikelepupuheneune foutelegin,

⁴⁶ “Youkudip ginen Bepan’walañ mede indin hatak, ‘Nu yotne uyadi ninadi yot undun yoneen.’ Undun yolak ingon hidi undun tubune kubome heki’walañ hebihathik kwet dabugon tilak!”

⁴⁷⁻⁴⁸ Helemahelemañ Jesu adi Silonyotnen Mede Momoon yoyo tuluguk kañ metam hogohogok adi medenin nadinã nadigalika tagin doktina me Silonyot dinin talitimen wapuhi, en Yodoko Mede hinale heki, en Judahi’walañ me wapuhi adi ulukumundok nadigin ingon metam ginen doktina nadibedi tina wabigin.

20

Judame talitimenhiye Jesudi yeninadiune mede lohigin

(Matiyu 21:23-27; Mak 11:27-33)

¹ Helenin Jesu adi Silonyot dinin hamuhe ginen foon Mede Momoon yeniyenin ha-tulune Silonyot dinin talitimen wapum heki, en Yodoko Mede hinale heki agañ me wapuhi noli adi indin ninadigin,

² “Du nediyendi kwanai i titindok saninin gamuña ganindapmaune tilañ u ninimbune nadinim?”

³ Ninadigiñ kañ adibo yeninguk, “Unduñ yoin ale nubo haninadiwit.

⁴ Jon Imeyout kwanai tuguk u neeñdi nindapmaguk. Bepañdibe, be kwetfoloñ medi nindapmagiñ u nanimbune nadiwit.”

⁵ Unduñ yeninadiune adi mede toboniñ dedin tubu-udanenim yoña nehi ungoñ kiyonadi tigiñ. Tiña yogiñ, “Bepañ yonim adi ninimbek, ‘Kañ hidi mañgoñde medeniñ mu nadisukilitigiñ?’

⁶ Tiña undugoñ metam hogohogokdi Jon-dok polofet niñ doktiña kwetfoloñ me yonene adi kawade moñgola nindihineneñ ale dedin yonim?”

⁷ Unduñ yonadibediña moñ kañ “Mu nadiyam” niñgiñ.

⁸ Kañ Jesudibo yeninguk, “Hidi mu yobihikiñ doktiña nu undugoñ neeñ nanindapmaune kwanai i tilat u nu mañ mu hanimbit.”

*Me kadakahidi wain fiye kadokogiñ
(Matiyu 21:33-44; Mak 12:1-11)*

⁹ Unduñ yeniña metam yoyout mede indin yeninguk. “Me niñ adi wain fiye diniña gim-bahañ ibiña yetiña me kadokodok yehitubumintañ yeninguk, ‘Hidi kadoko hatibune foloñ mintaune daneñ natok niñ boiña hidetok niñ boineñ.’ Unduñ yeniña biyabuña niñkade uguk.

¹⁰ “Ala hatige hatige wain agañ foloñ moñgotdok nai tuguk kañ aditok nenobu boineñ yoña tipilapilayeniñ niñ niñkulune buguk. Kañ me wain fiye kadoko tigiñ hekidi wihitnadiña hogok kameune udaneñ uguk.

11 Wosuwaune kotigon tipilapilayenij nolibo kameune buguk kanj u maanj utubufigitaanj nemek mekanmekanj timinjan kameune hogok udaneguk.

12 Kanj kotigon ninbo kameune buguk kanj me wain fiye kadoko taginj hekidi gibita ulanja tobotoi gimbahanj fatnak kulune foguk.

13 “Undunj tiginj kanj wain fiye molomdi dedinj hinek tibit yo nadinjan yoguk. ‘Kaminj na’walanj mihine welenedi kahilelat kamewe wek kanj moonj timinenj.’

“Undunj yonjan kameu buguk

14 injonj me wain fiye kadoko tiginj heki adi kanj yoginj, ‘Adi kuyendi hatigene wain fiye i kahilewaak onj! Undunj doktinjan ulukumunjan wain fiye i indetok kahileneem.’

15 Undunj yonjan nagila gimbahanj fatnak kameenj ulukumunjinj.”

Jesu adi undunj yenindapmaanjin indinj yeninadiguk, “Undunj tubune wain fiye molom adi dedinj tibek?

16 Wabinjan ne bunjan me wain fiye kadoko tiinj u widihikumunjan wain fiye u me nolidok yembek.”

Jesudi undunj yobune metamdi nadiu tuwot mu tubune indinj yoginj, “Hidige! Undunj hinek mu titindok!”

17 Undunj yolune yabuhohone tinjan indinj tubu-udaneyemguk, “Undunj injonj, manjonjde Youkudip Mededi indinj yolak?

‘Yot mamananme hekidi taka fofoonj ninj monj yo tukukinj, injonj taka u mindanj kade taka kobumunj mintaguk.’

18 Unduñ doktiña nediyeñ taka kobumuñ wendok foloñ maan ulaak adi umunumunuke tibaak. En taka kobumuñ wendi me niñ foloñ foloñ maan utubukadakaan ufilifiliye hinek tibaak.”

Jesu takis muneñdok ninadigiñ

(Matiyu 21:45-46; 22:15-22; Mak 12:12-17)

19 Unduñ yobune me Silonyot diniñ talitimen tiña Yodoko Mede hinale heki adi yoyout mede u aditok nadiña yenilak u agañ nadikiyondaan nai unjaningon honeeñ uurdok nadigiñ ingon metam doktiña nadibediña wabigiñ.

20 Wabiña kakuwali dedin tiña honeeñ gapman heki'walañ kohohik foloñ kamenim yona talii lohigiñ. Tiña me noli yeningkulune me momohi namandap tiña keleen wanañ yaugin.

21 Keletawoon Jesu indin ningin, “Hinale, indi du nemenemek yolañ u talii folongon biyagon yolañ u agañ nadiyam, tiña kwetfoloñ me lolonfofonhinit yabumunta mu tiña Bepañ'walañ mede foloñ ninilañ

22 doktiña ninimben. Indi Lomahi'walañ mapme Sisadok takis kameyam u du nadiune kedem be tilak be moñ?”

23 Unduñ yogin kañ Jesudi welehek maanen kadapmaan muneñ ningdok yenimbu mingin kañ tiña loon kameyali indin yeninadiguk,

24 “Welewele tiña kudi i nedi'walañ?”

25 Kañ yogin, “Sisa'walañ.”

Ningin kañ yeninguk,”

26 Metam namandahik ginen unduñ yenimbu honedok talii lohina medeñin yoguk u nadiña boho tiña mede lohi tigin.

Sadusi hekidi kumuŋ gineniŋ kaikaan pilapilat-dok Jesu ninadigiŋ

(Matiyu 22:23-33; Mak 12:18-27)

²⁷ Unduŋ tigiŋ kaŋ Sadusi hekidibo Jesu nina-dine bugiŋ. Me heki u metam kumuŋa koti mu pilatneen yoyagiŋ ala buŋa ningiŋ,

²⁸ “Hinale, Mosesdi Yodoko Mede indin youtninguk, ‘Me niŋ adi tam tiŋa wapmihi nemu yehitubu-mintaan kumumbune kaŋ me wendiniŋ kwayandibo tam kahat uŋakoŋ nagila wapmihi me kumuŋ tugukdok yehitubu-mintamiluwaak.’

²⁹ Heleniŋ hekidalit 7 hatigiŋ ala Tuwodi tam niŋ nagikuk. Nagila wapmihi nemu yehitubu-mintaan kumuŋguk

³⁰ kaŋ Monedibo tam uŋakoŋ nagikuk. Adi maan unduŋoŋ wapmihi nemu mintaune kumuŋguk,

³¹ kaŋ Gikdibo tam uŋakoŋ nagikuk. Unduŋ hogok titawoon kwayahik dikineŋdi nagila kumumbune

³² tam u maan hogok hatiŋa kumuŋguk.

³³ Me hekidalit 7 adi tam kubuŋoŋ uŋakoŋ nagikiŋ ala kougoŋ nai wapum foloŋ pilatneenen tam u neditok tibaak?”

³⁴ Unduŋ ninadigiŋ kaŋ yeniŋguk, “Kobuk nai yendok adi metam hekimalam tiŋ

³⁵ eŋ kougoŋ metam Bepaŋdi yabune tuwot tubune kumuŋ gineniŋ yehitubu-pilalu hatineen uŋaniŋ adi hekimalam mu tineen.

³⁶ Adi kumuŋ gineniŋ pilali Bepaŋ’walaŋ wapmihi tineen doktiŋa aŋelo heki dabuŋoŋ hatiŋa kumuŋ mu tineen.

³⁷ Tiņa Mosesdi kumuņa pilatdok biyagon hinek yodakaleguk. Bepañ'walañ kudupdi bem daguk nai unaniñ Wapumdi indin yoguk, 'Nu Abalaham eñ Aisak tiņa Jekop heki'walañ Bepañ.'

³⁸ Adi yadi kumuhi'walañ Bepañ moñ. Adi yadi kaipmuhi'walañ Bepañ. Biyagon hinek, adi'walañ metamñiye kumundapman mu tiin, adi'walañkade adi kaipmun hatiin."

³⁹ Unduñ yobune Yodoko Mede hinale heki adi niñgin, "Hinale, mede momoon hinek tubu-udanelañ."

⁴⁰ Tiņa kotigon ninadidok munta tiņa wabigin.

Jesudi metam ne'niñ mebidok yeninadiguk

(Matiyu 22:41-46; Mak 12:35-37)

⁴¹ Jesudi indin yeninadiguk, "Hidi mangonde Kilisto adi Dewit'walañ yalakinin yoin?"

⁴² Dewit ne Kap ginen indin youkuk, 'Wapumdi nu'walañ Wapumne indin ninguk, "Du kohone didimeninnejkade itune

⁴³ me mikgeye kayoge falipmen yapmewaat."'

⁴⁴ Dewit adi 'Wapumne' ninguk kañ dedin tiņa Kilisto adi Dewit yalakinin tilak?"

Jesudi mihinjiye mute mede yeninguk

(Matiyu 23:1-36; Mak 12:38-40; Luk 11:37-54)

⁴⁵ Metam fee adi ungon yanadilu mihinjiye indin yeninguk,

⁴⁶ "Yodoko Mede hinale heki fiyen doktiņa nadinadinjila hatiyaneen. Adi yadi tinahukut kweheyehi tiņa yowawaliwen uune metamdi momoon tiyemiņa yeniutumba titindok nadiin.

Tiŋa hinamuni nai gineŋ be bopyotneŋ me wohiyenit'walaŋ pop foloŋ iitdok nadiiŋ.

⁴⁷ Tiŋa adi yadi tam kahat heki yalaŋ yeniŋa bombonhik yolom mongokindigoŋ metamdi yabudok yoŋa ninadi kweheyehi hati tiŋ. Adi kougoŋ kibikoŋ malabumuŋ wapum mintayembaak.”

21

*Tam kahat niŋdi muneen-kabe behatiguk
Bepaŋdok kamedapmaguk*

(Mak 12:41-44)

¹ Unduŋ tiŋa Silonyotneŋ uŋgoŋ Jesudi yayabulune me muneen bombonhinit adi siloŋ malin foloŋ muneen looŋ boiŋ.

² Kaŋ tam kahat fiywakaŋ niŋ adi buŋa muneen gimihlufom boiguk kaŋ

³⁻⁴ Jesudi u kaŋ metam indin yeniŋguk, “Biyagoŋ hinek hanilat, metam hogohogok noli muneenhik boiŋit inŋoŋ dumunhikdok uŋgoŋ halune boiŋit. Kaŋ tam kahat fiywakaŋ yeŋ adi ukabe boihatilak agaŋ boidapmanak doktiŋa adi boiŋak adi noli yalakapmeŋ tiŋa wapumgoŋ boiŋak.”

*Jesudi nai dapmawe tulune maŋgoŋ mintawaak
wondok kigili mede yoguk*

(Matiyu 24:1-14; Mak 13:1-13)

⁵ Jesu mihiŋiye noli adi Silonyot kawade fofohidi magin en nemenemek fofohi siloŋdok boiyagin u yabunadigalika tiŋa yogin, kaŋ Jesudi yeniŋguk,

6 “Yot be nemenemek yabuᅇa yoiᅇ wendok hanimbit. Nai niᅇ mintawaakneᅇ uᅇoᅇ nemenemek yabu yoiᅇ i memik hekidi ubulagineeᅇ youpupuhene-kudapmaune molomolom mapupuheneeᅇ ila uneeᅇ.”

7 Unduᅇ yenimbune niᅇgiᅇ, “Hinale, nemek u nai deniᅇ mintawaak, tiᅇa nai dulaune timen maᅇoᅇ mute mintawaak?”

8 Unduᅇ yonadigiᅇ kaᅇ yeniᅇguk, “Tikamanda tihamuᅇa nadinadihik tubugiyondaneeneᅇ ala nadinadiᅇila hatiyaᅇeeᅇ. Metam feedi buᅇa nu wotnene foloᅇ yokamanda indiiᅇ tineeᅇ, ‘Nu na iᅇakoᅇ.’ be ‘Nai agaᅇ dulalak.’ Iᅇoᅇ hidi adi u mu yehikeleneeᅇ.

9 Hidi mik wapum mintaune gigilitᅇiᅇ nadi-neeᅇ, be mik kwet niᅇkade gwaᅇ mintawe tubune gigitᅇiᅇ hogok nadiᅇa munta mu tineeᅇ. Nemenemek undihi timen mintaneeᅇ iᅇoᅇ nai wapum adi pilap mu mintawaak.”

10 Tiᅇa tomboyoula indiiᅇ yeniᅇguk, “Kwetkwet metam bop wapum be bop kuyaᅇiᅇ adi nehi uᅇoᅇ kibikibi mindobuneᅇ.

11 Kaᅇ nai uᅇaᅇiᅇ kenim wapuhi kwetkwet mintatawaak, eᅇ map wapum mintawaak, eᅇ yagit mebimebi mintawaak, eᅇ kunum gineᅇ adi nemek muntaᅇ muntaᅇ uᅇoᅇiᅇ mintawaak.

12 Nemek u kougoᅇ mintaneᅇ yoaᅇ timen adi hidi nutok tiᅇa hanagila fidihia folofigita hamneeᅇ, tiᅇa hanagila bopyotneᅇ fooᅇ mede-hik nadiᅇeeᅇ. Yot fafaᅇeᅇiᅇneᅇ hapmeneᅇ, eᅇ hanagila mapme be me wapuhi heki’walaᅇ uneeᅇ.

13 Kaŋ nai uŋaŋiŋ hidi Mede Momoŋ yohautadok naihiŋ mintawaak.

14 Kaŋ hidi nai uŋaŋiŋ adi namandahiŋ gineŋ yaliŋa mede dediŋ yoniŋ yonŋ nadihebet mu tineeŋ.

15 Nu nai uŋaŋiŋŋoŋ nadinadihiŋ be mahiŋ tubulodawene yoneeŋ kaŋ me tobohi adi medehiŋ ulatifofonŋdok taliŋ lohi tineeŋ.

16 Tiŋa nai uŋaŋiŋ mehiŋ-behiye, be dahiŋ-kwayahiye, be mehimehiye, be nohiye nehigoŋ maŋ bolik tihamneeŋ kaŋ noli hidi fidihikumunŋ tineeŋ.

17 Tiŋa metam hogohogok nutok tiŋa hidi habukwihita tineeŋ,

18 iŋgoŋ nu habudokowe kihik hapmunŋ kubugoŋ-kabe nemu filaak.

19 Unduŋ doktiŋa fafaŋe tiŋa hatiŋa Hatihati Kobuli kahileneeŋ.”

Jelusalem yot mebi diniŋ mede

(Matiyu 24:15-21; Mak 13:14-19)

20 “Hatiŋa kaneŋ, Jelusalem yokwet mikmedi buŋa yakelemadiune Jelusalem yokwet tubukadakadok nai agaŋ tilak nadineeŋ.

21 Unduŋ doktiŋa indiŋ tineeŋ. Me Judiya kwetneŋ hatineeŋ hidi momoŋ tuwai foloŋ loneeŋ, kaŋ me yokwet wapum maaneŋ hatneeŋ hidi momoŋ foŋ bu uneeŋ, kaŋ me fakaŋ hatineeŋ hidi momoŋ tobo yokwet wapum maaneŋ mu foneeŋ.

22 U kadakaninŋhiŋ diniŋ kibikoŋ tubudaneyemdok nai tibaak. Unduŋ tubune Yodoko Mededi yolak u foloŋ mintawaak.

²³ Hidige! Nai unanin, tam mihiwelehinit en tam eyan'hinit adi kada, dedin tineen. Tina undugon kwet yendok malabumun wapum hinek mintaune Bepan'walañ kwihitadi metam yendok folon mintayembaak.

²⁴ Metam noli miknon'di widihikumun'a noli kohohik ibikilitina yanagila kwetkwet udapmaneen. Kan me Judahi'walañ feknit mokit heki Bepan mu nadimiin adi Jelusalem yokwet kahileen tubukadakalune Bepan'di nai yoguk folongon dapmawaak."

*Bepan'walañ mede mu liwewaak
(Matiyu 24:29-35; Mak 13:24-31)*

²⁵ "Nai unanin mele, muyakip, bamholina heki nemek ungonin hinek mintayembaak. Kan metam hogohogok adi imengwan wapumdi tingiyondaan muhila gigilit tobune nadin'a munta tina sanjinin lohineen.

²⁶ Kan kunum mahamulune nemenemek unon ikiin hogohogok iithik giyondaune kwetfolon inon metamdi 'I mangon mintalak' yona welemulap tina kumungweheye tina tineen.

²⁷ Kan nai unanin Me Kobumun adi mulukwan folon hauta holiholine tina sanjinin wapumnit busuwaune kaneen.

²⁸ Ala nemek undihi mintaune 'Ninigitdok nai agan dulalak' yona dadiyeen kunum ginen diween nadifo tina yatneen."

²⁹ Undun yona Jesudi kotigon yoyout mede nin indin yeninguk, "Bem kone u kan nadineen.

³⁰ Hapmun maan gitipmun labune meleyan nai yoyam.

³¹ Undugon hinek nemek u mintaune kan Bepañ'walañ Hatihati Fafañeniñ agañ dulalak yoneeñ.

³² Tiña i biyagon hinek hanimbit, metam kumundapman mu tulune nemenemek i mintawaak.

³³ Kunumkwet adi liwedemeek ingon nu'walañ medene adi tuwot mu liwewaak.”

Hidi welehidki damo kaipmun hatinila ninadi kwanai youdihinit tiña hatiyaneeñ

³⁴ “Hidi kwetfolon dok nadinadi hogok hatina kwetfolon tinagalika tiña ime fafañeniñ naañ nadibubuyeeñ hati tolune nai wapumdi begep gineñ kale widihiñ dabugon fidihiwaakneñ ale hidi nadinadinale hatiyaneeñ.

³⁵ Nai wapum adi metam hogohogokdok mintayembaak doktiña hanilat.

³⁶ Ale gweheye bilinteletnit mokit hatina nemenemek u yalakapmedapmaan Me Kobumun namanda folon sañiniñnit mintayatneendok ninadi kwanai taneñ.”

³⁷ Jesu adi helemahelman hadapmo Silonyotneñ foon Mede Momoon yeniluguk ala bufaune Oliwa Tuwai folon unon deituguk.

³⁸ Ala heleune hanin metam woon Silonyotneñ bopneune Mede Momoon yeniluguk.

22

Judasdi Jesu mikme kohohik folon kameñdok yofafañeguk

(Matiyu 26:1-5, 14-16; Mak 14:1-2, 10-11; Jon 11:45-53)

¹ Belet haguwonit mokit sipakan dinin hinamuni titindok en Anelodi Yabukiyondaan Yalakapmeguk wondinin nai dulaguk.

² Kan Silonyot dinin talitimen heki tiña Yodoko Mede hinale heki adi metamdok munta tiña Jesu dedin tiña ulukumunim yoña talii lohigin.

³ Kan Sadañdi Jesu mihiniñ nin, Judas Kaliotnin adi welen maanen foguk.

⁴ Kan Judasdibo Silonyot dinin talitimen, en mikme wapuhi Silonyot kadokoyagin heki'walañ woon mintayemiña Jesu adi kohohik folon kameñdok yeninguk.

⁵ Kan adi u nadiña nadifo wapum hinek tiña muneen mimiñdok yogin.

⁶ Judas adi mede u yofolokeneen nai nin metam feedi mu bopneune nai unaññ Jesu kabup mikme heki kohohik folon kameñdok yoña woom hatiguk.

Jesu mihiniye dut nanaje nonjon nanandok tiulidokogin

(Matiyu 26:17-25; Mak 14:12-20; Jon 13:21-30)

⁷ Belet haguwonit mokit, sipakan dinin hinamuni nai tubune Anelodi Yabukiyondaan Yalakapmeguk wondok dompa widihigin nai dulaune

⁸ Jesudi Pita dut Jon yeningkula indin yeninguk. “Hidi udemek woon nanaje muni tiulidokodemek kan woon habuña nanim.”

⁹ Kan adibo ninadigumuk. “Dan tiulidokodim nadilañ?”

Unduñ ninadigumuk kan adibo yeninguk,

¹⁰ “I nadidemek, hidi woonj yokwet wapunner wosuwalune me ninj ime kabotnit bunja hehitubumintawek. Kanj me unjakonj keletawoonj adi yot danj fowekneñ ungonj fodemek.

¹¹ Foonj yot molom indinj nindemek, ‘Hinaledi indinj ganilak. Mihineye indi Anjelodi Yabukiyon-daanj Yalakapmegukdok nanane nanimdok yot-maanj denjak?’

¹² Undunj nindemek kanj adi yotmaanj wapum foloninj, kumopop enj falik ila nanane nanañdok aganj koom tiulidokoginj u hanimbune nanane ungonj tiulidokodemek.”

¹³ Undunj yenimbune woonj Jesudi yeninguk undugonj hinek tubumintaanj Anjelodi Yabukiyon-daanj Yalakapmegukdok nanane tiulidokogumuk.

Jesu mihinjiye dut nanane nongonj nagin

(Matiyu 26:26-30; Mak 14:21-26; 1 Kolin 11:23-26)

¹⁴ Aganj nai tubune Jesu adi mihinjiye dut nanane falik ikelemadiña nanane nagin.

¹⁵ Ila nanila indinj yeninguk, “Nu tebele yendok Anjelodi Yabukiyon-daanj Yalakapmeguk wondok nanane i hidigut nanañdok hinek nadilat. Nadap-maanj mindanjcade adi folofigita folonj lowit.

¹⁶ Undunj doktiña indinj hanilat. Nu hinamuni indininj kotigonj nemu naanj kanj hatigene kougong Bepanj’walañ Hatihati Kobuli mintaune ungonj nawaat.”

¹⁷ Undunj yonja ime tout tiña Bepanj niutumbaanj yeninguk, “I tiña ikiinj indigonj silotnanenj.

¹⁸ Tiña indinj hanimbe nadinenj. Nu wain kwetfolonj inonj kotigonj nemu naanj hatibene

kougoŋ Bepaŋ'walaŋ Hatihati Uŋgoŋiŋ mintaune nawaat.”

19 Unduŋ yoŋa beletbo tiŋa Bepaŋ niutumbaaŋ wobuŋa yemiŋa yeniŋguk. “I na'walaŋ foloone, hiditok gigit tibek yoŋa hamulat. Nu nadisunamuŋa unduŋ taneeŋ.”

20 Nanaŋe nadapmaaŋ koti koom tuguk unduŋ wain tout tiŋa indiŋ yeniŋa yemguk, “Wain ime yoŋ adi na'niŋ naŋgatne u yofolok kobuli titiŋdok yoŋa kwatnelat.

21 Tiŋa indiŋ nadineŋ, nebek niŋ nu memik kohohik foloŋ napmewek adi nukut nanaŋe noŋgoŋ ila nayamut.

22 Me Kobumuŋ adi Bepaŋdi yohebet tuguk indigoŋ keleeŋ wooŋ kumumbek, iŋgoŋ me nagila memik kohohik foloŋ kamewek adi kada yadi malabumuŋ wapum hekiwaak.”

23 Unduŋ yobune nehi uŋgoŋ kiyonadi tiŋa indiŋ yogiŋ, “Kudi undiniŋ u me neeŋdi yo tibek.”

Mewoidi talitimeŋ mintadok siwe tigiŋ

24 Jesu mihiniŋye adi, nehi'walaŋ lekiŋgoŋhik gineŋ nediyeŋ talitimeŋ tilak yoŋa siwe tigiŋ.

25 Kaŋ Jesudibo yeniŋguk. “Me nadisukilitihinit mokitdi mapme ila metam nadiyembu foune tipilapilaye kwanai titiŋdok yeniŋgigine tiŋ, tiŋa adi metamdi yeniutumba tiŋ doktiŋa wohiyenit.

26 Iŋgoŋ hidi yadi unduŋ mu taneeŋ. Me nediyeŋ lolonŋit hatibe nadiwaak adi yadi timenŋ fofonŋit hatiluwaak. Kaŋ me talitimeŋ adi unduŋ tipilapilaye-me wele hatiŋa hehitubulodalawaak.

27 Hidi nanimbu nadiwit, neenđi me loloŋnit? Me kweliŋgoŋ ila nanan hogok tibek u be, be me nanane kidila timiŋa bek? Me kweliŋgoŋ ila nanan hogok tibek adi me loloŋnit, unakoŋ. Kuŋgoŋ nu adi hidi'walaŋ lekiŋgoŋhik ginen tipilapilaye-mehik hatilat.

28 Tikamanda mintanamguk hogohogok u hidi mu binabugiŋ, wanaŋ hatine mintanamguk.

29 Nu batnedi kwet i kadokodok nanindapmaguk, undugoŋ nubo kwet i kadokoneeŋdok hanindapmalat.

30 Unduŋ dokti nu yotnekwetneneŋ nanane ime noŋgoŋ naneem, tiŋa hidi mapme'walaŋ kumopop foloŋ ila Isilaehi metam bop 12 hatiŋ hogohogok u yabudokoneeŋ.”

Jesudi Pita mute mede niŋguk

(Matiyu 26:31-35; Mak 14:27-31; Jon 13:36-38)

31 “Saimon, indiŋ nadiweŋ, Sadaŋ adi nadisukilitihik mahamule tiulidoko tilak, ala kopi utnene gitnem niŋ wiŋ kaŋ folooŋ niŋ wiŋ unduŋ dabugoŋ hehidanewe yoŋak.

32 Kuŋgoŋ nu du gehitubu-lodaŋ nadisukilitigedi mu gweyehewekdok ninadi kwanai agaŋ tiŋat. Unduŋ doktiŋa nu'walaŋkade udaneŋ buŋa nokeye saŋiniŋ yemiŋa yehitubukilitibaŋ.”

33 Kaŋ Pitadibo niŋguk “Wapum, nu dukut noŋgoŋ yot fafaŋeniŋneŋ fofonđok be kumuŋ titiŋdok u kedem nadilat.”

34 Kañ Jesudibo yoguk, “Pita, indin ganimbe nadiwen. Kamin timin yendok pupupdi mu kutilune du nu mu nadinamulan nai lufomkultin yoben.”

Muneen en lik, tinja miknon dinin kahat

35 Undun yonã Jesudi mihinje indin yenediguk, “Koom haninkule muneen be lihik be kayonnamokop mokit ugin nai unanin nemek nolidok lohilohi neenbe tigin?”

Kañ adibo yogin, “Mokon.”

36 Kañ Jesudibo indin yeninguk, “Kamin adi nebek nin muneen be liknin nit kan u maan mongolek. Kan me nediyen miknonnin mon kan dahidahinin me nolidok yembune tuwaune muneen u mongola miknonnin tuwawek.

37 Yodoko Mededi indin yolak doktina hanimbe nadinen, ‘Adi me kadakanin titin nindapmanen.’ U biyagon hinek nu’walañ mintawek. Biyagon hinek nemenemek Yodoko Mededi nutok yolak u agañ biyagon mintawek.”

38 Kañ adibo yogin, “Wapum, i kawen indi miknonnik lufomuk.”

Kañ adibo yeninguk, “U tuwot.”

*Jesudi Getsemani unon ninadi kwanai tuguk
(Matiyu 26:36-46; Mak 14:32-42)*

39 Undun tinã Jesu yokwet wapum bikabuna foon woon fen tuluguk undun Oliwa Tuwai folon loune mihinje maan kelegin.

40 Wosuwaan yeninguk, “Tigene tikamanda ginen gweheyeen maneenen doktina ninadi kwanai tinen.”

41 Unduņ yeniņa ne kabe-kweetniņ kawade kutne wooņ maiņ wendok tuwot wooņ mulelem tiņa ninadi kwanai tuguk.

42 Induņ ninadiguk, “Me baņ, du nadiune tuwot tubune kaņ folofigita i nolomtibeņ. Ingoņ nu yolat wondokti moņ, da nadilaņ unduņ tibeņ.”

43 Unduņ yolune kunum gineniņ aņelo niņ fooņ saņiniņ miņguk.

44 Kaņ Jesu adi nadimalabuda tiņa ninadi kwanai gibita tulune mimindiņiņ adi naņgat dabugoņ kwetfoloņ hadokomaguk.

45 Adi ninadi kwanai tubudapmaaņ pilali mihiņiye yabe uguk, wooņ yabulu adi damo deihakiņ. Adi welebulagitdi yehitubu-gweheyeune deihakiņ

46 kaņ yeniņguk, “Maņgoņde damo kwanai hogok tiņi? Hidi tikamanda gineņ gweheyeeņ maneeneņ ale pilali ninadi kwanai tineņ.”

*Judasdi Jesu mikme kohohik foloņ kameguk
(Matiyu 26:47-56; Mak 14:43-50; Jon 18:2-11)*

47 Jesu adi mede hayenilu metam bop wapum busuwagiņ. Mihiniye 12’walaaniņneņ me niņ wou Judasdi talitimeņ tiyemguk. Adi Jesu siņgoņgome tibe loune

48 Jesudi indiu niņguk, “Judas, dagoņ hinek Me Kobumuņ siņgoņgomeeņ memik kohohik foloņ kamelaņ.”

49 Jesu mihiniye ne gut hakiņ adi nemek u mintawe tubune kaņ yogiņ, “Wapum, kedem be indi miknoņdi widihinim?”

50 Kaņ mewoi lekiņgoņhik gineņ me niņdi Silonyot diniņ talitimeņ wapum’walaņ

tipilapilaye-meniņ magi didimeniņnenkade filodiguk.

⁵¹ Kaņ Jesudi yeninguk, “Hidi unduņ mu tinenj.” Unduņ yeniņa kohonj me wenj magi folonj kame-une magi kotigonj utumbaguk.

⁵² Kaņ Jesudi Silonyot diniņ talitimenj heki enj Silonyot kadoko diniņ me wapuhi enj talitimenj heki honene bugiņ adi indinj yeninguk, “Hidi nu mikbe tubupilale tilat doktiņa miknonj enj tebe bohom tiņa nohonene bunjt?”

⁵³ Nu helemahemanj hidigut Silonyotnenj hatilat, kaņ nai unaniņ manņonde mu nohoneinj? Kuņņonj kamiņ adi mambip molom’walaņ saņiniņdi fafaņe hinek tilak doktiņa hidi’walaņ nai tilak.”

Pitadi Jesu mu nadimilat yoguk

(Matiyu 26:57-58, 69-75; Mak 14:53-54, 66-72; Jon 18:12-18, 25-27)

⁵⁴ Unduņ yodapmaune honeenj nagila Silonyot diniņ Talitimenj Wapum’walaņ yolineņ ugiņ. Kaņ Pita adi gikiņņonj yali yayabukuwali uguk.

⁵⁵ Wosuwaanj yot maanenj foonj woonj gimbahanj maanenj kudup heu daune ikiņ, kaņ Pitadi metam unonj ikiņ u yehitomboyoula ikiņ.

⁵⁶ Kaņ tipilapilaye tamkuya niņdi kudup dahauta tugukneņ unņonj ila kakiyondaanj yoguk, “Me yoņ adi Jesu gut nonņonj hatilak.”

⁵⁷ Unduņ yoguk kaņ Pitadibo niņguk, “Nu me u mu nadimilat.”

⁵⁸ Muniniņ ila me niņdibo Pita kakiyondaanj niņguk, “Nohik niņ du iņakonj.”

Unduņ yoguk kaņ Pitadi niņguk, “Nu mokoņ.”

⁵⁹ Kañ kabe-yagigigon ila kotigon me niñdibo fafañençon indin niñguk, “Biyagon hinek, me yon adi Galilinin. Adigut inçon hatilak.”

⁶⁰ Unduñ yobu Pitadi indin yoguk, “Nu me u yolan u biyaku mu nadimilat.” Unduñ ila yolu nai unañençon pupup kutiguk.

⁶¹ Kañ Wapumdi fakaleen Pita didimençon hinek kaguk. Kañ Pita adi wapumdi mede indin niñguk u naditomguk. “Pupupdi mu kutilune du nu mu nadinamulan nai lufomkulitniñ yoben,”

⁶² niñguk u naditomunã fakan fowoon makat gibitan kokuk.

*Jesu nimpekit tiña ula kagege tigin
(Matiyu 26:67-68; Mak 14:65)*

⁶³ Kañ me Jesu honeen kadokogin hekidi nimpekit tiña ukin.

⁶⁴ Tiña namanda hauledi folokenehep tiña indin ninadigin, “Du polofet biyagon nobu hatiliwen kan nebek gutak u kedem ninimbu nadinim.”

⁶⁵ Unduñ tiña mede kadakahi fee noli maan niñgin.

Jesu me wapuhi en talitimen namandahik folon yakuk

(Matiyu 26:59-66; Mak 14:55-64; Jon 18:19-24)

⁶⁶ Unduñ hati tulune helehautaune Silonyot dinin talitimen wapuhi tiña Judahi walan me wapuhi en Yodoko Mede hinale heki bunã bopnegin. Kañ Jesu nagila bophik ginen loune niñgin,

⁶⁷ “Du Kilisto nobu kan ninimben?”

Ninadigin kan adibo yeniñguk, “Nu hanimbe hidi medene tuwot mu nadinen.

⁶⁸ Be hidi kibi nu haninadi tibit u tuwot mu yonej.

⁶⁹ Ingon Me Kobumun adi kamin tububihila Bepan Saninin Molom kohon didimeninnekade ila woon ilaak.”

⁷⁰ Undun yeninguk kan adi wanakan indin ninjin, “Undun doktina du Bepan mihinjin kube?”

Ninin kan adibo yeninguk, “Hide yoin unakon, nu adigon.”

⁷¹ Undun yobune adibo yogin, “Indi inde agan ne’wala manin ginej mintaune nadiyah doktina kotigon aditok mede mu yodok.”

23

*Jesu mede titindok nagila Pailat’wala login
(Matyu 27:1-2, 11-14; Mak 15:1-5; Jon 18:28-38)*

¹ Undun yona nongon piladapmaan Jesu nagila Pailat’wala login.

² Loon mede ginej kameen indin ninjin, “Me yon adi indi’wala metamniye talik moinin yanagitak, tina Lomahi’wala gapmandok muneen mu mimindok yona kamehep tiyemulak. Tina netok adi Kilsto, Mapme yolak.”

³ Undun yogin kan Pailatdibo ninadiguk, “Judahi’wala me mapme du-ku be?”

Kan Jesudibo ninjuk, “Yolan unakon.”

⁴ Yobune Pailatdibo Silonyot dinin me wapuhi en metam bop wapum u indin yeninguk, “Nu me yen’wala kadakaninjin nemu kalat.”

⁵ Undun yeninguk ingon adi fafanenon indin yogin, “Adi Galili kwetne gwan tububihila

metam nadinadihik tubugiyonda tiŋa buŋak, bu i busuwalak.”

Jesu kameu Helot'walaŋ uguk

⁶ Pailat adi u nadiŋa yeninadiguk, “Me i Galiliniŋ be?”

⁷ Unduŋ yeninadiguk kaŋ adibo indiŋ yogiŋ, “Jesu adi Helotdi kwet diki kadokolak uŋaniŋ.” Unduŋ yobune nadiŋa kameune Helot'walaŋ uguk. Nai uŋaniŋ Helot adi maŋ Jelusalem uŋoŋ hakuk.

⁸ Helot adi gigitŋiŋ nadiŋa kakaŋdok koomgoŋ hatinadiluguk. Unduŋ doktiŋa adi Jesu kaŋ nadifo tuguk. Tiŋa undugoŋ kudi niŋ tubune kakaŋdok yoŋa hatiguk.

⁹ Unduŋ doktiŋa Helotdi ninadi fee tuguk, iŋgoŋ Jesudi kibi nemu tubu-udanemiŋguk.

¹⁰ Kaŋ Silonyot diniŋ talitimeŋ wapuhi eŋ Yodoko Mede hinale hekidi yamaŋgoŋ uyeŋ yali niŋgigine tiŋiŋ.

¹¹ Kaŋ Helot tiŋa mikmeŋiye adi Jesu tihilihili timiŋa nimpekit tiŋiŋ. Untiŋa mapme diniŋ dahi-dahi fofoŋ niŋ tiŋa dahimiŋa niŋkulu kotigoŋ Pailat'walaŋ uguk.

¹² Helot adi koom Pailat memik timiluguk, iŋgoŋ nai uŋaniŋ menot tugumuk.

Pailatdi Jesu kolonɔabek foloŋ uutdok yodapmaguk

(Matiyu 27:15-26; Mak 15:6-15; Jon 18:39-19:16)

¹³ Pailatdi me Silonyot diniŋ talitimeŋ eŋ me wapuhi tiŋa metam hogohogok wanakaŋ katiyeniŋbu buŋa bopneune

¹⁴ yeninguk, “Hidi me i metam yeningalika tiņa talik moin yanagitak yonņa nagila nu’walaņ bunjit. Kaņ nu hidi namandahik foloņ hinek mede yendok ninadiņat, iņgoņ mede folooņ nemu tubumintaņat kaņ hidi me i mede foloņ kamefit tiņ.

¹⁵ Helotdi maañ mede moņ lohikaañ koti kameune indi’walaņkade bunjak. Me i kadakaninņiņ nemoņ doktiņa indi ulukumunfit tuwot mu tinim.

¹⁶ Unduņ doktiņa hogok wihitnadiņa kamewe wek.”

¹⁷ Adi’walaņ uņoņ talik indin hatuguk. Gulet indigoņ Pailatdi me yot fafaņeniņneņ hakagiņ u kubugoņ kubugoņ yenindapmaune fooņ wagiņ.

¹⁸ Unduņ doktiņa metam hogohogokdi kakaliņa indin yogiņ, “Me u ulukumunņa Balabas bikabu bek.”

¹⁹ Balabas adi gapman gut mik tiņa me niņ ulukumunjuk kaņ nagila yot fafaņeniņneņ kamegiņ.

²⁰ Unduņ tiņa Pailatdi kotigoņ Jesu bikabune uuņdok yeninguk.

²¹ Iņgoņ adi kakaliņa yogiņ, “Koloņdabek foloņ kumumbek! Koloņdabek foloņ kumumbek!”

²² Yobune Pailatdi kotigoņ indin yeninguk, “Me i maņgoņ yom hinek tiņak? Nu yomniņ nemu kaņat ale maņgoņde ulukumunfit tinim. Unduņ doktiņa wihitnadi hogok tiņa kamewe wek.”

²³ Unduņ yeninguk iņgoņ metam adi gigne tiņa Jesu koloņdabek foloņ uutdok yogiņ.

²⁴ Tiņa kakalihikdi Pailat’walaņ medeņiņ ulat-ifoguk. Untubu wabiņa Pailatdi medehik keleen undugoņ mintawek yodapmaguk.

25 Kañ metam'walañ medehik keleen Balabas bikabuyemiña Jesu mikme kohohik foloñ kameguk.

Jesu koloñdabek foloñ ukiñ

(Matiyu 27:32-44; Mak 15:21-32; Jon 19:17-27)

26 Mikme heki Jesu nagila ugiñ. Uñila talipmenñ me niñ tubumintagiñ, wou Saimon, adi Sailini yokwetneñniñ, ala kobugoñ buña yokwet wapumneñ fowe buguk. Kañ honeñ Jesu'walañ koloñdabek u kaluwañniñ foloñ kameñ niñgigineune bemña Jesu keleguk.

27 Metam bop wapumdi kelegiñ, kañ adi lekiñgoñhik gineñ tamwoi noli adi kabulagitaan makat kola keletaugiñ.

28 Kañ Jesudi udaneñ indin yeniñguk, “Jelusalemhi tamwoi, hidi nutok mu kotneñ, hidetok eñ wapmihiyedok nadi kotneñ.

29 Nadiin be. Hatigene nai niñ dulaune metandi indin yoneñ, “Tamwoi wapmihi mu yanagikin hidi kedem nadifo tinen.’

30 Nai uñaniñ metandi kweboboe heki indin yenineñ, ‘Goloñ fooñ nihikufulanen.’

31 Nemek indiniñ adi bem kaipmuñ gineñ tiin, ingoñ kumuñ gineñ adi dedin timineñ?”

32 Me kadakanin titin yakat lufomuk adi maan Jesu dut kumuñdok yoña yanagila ugiñ.

33 Woon kwet wou niñ Me Mebi Kitili, uñon woon Jesu koloñdabek foloñ ukiñ. Me kadakanin titin yakat adi maan koloñdabek foloñ widihigin, noli kohon didimeniñneñkade ukambiyakin eñ noli kohon kapmadineñkade ukambiyakin.

34 Kan Jesudi indin yoguk, “Me ban, adi nemek tiin u mebi mu nadidakaleen tiin doktina kadakanin hik u biyemben.” Kan mikme heki adi kat kula dahidahin in nehitok daneen mongokin.

35 Memetam ungon yakalu Judahi me wapuhidi nimpekit tina indin yogin, “Metam noli adi kedom yehitubu-lodalak, tina adi Kilsto, Bepan mihin in biyagon nobu hatiliwek kan nebo tubulodawek.”

36 Undun yogin kan mikme hekidi maan yamaingon labuna nimpekit tina wain ime buukaan u sumulimibu loune nin gin,

37 “Du Judahi’wala n mapme biyagon nobu hatiliwen kan du da ungon folooge tubulodawen.”

38 Kudi nin kolondabek ki folon indin youla ukambiyakin, “Me yon adi Judahi’wala n Mapme.”

39 Kan meyat kolondabek folon yakumuk adi’walaan in me nin di Jesu nin foko tina indin yoguk, “Du Kilsto biyagon nobu kan da folooge tubulodaan indi maan nihitubu-lodawen.”

40 Undun yoguk kan me nolin in di u nadin a indin ninguk, “Du maangon, adi timinjit undugon tigamnit kan Bepandok munta mube tilan?”

41 Indi yadi kadakanin nikdok kibikon tiniminjit in gon me yon adi kadakan in nemu tuguk.”

42 Undun yona yoguk, “Jesu, du mapme sanin in genit hatigene udaneen buna nu maan nadinambaan.”

⁴³ Kañ Jesudibo ninguk, “Biyagon hinek ganilat, du kamingon nukut yokwet fofoon* ginen udim.”

Jesu kumunguk

(Matiyu 27:45-56; Mak 15:33-41; Jon 19:28-30)

⁴⁴ Mele lekingon tubune kwet wanakan mam-bip tubudapmaan halune woon 3 kilok tuguk.

⁴⁵ Kañ Silonyot maanen haule bulubuluyen u lekingon bulagineune lufom mintaguk.

⁴⁶ Kañ Jesudi gibita indin katiguk, “Me ban, Munabuline kohoge ginen kamelat.” Undun katinan unaningon kumunguk.

⁴⁷ Undun tubu mikme heki’walañ talitimenhikdi kudi u kañ Bepañ wou nintiloon yoguk, “Biyagon hinek, me yon adi me didimenin.”

⁴⁸ Metam hogohogok unon buña bopnegin adi kudi unon mintaguk u kañ welehek gimingimin kulune udaneen yohite ugin.

⁴⁹ Kañ Jesu menimeniye tinan tamwoi Galili gwan tububihila keleni bugin adi kabe-kweetningon yali nemenemek mintaguk u kagin.

Jesu bom ginen kamegin

(Matiyu 27:57-61; Mak 15:42-47; Jon 19:38-42)

⁵⁰⁻⁵¹ Me nin wou Josep adi Alimatiyanin, adi yadi me talitimen bop hatiyagin’walaanenin, tinan adi me didimenin en me momoon. Adi Bepañ’walañ Hatihati Kobuli mingon mintadakaleu kakanok woom hatiguk. Undun doktinan me talitimen noliniyedi Jesu medenin

* **23:43:** Yokwet fofoon wou maan yoguk, adi Gilik mede ginen “Paladais” yoin.

ulatifoŋ kumuŋ gineŋ kamegiŋ kaŋ adi nadiune tuwot mu tuguk.

⁵² Me wendi Pailat namanda foloŋ wooŋ yali Jesu foloŋ dabanɔdok ninadiguk.

⁵³ Kaŋ nadimimbu wooŋ Jesu kolonɔdabek foloŋ kibidali tiŋafoŋ haule fafaudi yauneŋ tiŋa wooŋ mehinek dabanɔdok kawade fafaŋeniŋ wamukiŋneniŋ uŋgoŋ kameguk.

⁵⁴ Nai uŋaniŋ Sabat iitdok nai dulaune tiulidoko kwanai titiŋdok nai tuguk.

⁵⁵ Kaŋ tamwoi Galili gwaŋ tububihila Jesu keletabuŋiŋ heki adi Josep dut wooŋ dabanɔdok meyoŋniŋ dedeŋ kameguk u kagiŋ.

⁵⁶ Nemenemek u kadapmaanɔ udaneŋ yopman wooŋ haguwo munduŋhinit tiulidokogiŋ. Sabat gineŋ adi Yodoko Mededi yolak undugoŋ keleenɔ hakula tigiŋ.

24

*Jesu kumuŋ gineniŋ kaikaanɔ pilakuk
(Matiyu 28:1-10; Mak 16:1-8; Jon 20:1-10)*

¹ Sonda haniŋ timiŋ tamwoi adi pilali haguwo munduŋhinit tiulidokogiŋ u beŋa Jesu bomniŋ gineŋ ugiŋ.

² Wooŋ kalune kawade wapum aganɔ dekeleune bom mami hamap yakuk.

³ Unduŋ kaŋ wooŋ maaneŋ foŋ kalune Wapum Jesu'walaŋ dabanɔdok uŋgoŋ mu hakuk.

⁴ Unduŋ kaŋ nadibedi tiŋa yatu meyat lufom tinahukuthik holiholiŋeniŋ wendi adi yakiniŋ uŋgoŋ mintayemgumuk.

⁵ Kan tamwoi adi u yabuņa munta tiņa du-
wokeneņ kwetfoloņ diween yakin. Kan meyat
wendi indin yeniņgumuk, “Hidi mangoņde me
kaipmuņ hatilakdok kumuhi’walaņ kwet ginen
iņoņ lohiņ?

⁶ Adi iņoņ mu hatak, adi agaņ pilalak. Hidi
koom Galili kwetneņ gwaņ hatiņa mede indin
haniņguk u nadisuneņ.

⁷ ‘Me Kobumuņ adi me kadakahi kohohik foloņ
loune ulukumuneņ, kaņ nai lufomkulitniņ hali
kaikaañ pilalaak.’ ”

⁸ Kan tamwoi adi medeņiņ u naditomuņa

⁹ bom gineniņ udaneņ wooņ mihiniņye 11 u
yeniņa metam noli maañ kahat tiyemgiņ.

¹⁰ Tamoi wohiņe Maliya Madalaniņ, eņ Yoana
eņ Maliya Jems miņ, adi tiņa tamwoi noli noņgoņ
yaugiņ heki adi noņgoņ buņa aposel heki nemek
mintaguk u yeniņgiņ.

¹¹ Iņgoņ aposel heki adi sububa mede binek
yoņa medehik u mu nadisukilitigiņ.

¹² Kan Pitadi kiyaneņ bom gineņ uguk, wooņ
maaneņ heweņa kaguk kaņ hauleniņ hogok
ilu yabuņa udaneņ yopmaņ wooņ nemek u
mintaguk wendok nadiune uņgoņiņ hinek tuguk.

*Jesudi meyat lufom Emaus talipmeņ
mintayemguk*

(Mak 16:12-13)

¹³ Nai uņaniņgoņ Jesu’walaņ kayoņbopniņ gi-
neniņ meyat lufom adi yokwet niņ wou Emaus
uņoņ ude ugumuk. Talik Jelusalem biņa Emausde
uundok u adi 12 kilomita hogok.

14 Ala adi talipmenj unjila nemek mintaguk hogohogok wendok hayotaugumuk.

15 Meyat adi mede kiyonadi titaulune Jesu ungoj mintayemiņa nongoj ugiņ.

16 Ingoj nadinadihik mu tomguk doktiņa tuwot mu kakiyondagumuk.

17 Kaņ Jesudi indinjeninadiguk, “Hidi maņgoj mede yonadi tabamuk?”

Unduņ yenimbu meyat u bulaningoj diween yakumuk.

18 Yali adi’walaaniņ me wou niņ Keleopa adi yoguk, “Metam kwetkwet Jelusalem buņit hogohogok adi nemenemek unoj mintanņak aģaņ nadidapmaņit, kaņ du kubugonđi nemek kobugonj mintanņak u mu nadiņaņ be?”

19 Unduņ yoguk kaņ Jesudibo yeninadiguk, “Maņgoj mintanņak?”

Kaņ adibo indinjeningumuk, “Nemek Jesu Nasaletniņ’walaņ mintanņak. Adi polofet, Bepaņ dawineņ be memetam dauhineņ mede yoyo be kudi titiņ u saņiniņnit hati tuluguk.

20 Kaņ me Silonyot diniņ talitimeņ eņ me waphiniyedi kumuņdok nindapmaaņ ġapman koņoņ foloņ kameu adi yodapmaune kolonđabek foloņ ukiņ.

21 Indi adi me wendigonj Isilaehi memetam kadakaninjeninenin ninigilaak yonņa nadisukilitiņa hatigumun. Kaņ ulukumumbune hatine melenai aģaņ lufomkulitniņ dapmalak.

22 Tiņa kamiņ indinjenin mintanņak. Tamwoi noli indi’walaņ bopnik gineninđi welenadifo mede

indin ninimbu boho tumun. Adi haniñ timin kon ginen unjt.

²³ Woon kanjt kan Jesu'walañ daban unon mu halak. Undun kan udaneen buña indin nininjt. Anelo lufomdi mintayemiña Jesu agañ pilalak yenimuk.

²⁴ Kan mewoi nolidibo kon ginen unjt woon tamwoidi kan buña yonjt undugon hinek adi maan kanjt. Ingon ne adi mu kanjt.”

²⁵ Kan Jesudi indin yeninguk, “Hidi yadi nadinadininit mokit tiña welehik adi gweheyehi doktiña polofet hekidi mede yogin u mu nadisukilitin.

²⁶ Hidi mu nadin be? Kilisto adi timen folofigita nadin mindañ Bepañdi wougigit mimindok yoguk u kahilewaak.”

²⁷ Undun yonja netok Youkudip Mede ginen dedin yolak u yenindakaleguk. Tububihila Moses'walañ manin mede ginen en polofet heki'walañ Youkudip ginen yolak u yeninguk.

²⁸ Undun tiña woon yokwet tubudulagin. Tiña Jesu adi yokwet u kalakapmen tiña wene tuguk

²⁹ kan adi mon ningumuk, “Mele agañ fohebilak ale indigut ingon itnim.” Undun nimbu adut itne fogin.

³⁰ Foon nanane nanandok meyat dut nongon ikin. Ila adi belet tiña Bepañ niutumbaan wobuña beña yemguk.

³¹ Undun tubune dauhik tombune diwedakalegumuk. Kan unaningon Jesu fila uune koti mu kagumuk.

³² Unduņ tiņa wabi nehi uņgoņ kiyonadi tiņa indiņ yogumuk, “Indi talipmen bade mede niniņa Bepaņ’walaņ Youkudip Mede mebi hinek ulitawaañ niniņak. Kaņ welenik yout hinek tiņak.”

³³ Unduņ yohake nai uņaņiņgoņ pilali koti Jelusalemde ugumuk. Wosuwaañ ne’niņ mihiniye 11 tiņa metam noli noņgoņ bopne hatu wooņ yabune

³⁴ indiņ yeniņgiņ, “Wapum adi biyaku agañ pilalak, tiņa Pita mintamiņak.”

³⁵ Unduņ yobu adibo nemek talipmen mintayemguk wendok kahat tiyemgumuk, tiņa belet wobune nai uņaņiņ kakiyondagumuk wendok maañ yenimbune nadigiņ.

Jesudi mihiniye yot maaneņ hatune mintayemiņa mede yeniņguk

(Matiyu 28:16-20; Mak 16:14-18; Jon 20:19-23)

³⁶ Mede kahat unduņ hatulune Jesu ne lekiņgoņhik gineņ uņgoņ mintaaņ yakuk,*

³⁷ u kaņ sukule tigiņ. Untiņa momolok binek kayam yoņa munta tigiņ.

³⁸ Kaņ adibo yeniņguk, “Maņgoņde nadibedi tiiņ? Maņgoņde welelufom tiiņ?”

³⁹ Kohone kayone yabuneņ. Nu nagoņ mintahamulat. Nohoneeņ kanē. Momolok adi nu nohoneeņ nabiņ undihi moņ. Adi yadi gom tiņa kitilihinit mokit.”

* **24:36:** Metam nolidi mede indiņ maañ tomboyoula youkiņ. Jesudi “Kulema hidigut halek” yeniņguk. Ingoņ mede u Gilik mede gineņ mu hatak doktiņa nolidi youkiņ eņ nolidi mu youkiņ.

⁴⁰ Unduŋ yoŋa kayoŋ kohon yembune yabugin.

⁴¹ U yabuŋa wele kukut tiŋa boho gimingimin tigin ingon on, mu nadisukilitigin. Untiŋa nadifi-file tubune adibo yeninguk, “Hidi nanaŋe neeŋbe boiŋa hakiin?”

⁴² Unduŋ yeninadiguk kaŋ pisi heheŋnit diki niŋ tiŋa mingin.

⁴³ Kaŋ adi tiŋa naune kagin

⁴⁴ kaŋ yeninguk, “Nu hidigut hatiŋila indiŋ hanilugut, ‘Nemenemek nutok koom Moses’walaŋ Yodoko Mede gineŋ be polofet heki’walaŋ Youkudip gineŋ be Kap gineŋ hatak u hogohogok u biyagoŋ mintadapmawaak.’ ”

⁴⁵ Tiŋa Bepaŋ’walaŋ mede nadiŋeŋdok nadinadisuhik tubudakaleyemiŋa

⁴⁶ indiŋ yeninguk, “Youkudip Mededi indiŋ yolak, ‘Kilisto adi folofigita nadiŋa kumuŋa nai lufomkulitniŋ hali pilalaak.

⁴⁷ Adi’walaŋ wou foloŋ kwetkwet metam hogohogok Mede Momooŋ yenindapmaune welehik tubutakaleneŋ kaŋ Bepaŋdi kadakanihik tumolokuyembaak.’ Kwanai u adi Jelusalem inoŋ tububuhitdok.

⁴⁸ Hidi kuyeŋ dauhik gineŋ nemenemek hogohogok mintaune kaŋit wendok yohauta tineŋ.

⁴⁹ Tiŋa i nadiŋeŋ, Batnedi nemek hiditok gigit hanindapmaguk u kamehambe fowaak. Unduŋ dokti hidi yokwet wapum i pilap mu bikabuneŋ. Ingoŋ hatilune kunum gineniŋ saŋiniŋ kamehambe fowaak.”

*Jesu kunum foloŋ loguk
(Mak 16:19-20)*

⁵⁰ Unduŋ yeniŋa yahaŋeen yokwet biŋa Be-tanide ugiŋ. Uŋoŋ wosuwaan kohoŋ tiŋa looŋ kahaŋ tiyemguk.

⁵¹ Kahaŋ tiyemiŋa uŋaŋiŋgoŋ biyabuŋa kunum gineŋ loguk.

⁵² Unduŋ tubune adi wou nintiloŋ welenadifo tiŋa udaneŋ kotigoŋ Jelusalemde ugiŋ.

⁵³ Tiŋa helemahelman Siloŋyotneŋ uŋoŋ hatiŋa Bepaŋ niutumba hati tigiŋ.

**Bepan'Walaŋ Folofolok Kobuli
Genesis, Exodus, Psalms, and the New Testament in
the Numanggang Language of Papua New Guinea
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanŋaŋ (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 18 Apr 2025 from source files dated 31 Aug 2023

217908e9-ce08-5ac3-9947-124c48579a74